

Mar thehr liq

Awg meh he lehq phehq peg che awg lawn

Yer suq ve a saq awg lawn liq Mar thehr che ve awr lehr, awg kag awg nuz awr ve Yer suq ve a saq awg lawn liq haq pehg tuhz gha tug Mar thehr yawd ved awg meh haq yehd lehz koz kug lar che yaog. Yer suq ve a saq awg lawn liq awr lehr, teq lawn lehax phehq liz, 4 koz pehg lehq buhq lar che yaog. Kheh te cheaq te lehq, a nig Ghig sa geh lo lag che ha lehg che bon khuhd Mar thehr ve liq cawg-ag che yaog. Mar thehr awg meh cuhx kig vawr “Ghig sa ve laq sawnr” yaog.

Buhq var he lehq buhq che awg yand

Yer suq ve a saq awg lawn liq 4 koz haq buhq sehr phad ve awg meh teq pa awr lehr mad buhq lar che yaog. Kheh maq khuhd, awg kawd maq thad huh ve bon hox bon nax teq pa tawd te khuhd lehax te lehq koz che, Mar thehr liq haq cuh yad Mar thehr yawd awg ton buhq lar che lehd koz che yaog. Yawd awr lehr awg khawnr saw var Ler viq meh lar che yaog. A.D. 70 khuhq thad Yer ruq sar lehr med haq maq te lug ser thad huh buhq lar che yaog.

A yed ir che awg lawn he lehq awg lawn kha peg

Mar thehr yawd a yed yug lehq duhd law jad che awr lehr, Yer suq awr lehr i hehd Yud daq chaw ve Mir six yaq phehq che yaog lehd koz

che haq ghawn sehr phad Yud daq chaw teq pa gha sir tug awg pun yaog. Mar thehr yawd liq phu awg pir khuhn cawg che tawd khuhd teq pa haq lehd ma koz, "Muhd nuh maq ve muhd mig" lehd koz che tawd khuhd haq lehd ma koz, te pawz peg te pawz yug lehq yehd che yaog. Mar thehr liq awg khuhn ir che awg lawn teq pa pehg tuhz ver, che kgeh te pehg tuhz gha che yaog: (1) Ka nad nux maz 5-7; (2) Ka nad nux maz 10; (3) Ka nad nux maz 13; (4) Ka nad nux maz 18; (5) Ka nad nux maz 24-25.

Awg lawn nux

1. Yer suq paw che he lehq awg khaz nuhr maq muh muh-a huh ve awg lawn (1:1-2:23)
2. Yer suq ha lehg che bon khuhd kanx tanr te che (3:1-4:11)
3. Gar liq lehd muhd mig khuhn Yer suq ha lehg che bon khuhd kanx te che (4:12-14:12)
4. Gar liq lehd muhd mig khuhn Yer suq tuhz veh che (14:13-17:20)
5. Gar liq lehd muhd mig khuhn Yer suq awg leh med te pawz ha lehg che bon khuhd kanx te che (17:22-18:35)
6. Yud daq muhd mig he lehq Per riq muhd mig khuhn Yer suq ha lehg che bon khuhd kanx te che (19:1-20:34)
7. Yer suq suh che (21:1-27:66)
8. Yer suq suh ki lo kawq teq tuag che (28:1-20)

Yer suq ve awg ceng awg khad teq pa

¹ Liq che ve awr lehr, Ar brar hanr ve awg yad he lehq Dar viq ve awg yad phehq che Yer suq Khreq ve awg ceng awg khad teq cax peg teq cax te yaq lag lar che awg lawn buhq lar che yaog.

² Ar brar hanr ve awg yad awr lehr, Id caq yaog. Id caq ve awg yad awr lehr, Yar koq yaog. Yar koq ve awg yad awr lehr, Yud daq he lehq yawd ved awg vix awg nax teq pa yaog. ³ Yud daq ve awg yad awr lehr, awg mid ma Tar mar lor paw lar che Phar rehq he lehq Ser raq yaog. Phar rehq ve awg yad awr lehr, Her sar ronr yaog. Her sar ronr ve awg yad awr lehr, Ar ranr yaog. ⁴ Ar ranr ve awg yad awr lehr, Ar miq nar daq yaog. Ar miq nar daq ve awg yad awr lehr, Nar sonr yaog. Nar sonr ve awg yad awr lehr, Sar lar monr yaog. ⁵ Sar lar monr ve awg yad awr lehr, awg mid ma Rar haq geh paw lar che Bawd saq yaog. Bawd saq ve awg yad awr lehr, awg mid ma Rud thaq geh paw lar che Awd behq yaog. Awd behq ve awg yad awr lehr, Ye sehd yaog. ⁶ Ye sehd ve awg yad awr lehr, Jawd mawd Dar viq yaog.

Dar viq ve awg yad awr lehr, Ud rid yaq ve awg mid ma te jaw che yad mid te ghad geh pawag che Sawd laq monr yaog. ⁷ Sawd laq monr ve awg yad awr lehr, Rawd baor yaog. Rawd baor ve awg yad awr lehr, Ar bid yaq yaog. Ar bid yaq ve awg yad awr lehr, Ar saq yaog. ⁸ Ar saq ve awg yad awr lehr, Yawd sar phaq yaog. Yawd sar phaq ve awg yad awr lehr, Yar hawd ranr yaog. Yar hawd ranr ve awg yad awr lehr, Awd siq yaog. ⁹ Awd siq ve awg yad awr lehr, Yod tanr yaog. Yod tanr ve awg yad awr lehr, Ar khad yaog. Ar khad ve awg yad awr lehr, Her sar kiz yaog. ¹⁰ Her sar kiz ve awg yad awr lehr, Maq nad ser yaog. Maq nad ser ve awg yad awr lehr, Ar monr yaog. Ar monr ve awq yad awr lehr,

Yod siq yaog. ¹¹ Yod siq ve awg yad awr lehr, Bar bud lunx muhd mig lo su yug kae che teq coaq thad, Yer khawd niq he lehq yawd ved awg vix awg nax teq pa yaog.

¹² Bar bud lunx muhd mig lo su i hehd haq yug ve vehr khaz nuhr, Yer khawd niq ve awg yad awr lehr, Sar lar ter laq yaog. Sar lar ter laq ve awg yad awr lehr, Ser rud ber laq yaog. ¹³ Ser rud ber laq ve awg yad awr lehr, Ar bid oq yaog. Ar bid oq ve awg yad awr lehr, Ed lar kenr yaog. Ed lar kenr ve awg yad awr lehr, Ar cawr yaog. ¹⁴ Ar cawr ve awg yad awr lehr, Sar doq yaog. Sar doq ve awg yad awr lehr, Ar kher yaog. Ar kher ve awg yad awr lehr, Ed lid oq yaog. ¹⁵ Ed lid oq ve awg yad awr lehr, Ed lar sar yaog. Ed lar sar ve yad awr lehr, Mar thanr yaog. Mar thanr ve awg yad awr lehr, Yar koq yaog. ¹⁶ Yar koq ve awg yad awr lehr, Mar riq ve awg phad mawd Yod sehq yaog. Mar riq awr lehr, Khreq lehd koz che Yer suq haq pawag vid che yaog.

¹⁷ Kheh te lehq, Ar brar hanr haq tanr te lehq Dar viq ve awg coaq lo kha gag che teq chi uhd co cawg che yaog. Dar viq haq tanr te lehq Bar bud lunx muhd mig lo su yug ve che awq coaq kha gag teq chi uhd co cawg che yaog. Bar bud lunx muhd mig lo su yug ve che haq tanr te lehq Khreq ve awg coaq kha gag teq chi uhd co cawg che yaog.

Yer suq Khreq pawag che

¹⁸ Yer suq Khreq paw che awr lehr, che kheh te che yaog. Yawd ved awr ye Mar riq he lehq Yod sehq he daq tug kar tiq te daq peg khaz nuhr, ix

mag maq he daq ser huh, Daq che kehg che Awg ha phu ve kand pax haq cud lehq Mar riq yad hu vehr che yaog. ¹⁹ Yawd he tug kar tiq te daq lar che Yod sehq awr Lehr, thed che cawd che chaw phehq lehq Mar riq ve mehz khuhd mad lug vid gad lehq, yawd haq taq chuhax teh lar haz tug duhd che yaog. ²⁰ Yawd u kheh te duhd ngawx chehd che te yand huh, yuhq maz mawg che awg khuhn, Jawd mawd Ghig sa ve muhd nuh maq cuh yad te ghad tuhaz lehq koz che, “Dar viq ve yad Yod sehq-og, nawg kar tiq te lar che yad mid Mar riq haq he tug ta duhd har. Awg lawn ghod ver, yawd yad hu che awr Lehr, Daq che kehg che Awg ha phu ve kand pax khuhn hu che yaog. ²¹ Yawd yad par te ghad pawag tug yaog. Nawg yawd haq Yer suq lehd koz gha meh vid tug yaog. Awg lawn ghod ver, yawd ved chaw ceng haq i hehd ve vend bax teq pa awg khuhn yawd thaer khuhq vid tug yaog,” lehz muhd nuh maq cuh yad koz vid che yaog.

²² Awg ceng che ve teq pa phehaq che awr Lehr, Jawd mawd Ghig sa yawd ved cuh kar var te ghad haq cud lehq koz lar che tawd khuhd peh lawq tug awg pun phehaq che yaog. ²³ Yawd koz che,

†“Ngawx lar, yad mid hax te ghad yad hu lehq yad par te ghad pawag tug yaog.

Yad par u ve haq †Ed mar noer laq lehd koz gha meh vid tug yaog,”
lehz koz lar che yaog. (Ed mar noer laq lehd koz che cuhx kig awr Lehr, Ghig sa a nig geh chehd

che lehd koz che yaog.)

²⁴ Yod sehq yuhq nuhd-ag che te yand, Jawd mawd Ghig sa ve muhd nuh maq cuh yad yawd haq koz vid lar che heh te lehq yawd kar tiq te lar che yad mid haq he che yaog. ²⁵ Kheh ma khuhd, yad par u ve maq paw ser che kheh ceh yawd awg mid ma geh mad yuhq. Yad par u ve pawag lehq yawd haq Yer suq lehd koz meh vid che yaog.

2

Cud yiq cawg var teq pa lag che

¹ Jawd mawd Her roq ve awg co haq Yud daq muhd mig Behr lehr hehnr khaz awg khuhn Yer suq pawag che yaog. Awg khaz nuhr, cud yiq cawg var teq pa muhd ni tuhz phawd awr tuag lehq Yer ruq sar lehnr med huh lag gag che yaog.

² I hehd koz che, “Pawag vehr che, Yud daq Jawd mawd khar lo awr le. Awg lawn ghod ver, muhd ni tuhz phawd awr lo yawd ved muhd ki sir haq ngag hehd gha mawg lehq yawd haq a kor pi tug ngag hehd lag che yaog,” lehd koz vid che yaog.

³ Jawd mawd Her roq tawd khuhd u ve haq gha kad che te yand, yawd he lehq Yer ruq sar lehnr med yad teq pa liz ni ma khuhn duhd har jad che yaog. ⁴ Yud daq chaw teq pa ve paw khod nux teq pa he lehq liq buhq var teq pa haq Jawd mawd Her roq kug phawng peg lehq, “Khreq khar lo pawag tuawg le,” lehd koz i hehd haq na ngawx che yaog.

⁵ I hehd yawd haq kawq koz vid che, “Yud daq muhd mig Behr lehr hehnr khaz khuhn pawag

tug yaog. Awg lawn ghod ver, Ghig sa ve cuh kar var che kheh koz buhq lar che yaog.

⁶ †'Yud daq muhd mig Behr lehr hehnr khaz-og,
Yud daq Jawd mawd uq penr che khaz teq
pa awg khuhn,

nawg awr lehr suaq keh awg mig awg phond i
che ma hez.

Awg lawn ghod ver, ngag ved chaw ceng
phehq che

Id sar rer laq chaw haq seh kae tug

Jawd mawd te ghad nawg geh tuhaz tug
yaog,' "

lehd koz buhq lar che yaog.

⁷ Kheh te lehq, Jawd mawd Her roq awr lehr,
cud yiq cawg var teq pa haq taq chuhax kug yug
veha lehq, muhd ki sir awg kawd maq tanr tuhaz
che haq kha nehax na ngawx che yaog. ⁸ U kheh
te peg lehq, Jawd mawd Her roq i hehd haq koz
vid che, "Nig hehd teq pa kae lehq yad par nehax
u ve haq kha nehax ca ngawx-eq. Yawd haq
mawg vehr ver, ngag yawd haq a kor gha ca pi
tug ngag haq liz kawq koz ax," lehd koz vid lehq,
yawd i hehd haq Behr lehr hehnr khaz lo kae pe
che yaog.

⁹ Jawd mawd Her roq ve tawd khuhd haq i
hehd gha kad peg lehq, i hehd tu lehq muhd
ni tuhz phawd awr lo i hehd gha mawg lar che
muhd ki sir khaz nuhr ghaq kae lehq, yad par
nehax chehd chehd che thang huh gaeg lehq jehd
vehr che yaog. ¹⁰ Muhd ki sir u ve haq gha mawg
che te yand, i hehd teq pa ha lehg jad che yaog.
¹¹ Yehg khuhn gehe che te yand, awr ye Mar riq

† 2:6 2:6 Mkh 5:2

he lehq yad par nehax haq gha mawg lehq, i hehd boz cuhx lar lehq yad par nehax haq a kor pi che yaog. I hehd teq pa yug veba lar che laq sawnr haq pheq tuhz lehq si, lawd banr he lehq mud rar,* laq sawnr che ve teq pa yawd haq tand vid che yaog.

¹² Jawd mawd Her roq chehd lo maq gha kawq koeq vid tug, yuhq maz che awg khuhn Ghig sa i hehd haq tawd yaw vid cheaq te lehq i hehd teq pa awr lehr, i hehd muhd mig lo koeq che, yaq kaw awg suhx te caz haq kawq koeq che yaog.

Yod sehq he lehq Mar riq Ed jid tuq muhd mig lo phawe che

¹³ I hehd teq pa saw kawq vehr vehr khaz nuhr, yuhq maz che awg khuhn Yod sehq haq Jawd mawd Ghig sa ve muhd nuh maq cuh yad te ghad lag lehq koz vid che, “Tu lor. Yad nehax he lehq awr ye ix mag haq sir ve lehq Ed jid tuq muhd mig lo phawe lor. Ngag nawg haq kawq koz ax thad kha gag u huh chehd laer. Awg lawn ghod ver, yad nehax haq dawz vehr tug Jawd mawd Her roq ghaq ca tod che yaog,” lehz koz vid che yaog.

¹⁴ U ve teq hax khuhn, Yod sehq tu lehq, yad par nehax he lehq yawd ved awr ye Mar riq haq sir ve lehq Ed jid tuq muhd mig lo phawe che yaog. ¹⁵ Jawd mawd Her roq suh vehr che awg yand kha gag, i hehd u huh chehd chehd che yaog. Awg lawn che ve awr lehr, Jawd mawd Ghig sa yawd ved cuh kar var te ghad haq cud

* **2:11** 2:11 lawd banr he lehq mud rar Che awr lehr, suhz cuhd suhz huhx ted ceng yaog.

lehq †“Ed jid tuq muhd mig khuhn, ngag ved yad par haq ngag kug tuhz tug yaog,” lehd koz lar che tawd khuhd u ve heh phehaq tug awg pun yawd te che yaog.

16 Awg yand u ve khuhn, Jawd mawd Her roq awr Lehr, cud yiq cawg var teq pa yawd haq her ka che law lehz gha sir vehr lehq, yawd nez nag jad che yaog. Cud yiq cawg var teq pa haq kha nehax na ngawx lar che awg yand haq yawd sawnr ngawx lehq Behr Lehr hehnur khaz khuhn he lehq awg pad huh kha chehd che haw khaz nehax a saq nid khuhq haq tanr lehq awg huhx ve teq pa haq ca dawz vehr pe che yaog. **17** U thad lo cuh kar var Yer rar miq koz lar che tawd khuhd u ve haq phehaq che yaog.

18 †“Rar maq khaz awg khuhn, paz huhg kehd huhg che awg khuhd he lehq duhd har gad har che awg khuhd haq gha kad che yaog.

Rar kher laq awr Lehr, yawd ved yad teq pa haq te lehq huhg chehd lehq, yawd ved yad teq pa saw suh vehr cheaq te lehq su te ghad-eg liz yawd haq ni ma sa vid tug te maq gha,” lehd koz lar che yaog.

*Yod sehq he lehq Mar riq Ed jid tuq muhd mig
huh tu kawaq che*

19 Jawd mawd Her roq suh vehr lehq, Jawd mawd Ghig sa ve muhd nuh maq cuh yad te ghad Ed jid tuq muhd mig khuhn chehd che Yod sehq haq yuhq maz che khuhn maw vid lehq koz che,

† **2:15** 2:15 Hs 11:1 † **2:18** 2:18 Yrm 31:15

²⁰ “Tu lehq, yad nehax he lehq awr ye ix mag haq sir ve lehq, Id sar rer laq muhd mig lo kawq koeq lor. Awg lawn ghod ver, yad nehax che ve haq dawz vehr tug ca chehd che chaw saw suh vehor,” lehd koz vid che yaog. ²¹ Kheh te lehq yawd tu lehq yad nehax he lehq yawd ved awr ye haq sir ve lehq, Id sar rer laq muhd mig lo kawq koeq che yaog.

²² Kheh ma khuhd, Ar kher laq yawd awr pa Jawd mawd Her roq ve a yad haq kawq taz lehq Yud daq muhd mig haq uq penr chehd che awg lawn Yod sehq yawd gha sir che te yand, yawd kuhz lehq u huh koeq maq pir che yaog. Kheh te lehq yuhq maz che awg khuhn Jawd mawd Ghig sa yawd haq kawq koz vid lehq, Gar liq lehd muhd mig lo kae lehq, ²³ Nar sar rehq med khuhn ca chehd-eg che yaog.

Kheh te lehq, “Khreq haq Nar sar rehq chaw lehd koz tug yaog,” lehz Jawd mawd Ghig sa ve cuh kar var koz lar che tawd khuhd u ve heh phehaq che yaog.

3

A kaz tur vid var Yod hanr bon mar che

¹ Awg yand u ve khuhn, Yod hanr a kaz tur var Yud daq muhd mig he pir khuhn awg god khehz teag lo bon ca mar lehq koz che, ² “Muhd nuh maq muhd mig lag gag vehr tez cheaq te lehq, vend bax haq duhd phuhz lor,” lehd bon mar vid che yaog. ³ Cuh kar var Id sar yaq koz lar che awr lehr,

†“Heh pir khuhn lo chaw te ghad kug lehq koz

che.

'Jawd mawd Ghig sa ve yaq kaw haq ghu te
lar lor.

Yawd ved yaq kaw teq pa haq thed-e lehd teog,' "
lehd koz lar che tawd khuhd che ve te khuhd awr
lehr, Yod hanr awg lawn haq koz che yaog.

⁴ Yod hanr awr lehr, Kar lar oq awg muh te lar
che beg ke haq veq deh lehq yawd ved cuh pehg
huh sar gig caz te lar che sehx hang chuhq lar che
yaog. Yawd ved cad tug awr lehr par ceq he lehq
heh pir khuhn cawg che pehd ghig yaog. ⁵ Awg
yand u ve khuhn Yer ruq sar lehnr med yad, Yud
daq muhd mig chaw awg gha lia he lehq Yawd
danr lawg puhg huh kha chehd che chaw awg
gha lia yawd chehd lo kae che yaog.

⁶ I hehd teq pa a sug yawd ved vend bax teq pa
haq koz mar vid lehq Yod hanr i hehd teq pa haq
Yawd danr lawg khuhn a kaz tur vid che yaog.

⁷ A kaz tur tug, Phar rir sehd he lehq Sar duq
kehd chaw teq pa kha peh vad-ag yawd chehd lo
phoz lag che haq Yod hanr gha mawg lehq yawd i
hehd teq pa haq koz vid che, "Vig haeg awq tuhq
ma yad teq paog, nez nag lehq cir yanr tug lag
tod che haq gha pong tug a sug nig hehd haq koz
ax cheawg le. ⁸ Nig hehd awg cehg mag ni ma pa
lehq duhd phuhz vehr che awg ceng u ve te mar
ser. ⁹ Kheh te lehq, 'Ar brar hanr awr lehr a nig
ved Awr pa phehq che yaog,' lehz nig hehd ve
ni ma khuhn taq ca duhd gid chehd. Awg lawn
ghod ver, Ghig sa awr lehr, huhx meh dig che ve
teq pa haq yug lehq Ar brar hanr ve awg yad
awg dug teq pa te tug te vid gha che yaog lehz
ngag nig hehd haq koz ax che yaog. ¹⁰ A meha

loar suhz cehg khi cuhz per huh khi chuhz taz teh law lar peor. Kheh te lehq daq che awg sir mad nuhq che awg cehg teq pa haq thawq kuhd lehq, a mir khuhn yug chid bag ke tug yaog.

¹¹ Nig hehd vend bax haq duhd phuhz vehr che haq gha sir vid tug awg pun, ngag nig hehd haq a kaz khuhn tur ax che yaog. Kheh ma khuhd, ngag khaz nuhr lag tug chaw te ghad awr lehr, ngag haq keh liz kand pax ir che yaog. Yawd ved khi noz haq yug cid lar tug kheh tawa liz ngag maq kenr. Chaw u ve te ghad awr lehr, Daq che kehg che Awg ha phu khuhn he lehq a mir awg khuhn, nig hehd haq baz tiz sar pehar tug yaog. ¹² Yawd ved laq kuhr khuhn, a cag fend tug yug cid chehd che yaog. Yawd ved a cag dawz kig haq kehr ghad jawq fend kha peg ver, cag sir cag yehg khuhn saw puhd ke tug yaog. Kheh ma khuhd cag cox haq vawr, maq suh vix che a mir khuhn tox ke tug yaog,” lehz Yod hanr koz che yaog.

Yer suq haq Yod hanr a kaz tur vid che

¹³ Awg yand u ve khuhn, Yer suq awr lehr a kaz tur tug Gar liq lehd muhd mig khuhn tuhaz lehq Yawd danr lawg lo Yod hanr chehd huh lag che yaog. ¹⁴ Kheh ma khuhd Yod hanr yawd haq tawr lehq koz che, “Ngag awr lehr, nawg geh a kaz khanr tur cawd che yaog. Nawg vawr ngag geh lag cheawg la,” lehd koz vid che yaog.

¹⁵ Yer suq yawd haq kawq koz vid che, “A meha vawr che kheh te lar ser. Awg lawn ghod ver, thed che cawd che awg gha lia phehaq vid tug a nig te cawd che yaog,” lehz koz vid che yaog. Kheh te lehq Yod hanr yawd haq a kaz tur vid

che yaog. ¹⁶ Yer suq a kaz tur peg lehq, a kaz khuhn tuhaz che awg yand u ve khuhn teq per maq lehax, muhd nuh maq phaw vehr che yaog. Kheh te lehq Ghig sa ve Awg ha phu liz a pia kar heh te yaq lehq, yawd thag huh miag che haq Yer suq gha mawg che yaog. ¹⁷ Muhd nuh kawag lo awg khuhd buhg tuhaz lehq koz che, "Chaw che ve awr Lehr, ngag haq jad che Yad phu yaog. Yawd haq ngag ni ma cawd jad che yaog," lehd koz che yaog.

4

Yer suq ber che lawd che haq gha khanr che

¹ U kheh te peg lehq, ned haeg ber che lawd che haq Yer suq gha khanr tug Awg ha phu yawd haq heh pir khuhn teq chaweh mad cawg awg god khehz teag lo sir ve kae che yaog. ² Yer suq awr Lehr, awr ma cad che uhd chi ni uhd chi hax gaeg lehq awr meq jad vehr che yaog. ³ Awg yand u ve khuhn, ned haeg ber par u ve yawd chehd huh lag lehq koz che. "Nawg Ghig sa ve Yad phu awg cehg mag ver, huhx meh dig che ve teq pa haq pax kaq lehq khaor mod teog," lehz Yer suq haq koz vid che yaog. ⁴ Yer suq kawq koz vid che, "Liq phu khuhn che kheh koz buhq lar che yaog. †'Chaw yad awr Lehr, cad tug haq lehax te lehq a saq teq gha che ma hez hawg.

Ghig sa ve mawq kaw awg khuhn
tuhaz che tawd khuhd awg mag gha lia haq
te lehq a saq teq gha che yaog.'"

† 4:4 4:4 Bon 8:3

⁵ U kheh te peg lehq ned haeg awr Lehr, Yer suq haq daq kehg che med lo sir ve kae lehq, bon yehg nux muh jad che awg thag lo hox vid lar lehq koz che, ⁶ “Nawg awg cehg mag Ghig sa ve Yad phu awg lehd koz ver, pawz kha peog. Awg lawn ghod ver, Liq phu khuhn che kheh koz buhq lar che yaog.

†‘Nawg haq haq sax tug awg pun
yawd ved muhd nuh maq cuh yad haq
yawd koz vid lar peg che yaog.’

‘Nawg ved khi kud huhx meh haq maq gha
yaw vid tug,
i hehd ve laq kuhr che lehq nawg haq haq yug
ax vehr tug yaog.’”

⁷ Yer suq yawd haq kawq koz vid che, “Liq phu khuhn ted kag kawq buhq lar ser che, †‘Nawg ved Jawd mawd Ghig sa haq nawg maq gha ber maq gha lawd hawg,’ lehz kawq koz vid che yaog.”

⁸ Te pawz ned haeg yawd haq suaq keh muh jad che keh dig ted mag thag huh sir ve kae che yaog. Mig gig khod-aq kha cawg che muhd mig teq pa he lehq muhd mig u ve teq pa ve awg mig awg phond awg gha lia yawd haq maw vid lehq koz vid che, ⁹ “Nawg ngag haq nar khehr teh mi lehq a kor pia ver, chuhr huh kha mawg chehd che teq pa awg gha lia ngag nawg haq pehar tug yaog,” lehd koz vid che yaog.

¹⁰ Kheh te lehq Yer suq yawd haq kawq koz vid che, “Sar tanr-og, phawe lor. Awg lawn ghod ver, †‘Nawg ved Jawd mawd Ghig sa haq lehax nawg a kor gha pi lehq,

† **4:6** 4:6 Chid 91:11-12 † **4:7** 4:7 Bon 6:16 † **4:10** 4:10 Bon 6:13

yawd ved kanx haq lehax nawg gha te che
yaog,'
lehz Liq phu awg khuhn buhq lar che yaog."
¹¹ Kheh te peg lehq, ned haeg yawd haq teh lar
haz lehq phaw veh lehq muhd nuh maq cuh yad
teq pa lag lehq yawd haq ga vid lehq ngawx haq
sax vid che yaog.

*Yer suq Gar liq lehd muhd mig khuhn ha lehg
che bon khuhd kanx tanr te che*

¹² Yod hanr haq su pheh yug lehq thawnr
khuhn ke vehr che awg lawn Yer suq gha kad
che te yand, yawd Gar liq lehd muhd mig lo kae
che yaog. ¹³ Yawd Nar sar rehq med khuhn tuhez
lehq, Sar bur lonr he lehq Nar tar liq muhd mig
awg kanr huh, ghig po nux pad huh cawg che Kar
per nar unr med khuhn gaeg lehq u huh chehd
chehd che yaog. ¹⁴ Che kheh te che awr lehr, cuh
kar var Id sar yaq koz lar che tawd khuhd u ve
heh phehaq che yaog.

¹⁵ †“Sar bur lonr muhd mig he lehq Nar tar liq
muhd mig awr lehr, Gar liq lehd ghig po nux
awg pad huh,

Yawd danr lawg ox pax awr, Yud daq chaw ma
hez che teq pa
chehd kig Gar liq lehd muhd mig yaog.

¹⁶ Awg naz tud te che khuhn chehd che chaw teq
pa awr lehr
ir jad pawd jad che awg ghiz haq gha mawg
lehq
suh che muhd mig he lehq suh che awg ha khuhn

† 4:15 4:15-16 Isy 9:1-2

chehd che chaw teq pa awg pun liz awg ghiz
paw vid vehor,”

lehz koz lar che yaog. ¹⁷ Awg yand u ve haq tanr lehq, Yer suq bon tanr mar lehq koz che, “Vend bax haq duhd phuhz lehq ni ma pa lor. Awg lawn ghod ver, Ghig sa ve muhd mig lag gag vehr tezor,” lehd koz mar vid che yaog.

¹⁸ Gar liq lehd ghig po nux pad huh Yer suq yaq kaw tod kae tod-ag huh, Per troq lehd koz che Sid monr he lehq yawd ved awg nax var Anr drehr ix mag, ghig po khuhn geq phehd chehd che haq Yer suq gha mawg che yaog. Awg lawn ghod ver, I hehd awr lehr, ngad ca var phehq che yaog. ¹⁹ Kheh te lehq Yer suq koz che, “Ngag khaz nuhr ghaq laoq. Ngag nig mag haq chaw ca var te cuha laq,” lehz ix mag haq koz vid che yaog. ²⁰ Ix mag te pawaz lehax geq haq teh lar haz lehq yawd khaz nuhr ghaq veh che yaog.

²¹ Kheh te peg lehq Yer suq awg nuz awr teq tawn nehax kawq kae che te yand Yer ber dehd ve awg yad par Yar koq he lehq Yod hanr awr pa Yer ber dehd geh huh lawd kor khuhn geq ghu behz chehd che haq Yer suq gha mawg lehq ix mag haq liz yawd kug yug che yaog. ²² Ix mag liz te pawz maq lehax huh lawd kor he lehq ix mag ved awr pa haq teh lar haz lehq yawd khaz nuhr ghaq veh che yaog.

Yer suq bon mar lehq chaw nag haq ghu na vid che

²³ Yer suq awr lehr Gar liq lehd muhd mig khuhn ted kag peg ted kag kaod kae lehq, i hehd teq pa ve bon lawg kig teq pa awg khuhn Ghig sa

ve muhd mig awg lawn he lehq ha lehg che bon khuhd liz ca kaod mar vid tod che yaog. Chaw u ve teq pa khuhn cawg che a nar awg ceng gha lia he lehq kha nag chehd che chaw awg gha lia haq yawd ghu na vid che yaog. ²⁴ Kheh te cheaq te lehq Sud riq muhd mig khuhn yawd ved awg lawn hax ceh nux maz buhg veh che yaog. A nar laex ceng te nag chehd che chaw, puhq phez che chaw, khi kud laq kuhr suh vehr che chaw, ned geh che chaw awg gha lia yawd chehd lo sir vaha lag lehq, yawd chaw nag u ve teq pa haq saw ghu na vid che yaog. ²⁵ Kheh te lehq Gar liq lehd muhd mig, Der kar pawd liq muhd mig, Yer ruq sar lehnر med, Yud daq muhd mig he lehq Yawd danr lawg kax ox pax awr ve chaw mor nux u ve teq pa yawd khaz nuhr ghaq veh che yaog.

5

Awg bon ir che awg lawn Yer suq keh thag lo bon mar che

¹ Yawd khaz nuhr ghaq tod che chaw awg mor nux haq Yer suq gha mawg lehq, yawd keh thag lo taez che yaog. Yawd mi chehd huh yawd ved awg laq ghuhd teq pa yawd chehd lo lag che yaog. ² Kheh te lehq, yawd awg laq ghuhd teq pa haq tanr mar vid lehq koz che,

³ “Ni ma khuhn co ha phawd awr har ghuhd che chaw teq pa awr lehr, awg bon ir che yaog. Awg lawn ghod ver, muhd nuh maq muhd mig awr lehr, i hehd ve muhd mig phehq vehr che yaog.

- ⁴ Duhd har gad har che chaw teq pa awr lehr,
awg bon ir che yaog.
Awg lawn ghod ver, i hehd ni ma sa tug Ghig
sa te vid tug yaog.
- ⁵ Ni ma nud-u ghad nehr ghad te che chaw teq
pa awr lehr, awg bon ir che yaog.
Awg lawn ghod ver, mig gig awr lehr, i hehd
gha tug awg sinx phehq che yaog.
- ⁶ Thed che cawd che haq meq khod kaz khod
chehd che chaw teq pa awr lehr, awg bon
ir che yaog.
Awg lawn ghod ver, i hehd gha cad buhz
dawg buhz tug yaog.
- ⁷ Har kax vix che chaw teq pa awr lehr, awg bon
ir che yaog.
Awg lawn ghod ver, Ghig sa i hehd teq pa
haq kawq har kax vid tug yaog.
- ⁸ Ni ma khuhn phu che kehg che cawg che chaw
teq pa awr lehr, awg bon ir che yaog.
Awg lawn ghod ver, i hehd Ghig sa haq gha
mawg tug yaog.
- ⁹ Cawd daq hawr daq tug te che chaw teq pa awr
lehr, awg bon ir che yaog.
Awg lawn ghod ver, i hehd haq Ghig sa yawd
ved yad yaog lehd koz tug yaog.
- ¹⁰ Ghig sa ve a lor haq ca lehq thed-e ghad cawd-
aw ghad te cheaq te lehq su du deh che
haq gha khanr che chaw teq pa awr lehr,
awg bon ir che yaog.
Awg lawn ghod ver, muhd nuh maq muhd
mig awr lehr, i hehd ve muhd mig phehq
vehr che yaog.

¹¹ Ngag haq te lehq, su nig hehd haq kha muhd kha na te lehq, du deh ax lehq, her ka lehq nig hehd awg lawn haeg che awg ceng teq pa haq koz ver, nig hehd awr Lehr awg bon ir che yaog. ¹² Ha lehg tug awg ceng kha peh vad-ag cawg vid-oq. Awg lawn ghod ver, muhd nuh maq lo nig hehd ve laq sawnr ir jad che Ghig sa teh ax lar peg che yaog. Nig hehd haq keh awg kawd lag peg che Ghig sa ve cuh kar var teq pa haq liz su u kheh te du deh vid jaw che yaog.

Mig gig ve a lehq

¹³ Nig hehd awr Lehr, mig ghig ve a lehq phehq che yaog. A lehq u ve mehg che pehz vehr ver, khawd-ehg kheh te kawq mehg gha hawg le. A lehq u ve teq chaweh awg bon mad cawg vehr cheaq te lehq su yug chid bag lehq chaw yad naz tod chea lehax yaog.

Mig gig ve awg ghiz

¹⁴ Nig hehd teq pa awr Lehr, mig gig ve awg ghiz phehq che yaog. Keh thag lo cawg che med haq khuhd ceh lar maq gha hawg. ¹⁵ U ve haq sur daq che a mir khehd tox lar lehq khuhr luhd cuhr muhq lar che liz chaw te ghad-eg maq te jaw. Kheh ma khuhd yehg yad ka yad awg gha lia awg ghiz haq gha mawg vid tug muh kig lo teh che yaog. ¹⁶ U ve heh te lehq su mehz khuhd suhr lo nig hehd liz awg ghiz pawd vid-oq. U kheh te ver, nig hehd daq che kanx te lar che haq su gha mawg che te yand muhd nuh maq lo chehd che nig hehd ve Awr pa haq su chid ir chid muh vid tug yaog.

Awg lid tawd khuhd awg lawn

¹⁷ Awg lid tawd khuhd he lehq Ghig sa ve cuh kar var teq pa ve tawd khuhd haq te lug tug ngag lag che law lehz ta duhd. Te lug tug ngag lag che ma hez hawg. U ve haq peh lawq vid tug ngag lag che yaog. ¹⁸ Ngag ni hehd haq awg cehg mag koz ax laq, mig gig he lehq muhd nuh maq che ve mad lug ser che kheh ceh, awg ceng gha lia peh lawq thad kha gag awg lid tawd khuhd awg khuhn liq mehz nehax lehd ma koz, joz lar che awg mehz nehax lehd ma koz, lug vid mehx vid maq gha hawg. ¹⁹ Kheh te lehq, a sug te ghad lehd ma koz, awg lid tawd khuhd che teq pa awg khuhn i jad che ted mag mar haq yawd awg ton liz maq te lehq, su haq liz maq te tug mar vid che chaw awr lehr, muhd nuh maq muhd mig lo su haq keh i jad che chaw phehq tug yaog. Kheh ma khuhd, chaw khar ve te ghad lehd ma koz, yawd awg ton liz te lehq, su haq liz te tug mar vid che chaw awr lehr, muhd nuh maq muhd mig lo ir jad che chaw gha phehq tug yaog. ²⁰ Awg lawn ghod ver, Liq buhq var teq pa he lehq Phar rir sehd teq pa haq keh nig hehd thed che cawd che mad cawg mad ver, nig hehd muhd nuh maq muhd mig khuhn maq gha gehe hawg lehz, ngag nig hehd haq koz ax che yaog.

Nez nag che awg lawn

²¹ †‘Chaw haq nawg maq gha dawz vehr,’ kheh te lehq ‘Su haq dawz vehr che chaw teq pa awr lehr, suhx jehg suhx taz che haq gha khanr che yaog,’ lehz a mig thad lo ve chaw teq pa haq

† 5:21 5:21 Tuhz 20:13, Bon 5:17

koz vid che tawd khuhd haq nig hehd gha kad jaw peor. ²² Kheh te lehq, ngag nig hehd haq koz ax laq, a vix a nax haq nez nag che chaw awr lehr, suhx jehg suhx taz che haq gha khanr tug yaog. A sug yawd ved a vix a nax haq maq sawnr ma caz te che chaw awr lehr, suhx jehg suhx taz var mehz khuhd suhr lo kae lehq suhx gha jehg gha taz che yaog. A vix a nax haq chaw kar lehd koz che chaw awr lehr, muhd naz hoq a mir khuhn gha geh che yaog. ²³ Kheh te lehq, nawg ved tand tug haq tand kig lo Yug ve lag tod-ag huh, nawg vix nawg nax nawg haq vend bax ted ceng ceiar tar kig cawg che haq nawg duhd nuhd ver, ²⁴ tand kig awg pad huh tand tug haq teh lar haz lehq a vix a nax haq nawg kawq cawd daq lar haz peg nuhr heh, kawq lag lehq tand tug haq kawq Yug tand-oq. ²⁵ Nawg haq a moz te che chaw geh teq geha suhx jehg suhx taz kig lo kae tod che yaq kaw kanr huh, nig mag kawq cawd daq tug har naq teoq. U kheh maq te ver, yawd suhx jehg suhx taz var laq khuhn nawg haq chid aq vid tug yaog. Suhx jehg suhx taz var liz nawg haq thawnr awg hox laq khuhn chid aq vid lehq, nawg haq thawnr khuhn Yug ke vehr tug yaog. ²⁶ Ngag nawg haq awg cehg mag koz ax laq, phu ted pehq phuhd nehax peg thad kha gag maq saw sehr ver, nawg thawnr khuhn maq gha tuhaz hawg.

Hax chawd te che awg lawn

²⁷ †'Nawg hax chaw hax paz maq gha te hawg,' lehd koz lar che tawd khuhd haq nig hehd gha

† 5:27 5:27 Tuhz 20:14, Bon 5:18

kad peor. ²⁸ Kheh ma khuhd, ngag nig hehd haq koz ax laq, yad mid haq ngawx lehq hax chawd te gad che ni ma cawg che chaw teq pa awr lehr, yawd ved ni ma khuhn lo yad mid u ve haq hax chawd te vehr che yaog. ²⁹ Kheh te lehq, nawg ved mehz sir laq yaq awr ve teq pax te yaq vid tug te ver, mehz sir u ve te pax kehx khao. Awg ton teq ton maq ve muhd naz hoq khuhn gha khanr cheaq keh, awg khen nehax ted mag lehax lug vehr che vawr, daq jad che yaog. ³⁰ U ve heh te lehq, nawg ved laq kuhr laq yaq awr pax awr ve liz te yaq vid tug te ver, laq kuhr u ve teq pax haq tawz khaog. Awg ton teq ton maq ve muhd naz hoq khuhn gha khanr cheaq keh, awg khen nehax te mag lehax lug vehr che vawr, daq jad che yaog.

Chid bag daq che awg lawn

³¹ †A sug yawd ved awg mid ma haq chid bag ver, chid bag che liq te koz yawd haq gha te vid che yaog, lehd koz lar che liz cawg che yaog. ³² Kheh ma khuhd, ngag nig hehd haq koz ax laq, hax chawd hax paz te che ted ceng ma hez lehq, awg kag awg nuz awr ve awg lawn haq te lehq a sug yawd ved awg mid ma haq chid bag che ver, yawd awr lehr, yawd ved awg mid ma haq hax chawd hax paz te cuh che yaog. Su chid bag lar che yad mid haq ca he che chaw liz hax chawd hax paz te che yaog.

Khanr che awg lawn

† **5:31** 5:31 Bon 24:1

³³ †‘Ma hez hez che awg ceng haq nawg maq gha khanr. Nawg khanr lar che heh Jawd mawd Ghig sa mehz khuhd suhr gha te che yaog’ lehz, a mig thad lo ve chaw teq pa haq koz vid lar che tawd khuhd haq liz nig hehd gha kad jaw peor. ³⁴ Kheh ma khuhd ngag nig hehd haq koz ax laq, a cehax liz taq khanr. Muhd nuh maq haq liz cud lehq taq khanr. Awg lawn ghod ver, muhd nuh maq awr lehr, Ghig sa ve kaw jaw te lar che yaog. ³⁵ Mig gig haq liz cud lehq taq khanr. Awg lawn ghod ver, mig gig awr lehr, Ghig sa ve khi naz kig te lar che yaog. Yer ruq sar lehnر med haq liz cud lehq taq khanr. Awg lawn ghod ver, med u ve awr lehr, Jawd mawd nux ve med te lar che yaog. ³⁶ Nawg ved a kor haq liz cud lehq taq khanr. Awg lawn ghod ver, nawg ved cuhz kheh muh ted mag nehax phu vid tug he lehq naz vid tug liz nawg te maq gha. ³⁷ Nawg koz cawd che tawd awr lehr, ‘yag ver yaog,’ ‘ma hez ver ma hez hawg,’ lehd lehax koz. U ve nuz awr koz kae chehd ser ver, ned haeg lo lag che phehq vehr che yaog.

Su haq kawq te khuhq vid che awg lawn

³⁸ †‘Su nawg ved mehz sir haq te lug ax ver, yawd ved mehz sir haq liz nawg kawq te lug vid lehq, su nawg ved cig haq te khehq ax ver, yawd ved cig haq liz nawg kawq te khehq vid-oq’ lehd koz lar che awg lid tawd khuhd haq nig hehd gha kad jaw che yaog. ³⁹ Kheh ma khuhd, ngag nig hehd haq koz ax laq, nawg haq te yaq che

† 5:33 5:33 Ak 19:12, Heh 30:2 † 5:38 5:38 Tuhz 21:24, Ak 24:20, Bon 19:21

chaw haq tad kawq te khuhq vid. Nawg ved par loz laq yaq awr phawd awr su tha phehd ax ver, laq vehr awr phawd awr liz kawq mawr vid ser. **40** Su nawg haq tanr lehq nawg ved a poq he gad che ver, a poq nux maz liz yawd haq kawq pid ser. **41** Su nawg haq bax nex lehq yaq kaw te kid lod mig lo kae cuha ver, yawd geh ni kid lod mig lo kawq kae ser. **42** Lawg che chaw haq pid-oq. Chid gad ngar gad che chaw haq liz mehz khuhd teq nar awr phuhz pe lehq taq te. Chid vid ngar vid-oq.

Cand par haq haq che awg lawn

43 †'A sug yawd pad huh chehd che chaw haq haq lehq, a sug yawd ved cand par haq cand-oq' lehd koz lar che tawd khuhd haq nig hehd gha kad jaw che yaog. **44** Kheh ma khuhd, ngag nig hehd haq koz ax laq, nig hehd ve cand par teq pa haq haq lehq, nig hehd haq du deh che chaw teq pa haq bon lawg vid-oq. **45** Nig hehd u kheh te ver, nig hehd awr lehr, muhd nuh maq lo chehd che nig hehd ve Awr pa ve yad phehq che yaog. Awg lawn ghod ver, chaw haeg he lehq chaw daq teq pa awg thag huh yawd ved muhd ni ghiz kha sur suar paw vid che yaog. Thed che chaw he lehq ma thed che chaw teq pa thag huh muhd yeg liz kha sur suar lag vid che yaog. **46** Nig hehd haq haq che chaw haq lehax haq ver, a thoq awg bon cawag le. Awg khawnr ghawz var teq pa liz u kheh te chehd che ma hez hawg la. **47** Nawg ved awg chawd teq pa haq lehax awg chawd te lehq tawd yaw daq chehd ver, su te chehd cheaq

† **5:43** 5:43 Ak 19:18

keh nawg awg lex a thoq te hawg le. Su Ghig sa haq maq sir che chaw teq pa liz u kheh te chehd che ma hez hawg la. ⁴⁸ Kheh te cheaq te lehq, muhd nuh maq lo chehd che nig hehd ve Awr pa peh lawq che heh, nig hehd teq pa liz peh lawq vid-oq.

6

Tand tug awg lawn mar vid che

¹ Su gha mawg tug awg pun lehax chaw yad mehz khuhd suhr nawg daq che kanx maq gha te tug sa tiq tar-og. U kheh sa tiq maq tar ver, muhd nuh maq lo chehd che Awr pa geh nawg laq sawnr maq gha hawg.

² Kheh te lehq nawg har kax lehq tand vid ga vid che te yand, chaw her ka var heh taq te. I hehd haq su chid muh vid tug bon lawg kig khuhn lehd ma koz, yaq kaw kar lo lehd ma koz, behd mez cuh vid che yaog. Ngag nig hehd haq awg cehg mag koz ax laq, chaw u ve teq pa awr lehr a sug yawd ved laq sawnr haq gha vehr che yaog. ³ Kheh ma khuhd, nawg su haq tand vid ga vid che te yand nawg ved laq kuhr laq yaq awr pax awr a thoq te che haq laq kuhr laq vehr awr pax awr taq sir vid. ⁴ Kheh te cheaq te lehq su haq tand vid ga vid che te yand su mad mawg kig huh ca te. U kheh te ver su mad mawg kig huh mawg vix che nawg ved Awr pa awr lehr nawg haq laq sawnr pehar tug yaog.

⁵ Nig hehd bon lawg che te yand chaw her ka var teq pa heh taq te. Awg lawn ghod ver, i hehd haq su gha mawg vid tug bon lawg kig khuhn

lehd ma koz, yaq kaw ceh huh lehd ma koz, hox lar lehq bon lawg gad vix che yaog. Ngag nig hehd haq awg cehg mag koz ax laq, chaw u ve teq pa awr lehr a sug yawd ved laq sawnr haq gha vehr che yaog. ⁶ Kkeh ma khuhd nawg bon lawg thad ver, nawg ved bawehd khuhn geh lehq ghaz mir hoz lar lehq su mad mawg kig huh nawg ved Awr pa geh lawr-oq. Mad mawg kig huh mawg vix che nawg ved Awr pa awr lehr, nawg haq laq sawnr pehar tug yaog.

⁷ Nig hehd bon lawg thad ver, Ghig sa haq maq sir ser che heh taq te. I hehd teq pa bon lawg cheawg lehr, awg bon mad cawg che tawd haq te thawz te thawz kaod koz lawg che yaog. Awg lawn ghod ver, i hehd u kkeh te lawg ver, i hehd lawg lar che heh te gha tug yaog lehd duhd che yaog. ⁸ Chaw u ve teq pa heh taq te. Awg lawn ghod ver nig hehd lor chehd che teq pa haq nig hehd mad lawg ser liz, nig hehd ve Awr pa sir chehd che yaog. ⁹ Kkeh te lehq, nig hehd bon che kkeh koz lawr-oq.

Muhd nuh maq lo chehd che ngag hehd ve Awr paog,

nawg ved awg meh haq khar thad liz yawz yan che cawg vid-oq.

¹⁰ Nawg ved muhd mig mig gig thang huh cawg vid-oq.

Muhd nuh maq lo nawg ved a lor cawd che
heh
mig gig yad teq pa liz nawg ved a lor cawd che
haq ghaq te vid-oq.

¹¹ Yaq ni lor che cad tug dawg tug teq pa
yaq ni ngag hehd haq pehar laoq.

12 Su ngag hehd haq te yaq ax lar che vend
bax haq
ngag hehd phehd kha vid che heh te lehq
ngag hehd ve vend bax haq liz phehd kha ax
laoq.

13 Kheh te lehq, vend bax ber che awg khad teq
pa khuhn,
ngag hehd haq taq kae cuha.
Kheh te lehq haeg che awg khad khuhn
ngag hehd haq pong ax laoq.*

14 Awg lawn ghod ver nig hehd su ved te yaq
kig haq phehd kha vid ver, muhd nuh maq lo
chehd che nig hehd ve Awr pa liz nig hehd ve
yaq kig haq phehd kha tug yaog. **15** Kheh ma
khuhd, nig hehd su ved yaq kig haq ma phehd
kha vid ver, nig hehd ve Awr pa liz u ve heh te
lehq nig hehd ve yaq kig haq liz ma phehd kha
ax hawg.

Cad tug ce lehq bon lawg che awg lawn

16 Nig hehd cad tug ce che te yand, chaw her ka
var teq pa heh te lehq mehz khuhd awg nuhr tiq
he lehq duhd har cehar lehz taq ca te mar vid.
Chaw u ve teq pa vawr i hehd cad tug ce chehd
che haq su gha mawg gha sir vid tug, i hehd ve
mehz khuhd u kheh te tar che yaog. Ngag nig
hehd haq awg cehg mag koz ax laq, i hehd awr
lehr a sug yawd ved awg bon haq gha vehr che
yaog. **17** Kheh ma khuhd, nawg cad tug ce chehd

* **6:13** 6:13 Liq phu awg koz awg pir ted pehg khuhn tawd khuhd
che ve teq tawn liz cawg che yaog. “Awg lawn ghod ver, muhd
mig, kand pax he lehq awg mig awg phond co co taer taer nawg
ved phehq che yaog.”

thad ver, mehz khuhd kha nehax chuhd lehq a kor haq nag mad kha nehax gehz lehq kehr ghad te chehd lar. ¹⁸ U kheh te ver, nig hehd cad tug ce chehd che haq su maq sir mad mawg. Kheh ma khuhd, su mad mawg kig lo chehd che nawg ved Awr pa mawg tug yaog. Kheh te lehq su mad mawg kig lo mawg vix che nawg ved Awr pa awr lehr nawg haq awg bon pehar tug yaog.

Muhd nuh maq lo med nged jeg kor saw phoz che awg lawn

¹⁹ Mig gig che ve thang huh nig hehd ve med nged jeg kor taq saw phoz lar. Mig gig thang huh saw phoz lar ver, yud taz vix lehq awg puhd liz cad vix lehq chaw khuhd liz khuhd yug gha che yaog. ²⁰ Kheh ma khuhd, muhd nuh maq lo nig hehd ve med nged jeg kor saw phoz lar lor. U huh yud liz ma taz vix puhd liz ma cad vix lehq chaw khuhd liz khuhd yug maq gha. ²¹ Awg lawn ghod ver, nawg ved med nged jeg kor khar lo cawg liz, nawg ved ni ma u huh cawg che yaog.

Awg ton ve a mir khehd

²² Mehz sir awr lehr, awg ton ve a mir khehd phehq che yaog. Kheh te cheaq te lehq nawg ved mehz sir daq ver, nawg ved awg ton liz awg ghiz kha nehax cawg tug yaog. ²³ Kheh ma khuhd, nawg ved mehz sir mad daq ver, te ton maq ve awg naz tud awg naz hoq saw phehq vehr tug yaog. Nawg ved awg ton khuhn ve awg ghiz awg naz tud phehq vehr ver, naz tud che u ve awr lehr kuhz tug ir jad che yaog.

Ghig sa he lehq phu si med nged jeg kor awg lawn

²⁴ Chaw te ghad-eg liz jawd mawd ni ghad ve awg ceg te maq gha. Awg lawn ghod ver, te ghad haq cand ver, te ghad haq haq tug yaog. Te ghad haq yawz yan ver, te ghad haq maq sawnr ma caz te tug yaog. Nig hehd awr lehr Ghig sa ve awg ceg he lehq phu si med nged jeg kor ve awg ceg te pawaz lehax teq geha te maq gha hawg.

Duhd har duhd khix che awg lawn

²⁵ Kheh te cheaq te lehq, ngag nig hehd haq koz ax laq, khawd-ehg kheh te a saq teq lehq gha cad gha dawg tug haq ta duhd har. Khawd-ehg kheh te lehq, nig hehd ve awg ton gha veq gha deh tug haq liz ta duhd har. A saq teq che ted ceng awr lehr cad tug haq keh awg phuhd khaz lehq awg ton liz beg ke veq kad haq keh awg phuhd khaz che ma hez hawg la. ²⁶ Muhd-aq lo pog tod che ngaz nehax teq pa haq ngawx-oq. I hehd awr lehr a cag maq ti, a cag liz mad ghiq lehq cag yehg khuhn cag sir liz ma puhd ke. Kheh ma khuhd muhd nuh maq lo chehd che nig hehd ve Awr pa awr lehr i hehd haq car vid taw vid chehd che yaog. Nig hehd teq pa awr lehr ngaz nehax u ve te pa haq keh awg phuhd khaz che ma hez hawg la. ²⁷ Duhd har cheaq te lehq a sug yawd ved a saq haq teq sawax liz kawq yehg vid gha tug nig hehd awg khuhn a sug te ghad te gha hawg le.

²⁸ Kheh te ver, beg ke veq kad awg pun liz nig hehd a thoq te duhd har cheawg le. Heh pir lo cawg che suhz vez u ve khawd-ehg kheh te iar che haq duhd ngawx-oq. Awg cehg u ve kanx

liz maq te, ghoq kheh liz mad gag. ²⁹ Kheh te lar, ngag nig hehd haq koz ax laq, paw sa jad lehq awg mig awg phond ir jad che Jawd mawd Sawd laq monr liz suhz vez nehax u ve teq pa te vez nehax kheh tawa liz mad daq ser che yaog. ³⁰ Kha sehax maq yonr che chaw teq paog, yaq ni teq chehd lehq sawx vawr ver, a mir khuhn bag ke vehr tug muhq cehg haq Ghig sa kheh taw taw maq deh vid veq vid chehd ver, u ve haq keh lex lehq nig hehd haq veq deh ax tug ma hez hawg la.

³¹ Kheh te cheaq te lehq, khawd-ehg kheh te ver gha cad gha dawg tug, khawd-ehg kheh te ver gha veq gha deh tug, haq ta duhd har. ³² Awg lawn ghod ver, Ghig sa haq maq sir che chaw teq pa liz, awg ceng che ve teq pa haq ghaq ca chehd che yaog. Awg ceng che ve teq pa nig hehd lor chehd che haq muhd nuh maq lo chehd che nig hehd ve Awr pa Ghig sa sir chehd che yaog. ³³ Kheh ma khuhd, a yed ir jad che ted ceng awr lehr, Ghig sa ve muhd mig he lehq yawd ved thed che cawd che haq caoq. Nig hehd lor chehd che awg ceng teq pa awg gha lia yawd nig hehd haq kawq thehnr ax tug yaog.

³⁴ Kheh te cheaq te lehq, sawx vawr awg pun ta duhd har. Awg lawn ghod ver, sawx vawr awg pun sawx vawr duhd har tug cawg chehd che yaog. Teq ni awg pun teq ni duhd har tug law chehd che awg ceng cawg che yaog.

¹ Su haq nig hehd vend bax taq tar. U kheh te ver, Ghig sa liz nig hehd haq vend bax maq tar hawg. ² Awg lawn ghod ver, nig hehd su haq vend bax tar che heh te lehq Ghig sa liz nig hehd haq vend bax kawq tar tug yaog. Nig hehd su haq khawd-ehg kheh te vid lar liz, Ghig sa nig hehd haq u kheh kawq te khuhq ax tug yaog. ³ Nig hehd a sug yawd ved mehz sir khuhn ve suhz tehd nux tor laq kheh hi te che haq maq ngawx mawg he lar lehq, a thoq awr te lehq nawg vix nawg nax teq pa ve mehz sir khuhn lo cawg che mehz pux nehax haq ca ngawx mawg cheawg le. ⁴ Nig hehd a sug yawd ved mehz sir khuhn suhz tehd nux tor laq kheh hi cawg chehd liz a thoq awr te lehq nawg vix nawg nax haq nawg ved mehz sir khuhn lo cawg chehd che mehz pux nehax haq ngag bez kha ax laq lehd ca koz tod cheawg le. ⁵ Chaw her ka var teq paog, nig hehd ve mehz sir khuhn suhz tehd nux tor laq kheh hi te che haq awg kawd yug kha ser. U kheh te peg ver, nawg vix nawg nax ve mehz sir khuhn cawg chehd che mehz pux nehax haq khawd-ehg kheh te yug tuhz gha tug nawg kha sehax mawg cehnur tug yaog.

⁶ Daq kehg jad che awg ceng yug lehq phid haq ta pid. Pix koer sehnx haq yug lehq vaq mehz khuhd suhr taq ca bag teh vid. U kheh te ver, u ve teq pa haq vaq u ve teq pa naz kix lar lehq phid u ve teq pa nig hehd haq kawq phuhz cheq tug yaog.

Lawg lor; ca lor, thuhz lor

⁷ Lawg lor. Lawg ver, gha tug yaog. Ca lor. Ca ver, mawg tug yaog. Ghaz mir haq thuhz lor. Thuhz ver, phawa tug yaog. ⁸ Awg lawn ghod ver, lawg che chaw awg gha lia gha tug yaog. Ca che chaw liz mawg tug yaog. Yehg ghaz mir haq thuhz che chaw haq liz i hehd haq yehg ghaz mir phaw vid tug yaog. ⁹ Nig hehd teq pa awg khuhn a sug te ghad cawg hawg le. Yad khaor mod lawg ver, huhx meh dig yug pid che. ¹⁰ Ngad lawg ver, vig yug pid tuawg la. ¹¹ Nig hehd awr lehr, haeg che chaw phehq liz a sug yawd ved yad haq med nged daq maq pid khuhd nuhd chehd ver, cheaq keh lex lehq muhd nuh maq lo chehd che nig hehd ve Awr pa geh kha lawg che chaw teq pa haq daq che awg ceng yawd pid tug ma hez hawg la.

¹² Kheh te cheaq te lehq, su nawg haq tea vid gad che heh te lehq nig hehd liz su haq u kheh te vid-oq. Awg lawn ghod ver, tawd che ve te khuhd awr lehr, awg lid tawd khuhd liq awg khuhn he lehq Ghig sa ve cuh kar var teq pa koz lar che tawd khuhd yaog.

Mad kuhg che ghaz mir khuh

¹³ Mad kuhg che ghaz mir khuh haq gehe. Awg lawn ghod ver lug vid kig lo kae che yaq kaw awr lehr kae sa jad lehq ghaz mir khuh liz kuhg jad che yaog. Kheh te lehq chaw u huh gehe che liz cawg mad jad che yaog. ¹⁴ Kheh ma khuhd, a saq teq vid kig lo kae che ghaz mir khuh awr lehr, mad kuhg lehq yaq kaw liz har jad che yaog. Ca mawg lehq gehe che chaw liz a cehax lehax cawg che yaog.

Awg sir haq ngawx ver, awg cehg haq sir che

¹⁵ Awg cehg mag ma hez che Ghig sa ve cuh ka var teq pa haq sa tiq tar-oq. Awg khuhn phawd awr ver haeg jad che heh phid heh te chehd liz, yawg ve awg gig kox haq veq deh lehq nig hehd chehd lo lag che yaog. ¹⁶ I hehd te che kanx haq ngawx ver, i hehd khawd-ehg kheh te che chaw haq nig hehd gha sir che yaog. A chud bid haq a pehx med sir gha sax jawa la. A chud cehg hag a kud sir gha sax jawa la. ¹⁷ U ve haq sur daq che yaog. Daq che awg cehg haq ver, daq che awg sir nuhq che yaog. Mad daq che awg cehg haq ver, mad daq che awg sir nuhq che yaog. ¹⁸ Daq che awg cehg awr lehr, mad daq che awg sir nuhq tug awg khad mad cawg hawg. Kheh te lehq mad daq che awg cehg haq liz, daq che awg sir nuhq tug awg khad mad cawg hawg. ¹⁹ Daq che awg sir mad nuhq che awg cehg teq pa awr lehr, thawq kuhd lehq a mir khuhn tox ke tug yaog. ²⁰ Kheh te cheaq te lehq, chaw u ve teq pa te che kanx haq ngawx ver, i hehd ve ni ma he lehq i hehd khawd kheh te tod che haq sir gha che yaog.

Nig hehd haq ngag maq sir daq

²¹ Ngag haq, 'Jawd mawd-og, Jawd mawd-og,' lehd kha koz che chaw awg gha lia muhd nuh maq muhd mig khuhn gha gehe che ma hez. Muhd nuh maq lo chehd che ngag ved Awr pa ve a lor haq te che chaw teq pa lehax gha gehe che yaog. ²² Ghig sa suhx jehg suhx taz che awg ni u ve haq gaeg ver, 'Jawd mawd-og, Jawd mawd-og, ngag hehd nawg ved awg meh awg khuhn

bon mar che ma hez hawg la. Nawg awg meh awg khuhn ned haeg teq pa haq ghaq kog lehq and tug kha peh te peg che ma hez hawg la,’ lehz chaw kha peh vad-ag ngag haq koz ax tug yaog. ²³ Kheh liz, ngag i hehd haq che kheh koz vid tug yaog. ‘Ngag nig hehd haq maq sir daq. Haeg che chaw teq paog, yor log,’ lehd koz vid tug yaog.

*Cud yiq cawg var he lehq mad cawg var yehg
te che awg lawn*

²⁴ Kheh te cheaq te lehq, ngag mar vid che tawd khuhd haq gha kad lehq na yug lehq te che chaw teq pa awr lehr, huhx meh thag huh yehg te che cud yiq cawg che chaw teq pa haq sur daq che yaog. ²⁵ Muhd yeg lag lehq a kaz ir taz lehq muhd huh nux lag lehq yehg u ve haq thinr liz yehg u ve huhx meh thag huh te lar cheaq te lehq ma kuhd che yaog. ²⁶ Ngag mar vid che tawd khuhd haq gha kad lehq maq na yug lehq maq te che chaw te pa awr lehr, sehnd de khuhn yehg te che cud yiq mad cawg che chaw teq pa haq sur daq che yaog. ²⁷ Muhd yeg lag lehq a kaz ir taz lehq muhd huh nux mez lag che te yand, yehg u ve haq thinr ver, yehg u ve saw kuhd bag vehr che yaog,” lehz Yer suq koz che yaog.

²⁸ Yer suq tawd u ve teq pa haq yaw mar peg che te yand, yawd mar che tawd khuhd u ve haq chaw kheh ma ve and jad che yaog. ²⁹ Awg lawn ghod ver, yawd mar che tawd khuhd u ve teq pa liq buhq var teq pa mar che haq maq sur. Kheh ma khuhd, yawd vawr Ghig sa lo lag che kand pax cawg che phad heh te mar che yaog.

8*Yer suq khir tuq var haq ghu na vid che*

¹ Yer suq kehaq lo yaq thad, chaw kha peh vad-ag yawd khaz nuhr ghaq tod che yaog. ² Awg yand u ve khuhn, khir tuq var te ghad lag lehq, nar khehr teh mi lar lehq a kor pi lehq koz che, "Jawd mawd-og, nawg te gad ver, ngag haq daq kehg vid tug nawg te gha che yaog," lehd koz vid che yaog.

³ Yer suq laq kuhr che lehq yawd haq vad lar lehq koz che, "Ngag te gad che yaog. Daq vid kehg vid-oq," lehd koz vid che yaog. Teq pear lehax yawd khir tuq a nar mehx vehr che yaog.

⁴ Yer suq yawd haq koz vid che, "Awg lawn che ve chaw te ghad-eg haq liz ta koz vid. Kheh ma khuhd, nawg kae lehq paw khod haq awg ton ca maw vid-eq. Su mehz khuhd suhr huh sax khiz te tug, Mod ser awg lid teh lar che heh te lehq tand tug liz ca tand vid-eq," lehd koz vid che yaog.

Yer suq maq yad awg hox ve awg ceg haq ghu na vid che

⁵ Yer suq Kar per nar unr med khuhn gehe che te yand, maq yad awg hox te ghad yawd chehd lo lag lehq yawd haq lawg khawx lehq koz che,

⁶ "Jawd mawd-og, ngag ved awg ceg khi kud laq kuhr suh vehr lehq yehg khuhn yuhq chehd che yaog. Yawd awr lehr gha tuq gha khanr jad che yaog," lehd koz vid che yaog.

⁷ Yer suq yawd haq koz vid che, "Ngag lag lehq yawd haq ghu na vid tug yaog," lehd koz vid che yaog.

⁸ Kheh te lehq, maq yad awg hox u ve yawd haq kawq koz vid che, "Jawd mawd-og, ngag ved yehg khuhn nawg haq gehag vid tug ngag te maq kenr. Kheh te lar, nawg tawd teq pear lehax yaw liz ngag ved awg ceg na vehr tug yaog. ⁹ Awg lawn ghod ver, ngag awr lehr maq yad te lehq su ved kand pax awg huhx lo chehd lehq ngag huhx lo liz maq yad teq pa cawg che yaog. Ngag huhx ve maq yad te ghad haq, 'Kae-oq,' lehd koz vid ver, yawd veh che yaog. 'Lar-oq,' lehd koz vid ver, yawd lag che yaog. Ngag ved awg ceg var haq liz, 'Che ve teoq,' lehd koz vid ver, yawd te veh che yaog," lehz kawq koz vid che yaog.

¹⁰ Tawd u ve haq Yer suq gha kad che te yand, yawd and jad lehq, yawd khaz nuhr ghaq tod che chaw teq pa haq koz vid che, "Ngag nig hehd teq pa hag awg cehg mag koz ax laq, Id sar rer laq chaw teq pa awg khuhn liz che kheh taw maq yonr che haq ngag mad mawg jaw ser. ¹¹ Ngag nig hehd haq koz ax laq, muhd ni tuhz phawd awr he lehq muhd ni kehg phawd awr lo chehd che chaw kha peh vad-ag lag lehq muhd nuh maq muhd mig awg khuhn Ar brar hanr, Id caq, Yar koq teq pa geh teq geha gha mi cad tug yaog. ¹² Kheh ma khuhd, Ghig sa ve muhd mig khuhn gha chehd cawd che teq pa vawr, awg bag phawd awr lo awg naz tud teag huh yug chid bag pe che haq gha khanr tug yaog. U huh kha chehd che chaw teg pa huhg lehq cig geq yuhz cheq tug yaog," lehz Yer suq koz vid che yaog. ¹³ Yer suq maq yad awg hox haq koz vid che, "Nawg koeq lor. Nawg yonr che heh phehaq tug yaog," lehd koz vid che yaog.

Kheh te lehq, awg yand u ve khuhn teq pear lehax awg ceg u ve liz na vehr che yaog.

Yer suq Per troq awr pi ma haq ghu na vid che

¹⁴ Yer suq awr lehr, Per troq ve yehg khuhn gehe che te yand Per troq ve awr pi ma kaz nag lehq yuhq chehd che haq gha mawg che yaog. ¹⁵ Yawd ved laq kuhr haq Yer suq vad lehq kaz nag chehd che na vehr che yaog. Kheh te lehq yawd tu lehq Yer suq haq te car te taw vid che yaog. ¹⁶ Muhd phiq muhd sux naz huh, ned geh che chaw teq pa kha peh vad-ag Yer suq chehd lo sir veba lag lehq yawd tawd yaw vid lehq ned teq pa haq ghaq kog vid che yaog. Chaw nag awg gha lia haq liz yawd ghu na vid che yaog. ¹⁷ Yawd che kheh te che awr lehr, awg cehg mag cuh kar var Id sar yaq koz lar che heh, †“Yawd awg ton a nig ved nag guhg kig haq haq yug ve lar lehq, a nig ved a nar teq pa haq puhd cid lar che yaog,” lehd koz lar che heh phehaq vid tug te che yaog.

Yer suq khaz nuhr ghaq kae gad che chaw teq pa

¹⁸ Yawd haq kha caw yuhd te chehd che chaw awg mor nux haq Yer suq gha mawg lehq, “Ghig po nux ox pax awr khanr kae veg,” lehz yawd koz vid che yaog. ¹⁹ Awg yand u ve khuhn, liq buhq var te ghad yawd chehd lo lag lehq koz che, “Sar lar-og, nawg khar lo kae lehd ma koz ngag liz nawg khaz nuhr ghaq kae tug yaog,” lehd koz vid che yaog.

²⁰ Yer suq yawd haq koz vid che, “Heh phid vawr awg kor cawg lehq, muhd-aq lo pog tod che

† **8:17** 8:17 Isy 53:4

ngaz teq pa liz, yuhq kig awg phi cawg che yaog. Kheh ma khuhd chaw yad ve Yad phu awr lehr, a kor cuhx kig mad cawg hawg," lehd koz vid che yaog.

²¹ Awg laq ghuhd awg mor khuhn chehd che yawd ved awg laq ghuhd te ghad lawg lehq koz che, "Jawd mawd-og, ngar pa suh vehr che haq awg kawd ca tur vid lar haez sar," lehd koz a khawag lawg che yaog.

²² Yer suq yawd haq kawq koz vid che, "Ngag khaz nuhr ghaq laoq. Chaw suh teq pa i hehd khad nawag tur daq vid-oq," lehd koz vid che yaog.

Yer suq muhd huh haq yug jehd vid che

²³ Yawd huh lawd kor khuhn gehe lehq yawd ved awg laq ghuhd teq pa liz yawd khaz nuhr ghaq gehe che yaog. ²⁴ Awg yand u ve haq, ghig po u ve khuhn muhd huh nux mez lag jad cheaq te lehq, ghig bad dawz taz lehq huh lawd kor khuhn a kaz gehe lehq peh vehr liz, Yer suq awr lehr, yuhq mir ka chehd ser che yaog. ²⁵ Awg laq ghuhd teq pa yawd haq ca nuhr vid lehq koz che, "Jawd mawd-og, ngag hehd haq a cehax ga laoq. Ngag hehd a kaz thunr che suh vehr tez-or," lehd koz vid che yaog.

²⁶ Yer suq i hehd haq koz vid che, "Kha nehax maq yonr che chaw teq paog, nig hehd a thoq te kuhz cheawg le," lehd koz che yaog. Kheh te lehq yawd tuag lehq muhd huh he lehq ghig bad haq ded vid che te yand taq hiax gawr ghad chehd vehr che yaog.

²⁷ I hehd teq pa and jad lehq koz che, “Chaw che ve a sug lehq nar. Muhd huh he lehq ghig bad liz yawd khuhd na che law,” lehd koz daq che yaog.

Ned geh che Gar dar raq chaw haw khaz ni ghad

²⁸ Khanr kae lehq ghig po nux ox pax awr Gar dar raq muhd mig khuhn gaeg che te yand, chaw tur phuh lo tuhaz che ned geh che haw khaz var ni ghad yawd chehd lo lag che yaog. Chaw u ve ni ghad haeg jad cag jad cheaq te lehq, yaq kaw u ve haq chaw te ghad-eg liz te tod maq pir. ²⁹ Chaw u ve ni ghad hax ceh kug ded lehq koz che, “Ghig sa ve Yad phu-og, nawg a thoq te lehq ngag nid-ag haq ca soq saq tod cheawg le. Awg yand mad gag ser liz ngag nid-ag haq du deh tug nawg lag cheawg la,” lehd koz che yaog.

³⁰ I hehd haq kheh maq ma vid daq kig huh vaq teq mor nux phoz kaz cad chehd che yaog. ³¹ Kheh te lehq, ned u ve teq pa Yer suq haq lawg khawx lehq koz che, “Nawg ngag hehd haq ca ghaq kog tod che ver, ngag hehd haq vaq u ve teq pa khuhn geh chehd cuha laoq,” lehd koz vid che yaog.

³² Kheh te lehq Yer suq ned teq pa haq koz vid che, “Tuhez lor,” lehd koz vid che yaog. Ned u ve teq pa chaw u ve ni ghad khuhn tuhaz lehq vaq mor nux khuhn gehe che te yand, vaq mor nux u ve hax khod med lo saw cex yaeq lehq ghig po khuhn pawz geh lehq a kaz saw ka suh vehr che yaog.

³³ Kheh te lehq vaq hu par teq pa med khuhn cex phaw gehe che yaog. Med khuhn chehd che chaw teq pa haq ned geh che chaw ni ghad awg lawn he lehq kha phehaq che awg lawn teq pa saw khae mar vid che yaog. ³⁴ Med yad awg gha lia tuhaz lehq Yer suq haq gha mawg daq tug lag che yaog. Yawd haq gha mawg che te yand, i hehd ve muhd mig khuhn tuhez vid tug yawd haq lawg khawx che yaog.

9

Yer suq khi kud laq kuhr suh che chaw te ghad haq ghu na vid che

¹ Yer suq huh lawd kor kawq cind kawaq lehq, yawd ved med lo gaeg che yaog. ² Awg yand u ve haq, yuhq kig khuhn yuhq chehd che khi kud laq kuhr suh vehr che chaw te ghad haq su yawd chehd lo ga taz veba lag che yaog. I hehd yonr che haq Yer suq gha mawg lehq, khi kud laq kuhr suh vehr che phad haq koz vid che, "Yad par-og, ha lehg lar-oq. Awg lawn ghod ver, nawg ved vend bax haq pong ax vehr che yaog," lehd koz vid che yaog.

³ Liq buhq var ted pehg pehar awr lehr, "Chaw che ve phad Ghig sa haq maq sawnr ma caz koz che yaog," lehz ni ma khuhn duhd chehd che yaog.

⁴ I hehd khawd-ehg kheh duhd chehd che haq Yer suq gha sir lehq koz vid che, "A thoq te nig hehd ve ni ma khuhn mad daq che awg khad haq duhd chehd cheawg le. ⁵ Khawd-ehg kheh koz vid che vawr a cehax sa hawg le. 'Nawq ved

vend bax haq pong ax vehor,’ lehd koz vid che sa hawg la. Ma hez ver, ‘Tu lehq yaq kaw tod kae lor,’ lehd koz vid che sa hawg la. ⁶ Kheh te lehq, chaw yad ve Yad phu awr lehr mig gig khod-aq lo vend bax phehd kha vid tug kand pax cawg che haq nig hehd gha sir vid tug, ngag che kheh te tug yaog,” lehd koz che yaog. Khi kud laq kuhr suh vehr che phad haq kawq koz vid che, “Tu lehq nawq ved yuhq phi haq saw taz ve lehq yehg lo koeq lor,” lehd koz vid che yaog.

⁷ Kheh te lehq, chaw u ve phad liz tuag lehq yawd ved yehg lo kawq veh che yaog. ⁸ U ve haq gha mawg che te yand chaw awg gha lia and jad lehq, chaw yad teq pa haq che kheh te gha tug kand pax pid che phad Ghig sa haq chid ir chid muh che yaog.

Yer suq Mar thehr haq kug Yug che

⁹ Yer suq u huh tuhaz che te yand, awg khawnr ghawz kig yehg khuhn mi chehd che Mar thehr meh che chaw te ghad haq yawd gha mawg che yaog. “Ngag khaz nuhr ghaq laor,” lehz yawd haq koz vid che te yand, yawd tuag lehq Yer suq khaz nuhr ghaq veh che yaog.

¹⁰ Kheh te lehq, yehg awg khuhn lo Yer suq teh cuh pad huh mi cad chehd che te yand, awg khawnr ghawz var he lehq vend bax yad teq pa kha peh lag lehq Yer suq he lehq yawd ved awg laq ghuhd teq pa geh teq geha mi cad chehd che yaog. ¹¹ Phar rir sehd teq pa u ve haq gha mawg lehq Yer suq ve awg laq ghuhd teq pa haq koz vid che, “Nig hehd ve sar lar a thoq te lehq awg khawnr ghawz var he lehq vend bax yad teq pa

geh teq geha cad cheawg le," lehd koz na ngawx che yaog.

¹² Tawd khuhd u ve haq Yer suq gha kad che te yand yawd kawq koz vid che, "Chehd sa chehd che chaw awr lehr, naz chuhd sehr phad haq maq lor. Nag che chaw teq pa lehax lor che yaog.
¹³ †'Tand tug haq ngag he gad che ma hez hawg. Har kax che ted ceng haq he gad che yaog,' lehd koz che tawd khuhd haq nig hehd sir tug ca hend ser. Awg lawn ghod ver, thed che cawd che chaw teq pa haq kug Yug tug ngag lag che ma hez. Vend bax yad teq pa haq kug Yug tug ngag lag che yaog," lehd koz vid che yaog.

Cad tug ce che awg lawn su na ngawx che

¹⁴ Awg yand u ve khuhn Yod hanr ve awg laq ghuhd teq pa Yer suq chehd lo lag lehq koz che, "Ngag hehd he lehq Phar rir sehd teq pa cad tug ce chehd liz, a thoq te lehq nawg ved awg laq ghuhd teq pa cad tug maq ce cheawg le," lehd koz na ngawx che yaog.

¹⁵ Yer suq i hehd haq koz vid che, "Awg mid ma he che phad awr lehr, khehx cad-ag che chaw teq pa geh chehd-ag huh i hehd duhd har chehd vid tuawg la. Kheh ma khuhd awg mid ma he che phad haq i hehd geh Yug phaz che awg ni cawag tug yaog. Awg yand u veaq gaeg ver, i hehd cad tug ce tug yaog.

¹⁶ Beg ke awg pir haq pha awg suhx chaw te ghad-eg liz mad Yug nehx jaw. U kheh te Yug nehx ver, nehx lar che pha awg suhx u ve dehg khuhq vehr ver, beg ke awg pir haq ghawg lehq

† 9:13 9:13 Hs 6:6

kawq pheq jad vehr tug yaog. ¹⁷ Che ve haq sur daq che yaog. Sar gig thux pu awg pir awg khuhn a pehx med ghig awg suhx chaw te ghad-eg liz mad yug ke jaw. U kheh te ke ver, sar gig thux pu awg pir peq khod cheaq te lehq, a pehx med ghig liz sez vehr lehq sar gig thux pu liz sax vehr che yaog. Kheh ma khuhd a pehx med ghig awg suhx haq yug lehq sar gig thux pu awg suhx khuhn ke ver, nid ceng cear mad lug hawg,” lehd koz vid che yaog.

Bon lawg kig awg hox ve yad mid he lehq Yer suq ve a poq awg jog med haq soz che yad mid

¹⁸ Yer suq awg lawn che ve teq pa i hehd haq koz vid chehd-ag huh, bon lawg kig awg hox te ghad yawd mehz khuhd suhr lag lehq nar khehr teh mi lar lehq koz che, “A meha heh ngag ved yad mid suh vehr che yaog. Kheh ma khuhd nawg lag lehq yawd haq laq kuhr tar vid ver yawd kawq teq tuag vehr tug yaog,” lehd koz vid che yaog.

¹⁹ Kheh te lehq, Yer suq tu lehq yawd ved awg laq ghuhd teq pa geh chaw u ve phad khaz nuhr ghaq kae che yaog.

²⁰ Awg yand u ve khuhn teq chi nid khuhq kha gag suhr yaq chehd che Yad mid te ghad Yer suq kuhr tehx nuhr phawd awr veaq lag lehq yawd ved a poq awg jog med haq khuhd soz che yaog.

²¹ Awg lawn ghod ver, “Ngag yawd ved a poq awg jog med nehax haq lehax gha soz liz, ngag na vehr tug yaog lehz,” Yawd ved ni ma khuhn duhd che yaog.

²² Yer suq kuhr phuhz ngawx lehq yawd haq mawg che te yand, "Yad mid-og, ha lehg chehd-og. Nawg yonr che ted ceng haq te lehq nawg na vehr che yaog," lehd koz vid che yaog. Teq pear lehax yad mid u ve liz na vehr che yaog.

²³ Bon lawg kig awg hox ve yehg khuhn Yer suq gaeg che te yand, tehd lehd koeg mez che chaw teq pa he lehq chaw kha peh nux maz diz diz huhd huhd he lehq phoz hung chehd che haq yawd gha mawg che yaog. ²⁴ Kheh te lehq yawd i hehd haq koz vid che, "Awg gha lia saw tuhez. Yad mid nehax che ve suh vehr che ma hez hawg. Yawd yuhq mir ka chehd cheawg," lehd koz vid lehq, su yawd haq ga ghig che yaog. ²⁵ Chaw u ve teq pa haq saw ghaq tuhz pe peg lehq, yawd gehe lehq yad mid nehax u ve laq kuhr haq yug lehq yad mid nehax u ve liz tuag che yaog. ²⁶ Kheh te lehq awg lawn u ve muhd mig u ve khuhn awg kag gha lia lo buhg veh che yaog.

Mehz cox var ni ghad mehz mawag che

²⁷ Yer suq u huh tu lehq kae che te yand, mehz cox var ni ghad liz yawd khaz nuhr ghaq kae lehq, "Dar viq ve Yad phu-og, ngag nid-ag haq a cehax har kax laoq," lehd koz kug chehd che yaog.

²⁸ Yer suq yehg khuhn gehe che te yand, mehz cox var u ve ni ghad yawd chehd lo kae che yaog. Yer suq ix mag haq na che, "Ngag nig mag ved mehz sir ghu te mawg ax gha hawg lehz yonr chehd-aq la," lehd koz na ngawx che yaog. "Yonr chehd-aq, Jawd mawd-og," lehz ix mag kawq koz vid che yaog.

29 Kheh te lehq ix mag ved mehz sir haq yawd vad lar lehq, "Nig mag yonr che heh te lehq nig mag haq phehaq vid-oq," lehd koz vid che yaog.
30 Kheh te lehq ix mag mehz kawq mawg vehr che yaog. Yer suq ix mag haq koz vid che, "Awg lawn che ve haq chaw te ghad-eg liz taq sir vid," lehd koz tawd pid che yaog.

31 Kheh ma khuhd ix mag tuhez lehq Yer suq ve awg lawn muhd mig u ve khuhn awg kag gha lia lo ca kaod koz tod che yaog.

Chaw kar var te ghad tawd kawq yaw gha che

32 Ix mag tuhz veh tod-ag huh ned geh che chaw kar var te ghad haq su Yer suq chehd lo sir veba lag che yaog. **33** Ned haq ghaq kog peg lehq chaw kar u ve tawd yaw gha vehr che yaog. Chaw mor nux kheh ma ve and jad lehq koz che, "Id sar rer laq chaw teq pa awg khuhn liz che kheh taw taw maq ve mad mawg jaw ser," lehd koz daq che yaog.

34 Kheh ma khuhd Phar rir sehd te pa koz che, "Yawd ned jawd mawd ve kand pax haq yehd lehq ned haq ghaq kog che yaog," lehd koz che yaog.

Yer suq muhd mig yad teq pa haq har kax che

35 Awg yand u ve khuhn awg pad awg ki huh cawg che med he lehq khaz teq pa awg khuhn Yer suq yawd kae lehq bon lawg kig awg khuhn Ghig sa ve muhd mig haq caz daq che ha lehg che bon khuhd ca mar vid lehq nag guhg chehd che chaw nag a nar teq pa awg ceng gha lia haq liz, yawd saw ghu na vid che yaog. **36** Chaw kha peh vad-ag haq Yer suq yawd gha mawg che te yand,

yawd chaw u ve teq pa haq har kax che yaog. Awg lawn ghod ver, i hehd teq pa awr lehr yawg huhx var mad cawg che yawg heh te lehq, ni ma soq saq jad lehq awg ghad nud jad chehd che yaog. ³⁷ Kkeh te lehq yawd ved awg laq ghuhd teq pa haq yawd koz vid che, "A cag ghiq tug cawg mad jad chehd liz, a cag ghig var a cehax lehax cawg che yaog. ³⁸ Kkeh te cheaq te lehq, yawd ved a cag ghiq kig lo a cag ghiq var teq pa har naq lag peha vid tug, Awg sehr phad geh bon lawr-oq," lehd koz vid che yaog.

10

Yer suq awg laq ghuhd teq chi ni ghad haq kug yug che

¹ Yer suq yawd ved awg laq ghuhd teq chi ni ghad haq kug yug lehq ned chaq chiz teq pa haq ghaq kog lehq nag guhg chehd che a nar awg ceng gha lia haq ghu na vid tug yawd i hehd teq pa haq kand pax pid che yaog. ² Che ve awr lehr, awg laq ghuhd teq chi ni ghad ve awg meh yaog. Awg kawd te ghad, Per troq lehd koz che Sid monr he lehq yawd ved awg nax var Anr drehr, Yer ber dehd ve awg yad par Yar koq he lehq yawd ved awg nax var Yod hanr, ³ Phid liq he lehq Bar thawd lar mehd, Thod maq he lehq awg khawnr ghawz var Mar thehr, Ar lar phehd ve awg yad par Yar koq he lehq Thar dehd, ⁴ muhd mig haq haq che awg mor khuhn ve Sid monr he lehq Yer suq haq chid aq vid che phad Yud daq Id sar kar rir oq teq pa yaog.

Awg laq ghuhd teq chi ni ghad haq kae pe che

⁵ Yer suq awg laq ghuhd che ve teq chi ni ghad haq kae pe lehq, i hehd haq koz vid che, "Bid saz a naz chaw teq pa chehd kig lo taq kae. Sar mar riq chaw teq pa ve med khuhn liz taq gehe. ⁶ Kheh ma khuhd mehx vehr che yawg teq pa heh phehq che Id sar rer laq chaw ceng geh lo kae. ⁷ Kae lehq, 'Muhd nuh maq muhd mid lag gag vehr tez-or,' lehd koz lehq bon ca mar vid-eq. ⁸ Kheh te lehq, chaw nag teq pa haq liz ca ghu na vid-eq. Suh vehr che chaw teq pa haq liz kawq te teq vid-eq. Khir tuq a nar kex che chaw teq pa haq liz daq kehg vid tug te vid-eq. Ned teq pa haq liz ghaq kog vid-eq. Kand pax che ve haq nig hehd kheha gha che heh te lehq su haq liz kheha ca kawq ga vid-eq. ⁹ Nig hehd kae che te yand, nig hehd ve laq sax khuhn phu, si, pehq sanr teq pa ta doz ve kae. ¹⁰ Kheh te lehq, yaq kaw kanr huh lor ver yehd tug awg pun, laq sax, beg ke veq kad, khi noz he lehq jud fir tag liz tad Yug ve kae. Awg lawn ghod ver kanx te che chaw awr lehr, cad tug dawg tug haq gha cad cawd che yaog.

¹¹ Nig hehd teq pa med khar ve ted kag khuhn lehd ma koz, khaz khar ve ted kag khuhn lehd ma koz gehe che te yand, nig hehd teq pa haq ha lehg ha ka haq yug ax gad che chaw ve yehg haq ca na ngawx lehq, med u ve khuhn ma tuhz kae ser che kheh ceh u huh taq hiax chehd lar. ¹² Yehg khuhn gehe che te yand Ghig sa ve awg bon i hehd haq naq vid-oq. ¹³ Yehg u ve khuhn nawg haq ha lehg ha ka haq yug ax ver, Ghig sa ve awg bon yehg ka u ve khuhn cawg vehr che yaog. Kheh ma khuhd yehd ka u ve nawg

haq mad haq yug ax ver, Ghig sa ve awg bon u ve nawg chehd lo kawaq vehr tug yaog. ¹⁴ Kheh te lehq, nawg haq mad haq yug ax lehq nawg ved tawd khuhd haq maq na yug ver, yehg u ve khuhn lehd ma koz, med u ve khuhn lehd ma koz, tuhez thad ver, khi ho haq hehr chehd che jeq mia u ve haq phi kha lar haz-oq. ¹⁵ Ngag nig hehd haq awg cehg mag koz ax laq, suhx jehg suhx taz che awg ni gaeg ver, med u ve awr lehr Sawd donr he lehq Kawd mod raq med haq keh liz gha khanr jad tug yaog.

Du deh che haq gha khanr che

¹⁶ Yawg nehax haq heh phid mor nux khuhn lo kae pea che heh te lehq, ngag nig hehd haq kae pea che yaog. Kheh te cheaq te lehq vig heh te lehq cud yiq gha cawg lehq, a pia heh te lehq su haq mad yaq vix che chaw heh teoq. ¹⁷ Chaw yad teq pa haq sa tiq kha nehax taoq. Awg lawn ghod ver, i hehd awr lehr, suhx jehg suhx taz var teq pa mehz khuhd suhr lo nig hehd haq pheh ve suhx jehg suhx taz lehq i hehd ve bon lawg kig awg khuhn nig hehd haq jawq tug yaog. ¹⁸ Ngag haq te lehq, nig hehd haq muhd mig jawd mawd he lehq jawd mawd nux teq pa mehz khuhd suhr lo su yug ve kae tug yaog. I hehd teq pa ve mehz khuhd suhr he lehq bid saz a naz chaw teq pa mehz khuhd suhr nig hehd ngag awg lawn sax khiz gha khanr tug yaog. ¹⁹ Su nig hehd haq pheh che te yand nig hehd tawd khawd kheh gha koz yaw tug ta duhd har. Awg yand u ve khuhn gaeg ver, tawd khawd kheh gha koz gha yaw tug nig hehd haq sir ax tug yaog. ²⁰ Awg lawn ghod ver,

tawd yaw sehr pha vawr nig hehd ma hez hawg.
Nig hehd ve Awr pa ve Awg ha phu awr lehr, nig
hehd haq cud lehq tawd yaw tuhz peha tug yaog.

²¹ A vix a nax te ghad he lehq te ghad suh tug chid aq daq tug yaog. Awr pa liz a sug yawd ved yad haq suh tug chid aq daq tug yaog. Yad teq pa liz, a sug yawd ved awr pa awr ye haq kawq phuhz lehq dawz vehr tug yaog. ²² Ngag ved awg meh haq te lehq, chaw awg gha lia nawg haq cand tug yaog. Kheh ma khuhd awg leh med kha gag yeg chehd che chaw teq pa awr lehr, thaer khuhq che haq gha tug yaog. ²³ Med te med khuhn su nawg haq du deh ax ver, awg kag awg nuz awr ve med lo phaw eq. Ngag nig hehd haq awg cehg mag koz ax laq, Id sar rer laq ve med teq pa haq nig hehd kae che mad peg tand chaw yad ve Yad phu lag gag vehr tug yaog.

²⁴ Awg laq ghuhd awr lehr yawd ved sar lar haq keh maq ir hawg. Awg ceg liz yawd ved awg sehr phad haq keh maq ir hawg. ²⁵ Awg laq ghuhd awr lehr yawd ved sar lar haq sur lehq, awg ceg liz yawd ved awg sehr phad haq sur ver, ni khaz suh cawd vehr che yaog. Su yehg sehr phad haq, ‘Ber sar bud laq,’ lehd koz ver, yawd ved yehg yad ka yad teq pa haq cheaq keh liz lex lehq koz tug ma hez hawg la.

A sug haq kuhz cawd che awg lawn

²⁶ Kheh te lehq i hehd haq ta kuhz. Awg lawn ghod ver kha hoz beh lar che awg ceng gha lia liz maq gha saw pheq tuhz lehq kha khuhd ceh lar che awg ceng gha lia liz maq sir gha tug teq chaweh mad cawg. ²⁷ Ngag nig hehd haq awg

naz tud te kig huh koz ax che awg ceng teq pa awr lehr, awg ghiz pawd kig lo kawq koz vid-oq. Nig hehd haq a yax yax khuhd sad ax che awg ceng teq pa awr lehr, yehg thag lo taez lehq su haq hax ceh nux kug lehq koz vid-oq. ²⁸ Awg ton haq dawz vehr gha liz nawg ved co ha haq dawz vehr maq gha che chaw haq ta kuhz. Kheh ma khuhd muhd naz hoq khuhn co ha haq liz awg ton haq liz te lug gha che phad haq kuhz lor. ²⁹ Jar mead nehax nig kheh ted pehq phuhad lehax huhd che liz, nig hehd ve awr pa ve a lor ma cawd ver, teq kheha liz mig giaq lo cheag mad gag hawg. ³⁰ Nawg ved a kor haq ve cuhz kheh muh nehax awg kheh gha lia haq liz, yawd saw ghawn ngawx lar peor. ³¹ Kheh te cheaq te lehq ta kuhz. Jar mead awg mor nux u ve teq pa haq keh nig hehd awr lehr awg phuhd khaz jad che yaog.

Chaw yad mehz khuhd suhr Khreq haq khanr yug che

³² Chaw khar ve te ghad lehd ma koz, chaw yad mehz khuhd suhr ngag haq khanr yug ver, muhd nuh maq lo chehd che ngag ved Awr pa mehz khuhd suhr ngag liz yawd haq khanr yug tug yaog. ³³ Kheh ma khuhd chaw khar ve te ghad lehd ma koz, chaw yad mehz khuhd suhr ngag haq chid bag ver, muhd nuh maq lo chehd che ngag ved Awr pa meh khuhd suhr ngag liz yawd haq chid bag tug yaog.

Cawd daq hawr daq tug awg pun lag che ma hez

³⁴ Mig gig thag huh cawd daq hawr daq tug awg pun ngag lag cheawg lehd ta duhd. Cawd daq hawr daq tug awg pun ngag lag che ma hez hawg. A dax haq ngag yug veha lag che yaog. ³⁵ †Awg lawn ghod ver, yad par he lehq yawd ved awr pa, yad mid he lehq yawd ved awr ye, awg khed ma he lehq yawd ved awr pi ma teq pa, te ghad he lehq te ghad ma cawd daq vid tug ngag lag che yaog. ³⁶ A sug yawd ved cand par awr lehr a sug yawd ved yehg yad ka yad teq pa phehq tug yaog.

³⁷ Ngag haq haq cheaq keh, a sug yawd ved awr pa awr ye haq haq che chaw te ghad awr lehr ngag ved awg laq ghuhd te maq kenr. Ngag haq haq cheaq keh a sug yawd ved yad par yad mid haq haq che chaw te ghad awr lehr, ngag ved awg laq ghuhd te maq kenr. ³⁸ A sug yawd ved laq kan haq taz lehq ngag khaz nuhr mad ghaq che chaw te ghad awr lehr, ngag ved awg laq ghuhd te maq kenr. ³⁹ A sug yawd ved a saq gha pong tug te che chaw te ghad awr lehr, a saq gha sond tug yaog. Kheh ma khuhd ngag awg pun a sug yawd ved a saq haq sond che chaw te ghad awr lehr, a saq haq kawq gha tug yaog.

Awg bon gha che

⁴⁰ Nig hehd haq haq yug che chaw awr lehr, ngag haq liz haq yug che yaog. Kheh te lehq ngag haq haq yug che chaw awr lehr, ngag haq lag peha che phad haq liz haq yug che yaog. ⁴¹ Chaw te ghad Ghig sa ve cuh kar var phehq cheaq te lehq, su yawd haq haq yug ver, haq yug che phad

† 10:35 10:35-36 Mkh 7:6

liz cuh kar var haq kha sur suar Ghig sa geh laq sawnr gha tug yaog. Chaw te ghad thed che cawd che chaw phehq cheaq te lehq, su yawd haq haq yug ver, haq yug che phad liz thed che cawd che chaw te ghad haq kha sur suar Ghig sa geh laq sawnr gha tug yaog. ⁴² Chaw khar ve te ghad lehd ma koz, ngag ved awg laq ghuhd awg khuhn i jad che chaw te ghad haq a kaz gawg maq te kawz taw vid ver, taw vid che phad awr Lehr, awg bon ma sond tug yaog lehz, ngag nig hehd haq awg cehg mag koz ax che yaog,” lehd Yer suq koz che yaog.

11

Yer suq he lehq Yod hanr a kaz tur var awg lawn

¹ Yer suq awr Lehr, yawd ved awg laq ghuhd teq chi ni ghad haq mar vid peg lehq u huh tuhez lehq Gar liq lehd muhd mig khuhn cawg che med teq pa khuhn bon ca mar vid tug kae che yaog.

² Yod hanr thawnr khuhn geh chehd-ag huh, Khreq te chehd che kanx teq pa awg lawn gha kad lehq yawd ved awg laq ghuhd teq pa haq ca na ngawx pe lehq, ³ “Nawg awr Lehr, lag tug chaw u ve te ghad yaog la. Ma hez ver, awg kag awg nuz awr ve chaw te ghad haq ngag hehd gha law ser tuawg la,” lehz yawd haq ca na ngawx pe che yaog.

⁴ Yer suq i hehd haq kawq koz vid che, “Nig hehd kha gha kad lehq kha gha mawg che awg ceng teq pa Yod hanr haq ca kawq koz vid-eq.

⁵ Mehz cox che chaw mehz mawg gha che, khi lug che chaw teq pa yaq kaw tod gag che, khir

tuq kex che chaw teq pa daq kehg vehr che, nar puh ma kad che chaw teq pa nar puh kad vehr che, suh vehr che chaw teq pa kawq teq tuag lehq chaw har chaw ghuhd yad teq pa liz ha lehg che bon khuhd haq gha kad che yaog. ⁶ Ngag te che awg ceng haq ma nez nag che chaw teq pa awr lehr, awg bon ir che yaog,” lehd koz vid che yaog.

⁷ Yod hanr ve awg laq ghuhd teq pa kawq veh tod-ag huh, Yer suq awr lehr Yod hanr ve awg lawn chaw mor nux haq koz vid che, “Nig hehd heh pir lo awg nar nuh awg god khehz teag lo a thoq ca ngawx-eg cheawg le. Pund cehg haq muhd huh mez lehq aw taz aw yaq te chehd che haq la. ⁸ Ma hez ver, a thoq haq ca ngawx-eq tug kae cheawg le. Nud-u ghad te che beg ke veq che chaw haq la. Nud-u ghad te che beg ke veq che chaw teq pa awr lehr, Jawd mawd ve hawx yehg khuhn chehd che yaog. ⁹ Ma hez ver, a thoq haq ca ngawx-eg tug kae cheawg le. Ghig sa ve cuh kar var haq la. Yaog. Ghig sa ve cuh ka var haq ca ngawx-eg che yaog. Yawd awr lehr Ghig sa ve cuh kar var teq pa haq keh ir che chaw te ghad yaog, lehz ngag nig hehd haq koz ax che yaog.

¹⁰ †'Ngawx lor, nawg haq keh awg kawd
nawg ved yaq kaw haq ghu te tug
ngag ved cuh yad haq ngag kae pe tug yaog,’
lehd koz buhq lar che awr lehr yawd haq koz che yaog. ¹¹ Ngag nig hehd haq awg cehg mag koz ax laq, mig gig khod-aq yad mid geh kha pawag che chaw yad teq pa khuhn, a kaz tur vid var Yod hanr haq keh ir che chaw te ghad-eg liz mad

cawg ser. Kheh ma khuhd muhd nuh maq muhd mig awg khuhn su haq keh i che chaw te ghad liz, yawd haq keh ir ser che yaog. ¹² A kaz tur var Yod hanr kanx tanr te che awg ni haq tanr lehq yaq ni kha gag, muhd nuh maq ve muhd mig haq hax ceh nux bawz daq lehq chaw khawr maq te che chaw teq pa hinx yug ve vehr che yaog. ¹³ Awg lawn ghod ver Ghig sa ve cuh kar var awg gha lia he lehq Mod ser ve awg lid tawd khuhd liq awr lehr, Yod hanr ve awg coaq lo kha gag Ghig sa ve muhd mig lag tug awg lawn koz mar lar che yaog. ¹⁴ Nig hehd na yug gad ver, chaw che ve awr lehr, lag lawg ghod che Ed lid yaq u ve phad yaog. ¹⁵ Kad tug nar puh cawg che chaw teq pa kha sehax naoq.

¹⁶ Chaw a meha teq co ve haq a thoq maq vawr, gha yug tehz mar vid tug lehq nar. Chaw a meha teq co ve awr lehr, chaw yad nehax heh te lehq kax khuhn mi lar lehg kug daq lehq koz che,

¹⁷ 'Nig hehd awg pun ngag hehd nuhr mez liz nig hehd ka ma khez.

Ngag hehd paz huhg kehd huhg chehd liz, nig hehd ma duhd har,'

lehd koz daq che yaog. ¹⁸ Awg lawn ghod ver, Yod hanr lag lehq ma cad mad dawg cheaq te lehq, su 'Yawd haq Ned geh che yaog,' lehd koz che yaog.

¹⁹ Chaw yad ve Yad phu lag lehq cad che dawg che haq te lehq, 'Chaw che ve awr lehr, cad lex dawg lex che chaw, a pehx med ghig dawg pong dawg lex che chaw, awg khawnr ghawz var he lehq vend bax yad teq pa haq awg chawd te che chaw yaog,' lehz su kawq koz che yaog. Kheh ma khuhd cud yiq ma yiq ted ceng awr lehr, yawd te

che kanx teq pa awg khuhn cawd ma cawd che haq su gha mawg gha sir che yaog," lehd Yer suq koz che yaog.

Vend bax haq ma duhd phuhz che chaw teq pa gha duhd har jad tug yaog

²⁰ Kheh te lehq, Yer suq yawd and tug ir che kanx awg ceng teq pa te mar vid peg che med teq pa awr lehr, i hehd vend bax haq ma duhd phuhz cheaq te lehq Yer suq i hehd haq ded mar lehq koz che, ²¹ "Khawd rar senr med-og, nawg liz gha duhd har jad tug yaog. Ber sehd daq med-og, nawg liz gha duhd har jad tug yaog. Awg lawn ghod ver, nig hehd awg khuhn te peg che and tug ir jad che kanx teq pa awr lehr, Tud ruq med he lehq Sid donr med khuhn te che heh ver, i hehd awr lehr a mig thad lo thux pu pha haq veq deh lar lehq khuhq ha toz puhr lehq vend bax duhd phuhz tug yaog. ²² Ngag nig hehd haq koz ax laq, suhx jehg suhx taz che awg ni gaeg ver, Tud ruq med he lehq Sid donr med awr lehr, nig hehd kheh taw maq maq gha khanr hawg. ²³ Kar per nar unr med-og, nawg haq vawr muhd nuh maq lo kha gag chid taz ax lawg lehd ta duhd. Nawg awr lehr, suh muhd mig lo kha gag chid bag yaq pe tug yaog. Awg lawn ghod ver, nawg awg khuhn te peg che and tug ir che kanx teq pa Sawd donr med khuhn te che heh ver, med u ve awr lehr yaq ni kha gag cawg chehd ser tug yaog. ²⁴ Ngag nig hehd haq koz ax laq, suhx jehg suhx taz che awg ni gaeg ver, Sawd donr med awr lehr nig hehd kheh taw maq toq maq gha khanr hawg," lehd koz vid che yaog.

Ngag geh ghad ca jehd laoq

²⁵ Awg yand u ve khuhn, Yer suq koz che, "Muhd nuh maq he lehq mig naz ma haq uq penr sehr phad A pa-og, cud yiq cawg che chaw he lehq sir vix che chaw teq pa haq awg lawn che ve nawg khuhd ceh lar lehq chaw yad nehax heh te lehq teq chaweh maq sir che chaw teq pa haq nawg pheq mar vid cheaq te lehq ngag nawg haq chid muh che yaog. ²⁶ A pa-og, che ve awr lehr, nawg a lor cawd che yaog.

²⁷ Ngag ved Awr pa awr lehr awg ceng gha lia ngag haq saw chid aq ax lar peor. Awr pa ma hez ver, Yad phu haq su te ghad-eg liz maq sir. Yad phu he lehq Yad phu pheq mar vid gad che chaw haq ma hez ver, Awr pa haq te ghad-eg liz maq sir.

²⁸ Kanx te heg lehq med nged puhd huhd che chaw awg gha lia ngag chehd lo laor. Ngag nig hehd haq ghad jehd vid tug yaog. ²⁹ Ngag ved taz tug haq taz lehq ngag geh hend yug laoq. Awg lawn ghod ver ngag awr lehr, ni ma nud nud nehg nehg cawg lehq nig hehd ve ni ma liz ghad gha jehd tug yaog. ³⁰ Awg lawn ghod ver ngag ved taz tug taz sa lehq ngag ved awg veg liz lawg che yaog," lehd koz che yaog.

12

Sa ba to awg ni haq awg laq ghuhd teq pa cag no chehz cad che

¹ Awg yand u ve haq Yer suq awr lehr Sa ba to awg ni* haq ha khuhn phanr kae cawd che yaog. Yawd ved awg laq ghuhd teq pa awr meq jad lehq cag no chehz lehq cag sir pex cad che yaog. ² Phar rir sehd teq pa gha mawg lehq, "Ngawx-oq, Sa ba to awg ni awg khuhn maq te kenr maq te cawd che awg ceng haq nawg ved awg laq ghuhd teq pa te chehd che law," lehz i hehd teq pa Yer suq haq koz vid che yaog.

³ Yer suq i hehd teq pa haq kawq koz vid che, "Dar viq he lehq yawd ved awg chawd teq pa awr meq vehr che te yand i hehd khawd-ehg kheh te che awg lawn haq nig hehd maq ghawn jaw lehq la. ⁴ Yawd Ghig sa ve yehg khuhn gehe lehq yawd awg ton liz yawd ved awg chawd teq pa liz cad maq kenr cad ma cawd che paw khod nux teq pa lehax cad kenr cad cawd che tand lar che khaor mod haq phoz cad che ma hez hawg la. ⁵ Ma hez ver, Sa ba to awg ni haq bon yehg nux awg khuhn paw khod teq pa Sa ba to awg ni ve awg lid haq te yaq vehr liz, i hehd vend bax maq tar che awg lawn haq Mod ser ve awg lid tawd khuhd awg khuhn nig hehd maq gha ghawn jaw la. ⁶ Ngag nig hehd haq koz ax laq, bon yehg nux haq keh ir che chaw te ghad chuhr huh chehd chehd che yaog. ⁷ † "Tand tug haq ngag he gad che ma hez hawg. Har kax che ted ceng haq ngag he gad che yaog,' lehd koz lar che tawd khuhd u ve haq nig hehd na gha heh ver, vend bax mad cawg che chaw che ve teq pa haq nig hehd vend bax tar

* **12:1** 12:1 Sa ba to awg ni Teq sinx awg khuhn awg leh med teq ni he lehq daq kehg che awg ni sawr lehq Ghig sa haq chid muh che awg ni. † **12:7** 12:7 Hs 6:6

tug ma hez. ⁸ Awg lawn ghod ver chaw yad ve Yad phu awr lehr Sa ba to awg ni ve Jawd mawd phehq che yaog," lehd koz vid che yaog.

Laq kuhr teq pax suh vehr che chaw awg lawn

⁹ Yawd u huh tuhz kae lehq i hehd ve bon lawg kig khuhn gehe che yaog. ¹⁰ U huh laq kuhr teq pax suh vehr che chaw te ghad cawg che yaog. I hehd Yer suq haq vend bax tar tug, "Sa ba to awg ni awg khuhn su haq ghu na vid cawd hawg la," lehz i hehd yawd haq na ngawx che yaog.

¹¹ Yer suq i hehd haq kawq koz vid che, "Nig hehd awg khuhn ve chaw te ghad ghad ve yawg teq kheh cawg lehq, Sa ba to awg ni khuhn yawg u ve teq kheh mig kor khuhn che geh chehd lawz ver, mad yug tuhz vid hawg la. ¹² Chaw yad awr lehr, yawg haq keh awg phuhd khaz jad che yaog. Kheh te cheaq te lehq, Sa ba to awg ni khuhn daq che awg ceng te che awg lid haq mad yaq hawg," lehd koz vid che yaog. ¹³ Kheh te peg lehq Yer suq laq kuhr teq pax suh vehr che phad haq koz vid che, "Nawg ved laq kuhr che peha," lehd koz vid che yaog.

Yawd laq kuhr che peha che te yand, yawd ved laq kuhr na vehr lehq teq pax awr ve heh te lehq kawq daq vehr che yaog. ¹⁴ Awg yand u ve khuhn Phar rir sehd teq pa tuhez lehq Yer suq haq khawd-ehg kheh te ver dawz vehr gha tug jehg daq che yaog.

Ghig sa lez yug lar che awg ceg te ghad

¹⁵ Kheh te lehq awg lawn u ve haq Yer suq juhg vehr lehq, yawd u huh tuhz vehr che yaog. Chaw kha peh vad-ag yawd khaz nuhr ghaq kae

lehq i hehd teq pa awg gha lia haq yawd ghu na vid che yaog. ¹⁶ Yawd ved awg lawn su haq maq gha koz mar vid tug i hehd teq pa haq yawd tawd kha sehax yaw lehq sa tiq pid lar che yaog.

¹⁷ Awg lawn che ve awr lehr cuh kar var Id sar yaq koz lar che tawd khuhd u ve awg cehg mag phehaq tug awg pun te che yaog. Yawd koz lar che tawd khuhd awr lehr,

¹⁸ †“Ngag lez Yug lar che ngag ved awg ceg te ghad haq ngawx-oq.

Yawd haq ngag ni khaz suh jad lehq haq jad che yaog.

Ngag ved Awg ha phu yawd haq pid lehq thed cawd che khuhn suhx jehg tug awg lawn

Yud daq chaw ma hez che awg gha lia haq yawd koz mar vid tug yaog.

¹⁹ Tawd ghawg daq lehq awg khuhd hehnd che te ceng yawd maq te.

Yaq kaw kanr lo chaw te ghad-eg liz yawd ved awg khuhd haq maq gha kad.

²⁰ Awg cehg mag thed che cawd che khuhn suhx maq gha jehg maq gha taz ser che kheh ceh,

theh kax chehd che pund cehg haq yawd maq uhx chid bag.

A mir khehd awg caz nehax ye yea he lehq toq chehd che haq yawd mad Yug suh.

²¹ †Yawd awr lehr chaw ceng awg ga lia ve duhd law kig phehq che yaog,”

lehd koz lar che yaog.

Yer suq ve kand pax Ghig sa geh lag che

† **12:18** 12:18-20 Isy 42:1-3 † **12:21** 12:21 Isy 42:4

22 Awg yand u ve khuhn ned geh che haq te lehq mehz cox vehr lehq kar che chaw te ghad haq su Yer suq chehd lo sir veba lag che yaog. Yawd chaw kar u ve haq ghu na vid cheaq te lehq chaw kar u ve tawd yaw gha lehq mehz mawg vehr che yaog. **23** Kheh te lehq chaw mor nux teq pa and jad lehq koz daq che, "Chaw che ve phad Dar viq ve yad ma hez hawg la," lehd koz daq che yaog.

24 Kheh ma khuhd, Phar rir sehd teq pa gha kad che te yand, "Chaw che ve phad awr lehr ned jawd mawd Ber sar bud laq[†] ve kand pax haq cud lehq ned teq pa haq ghaq kog che yaog," lehd koz daq che yaog.

25 I hehd duhd chehd che haq Yer suq gha sir lehq i hehd haq koz vid che, "Ma cawd maq hawr daq che muhd mig awg mag gha lia gha lug gha sez tug yaog. Ma cawd maq hawr daq che med he lehq yehg ka teq pa liz ca yeg chehd maq gha hawg. **26** Kheh te lehq, Sar tanr awr lehr, Sar tanr chawd chawad ghaq kog daq ver, I hehd khad nawad phaz daq tuq te daq che yaog. Kheh te cheaq te lehq, i hehd ve muhd mig khawd-ehg kheh te yeg chehd ghag hawg le. **27** Ngag awr lehr, Ber sar bud laq haq cud lehq ned teq pa haq ghaq kog che law lehd koz ver, nig hehd ve yad teq pa a sug ved kand pax haq cud lehq ghaq kog cheawg le. Kheh te ver, i hehd awr lehr nig hehd haq suhx jehg suhx taz var phehq vehr che yaog. **28** Kheh ma khuhd, ngag awr lehr Ghig sa ve Awg ha phu haq cud lehq ned teq pa haq ghaq

[†] **12:24** 12:24 Ber sar bud laq Sar tanr haq koz che yaog.

kog che ver, Ghig sa ve muhd mig nig hehd geh lag gag vehr che yaog.

²⁹ Awg ghad hehnd jad che chaw te ghad haq mad yug pheh teh lar ser ver, yawd ved yehg khuhn gehe lehq yawd ved med nged jeg kor haq a sug hinx yug gha tuawg le. Awg ghad hehnd jad che chaw haq pheh teh lar peg heh, yawd yehg khuhn gehe lehq yawd ved med nged teq pa haq hinx yug gha che yaog.

³⁰ Ngag phawd awr ma chehd che chaw awr lehr, ngag ved cand par phehq che yaog. Ngag geh ma ghawz phoz che chaw teq pa awr lehr, ghawz fong che chaw phehq che yaog. ³¹ Kheh te lehq ngag nig hehd teq pa haq koz ax laq, chaw yad te yaq che vend bax teq pa awg ceng gha lia he lehq Ghig sa haq maq sawnr ma caz koz gid che awg ceng gha lia haq vend bax phehd vid gha che yaog. Kheh ma khuhd, Daq kehg che Awg ha phu haq maq sawnr ma caz koz che chaw teq pa haq Ghig sa vend bax ma phehd vid hawg. ³² Chaw yad ve Yad phu haq maq sawnr ma caz koz gid che chaw a sug te ghad lehd ma koz, yawd ved vend bax haq phehd vid gha che yaog. Kheh ma khuhd, Daq kehg che Awg ha phu haq maq sawnr ma caz koz gid che chaw a sug te ghad lehd ma koz, a meha ve teq co haq liz he lehq awg khaz nuhr ve te co haq liz yawd ved vend bax haq phehd vid maq gha hawg.

Awg cehg daq ver awg sir liz daq che

³³ Awg cehg daq ver, awg sir liz daq che yaog. Awg cehg mad daq ver, awg sir liz mad daq che yaog. Awg lawn ghod ver awg sir haq te lehq

awg cehg haq sir gha che yaog. ³⁴ Vig haeg ve awg yad teq paog, nig hehd chaw haeg phehq lar cheaq te lehq daq che tawd khuhd haq khawdehg kkeh te yaw ghag le. Awg lawn ghod ver ni ma awg khuhn kha peh cawg chehd che heh te lehq mawq kaw khuhn liz awg ceng u ve teq pa haq yaw tuhz peha che yaog. ³⁵ Daq che chaw awr lehr, a sug yawd ved ni ma khuhn cawg lar che daq che awg ceng haq lehax yaw tuhz peha che yaog. Kkeh te lehq haeg che chaw teq pa awr lehr, a sug yawd ved ni ma khuhn cawg lar che heh te lehq haeg che awg ceng haq yaw tuhz peha che yaog.

³⁶ Ngag nig hehd haq koz ax laq, suhx jehg suhx taz che awg ni u ve huh gaeg ver, chaw awg gha lia awr lehr awg bon mad cawg che tawd khuhd kha yaw lar che teq pa haq gha kawq koz mar vid tug yaog. ³⁷ Awg lawn ghod ver, nawg ved tawd khuhd haq te lehq nawg vend bax tar che haq gha pong lehq, nawg ved tawd khuhd haq te lehq nawg cir yanr che haq liz gha khanr tug yaog."

Haeg che chaw teq pa and tug awg hez haq lehax lawg che

³⁸ Awg yand u ve khuhn liq buhq var he lehq Phar rir sehd teq pa Yer suq haq koz vid che, "Sar lar-og, nawg te mar lar che awg hez teq ceng ceiar haq ngag hehd mawg gad che yaog," lehd koz vid che yaog.

³⁹ Yawd i hehd haq kawq koz vid che, "Haeg lehq hax chawd hax paz te che chaw heh te lehq Ghig sa haq ma yawz maq yan che chaw che ve

teq co awr lehr, awg hez haq lawg che yaog. Cuh kar var Yod naq ve awg hez ma hez ver, awg kag awg nuz awr ve awg hez chaw che ve teq co haq maq te mar vid. ⁴⁰ †Yod naq awr lehr, ngad nux maz ux peg khuhn sehr ni sehr hax gha chehd che heh te lehq chaw yad ve Yad phu liz, mig kor khuhn sehr ni sehr hax gha chehd tug yaog. ⁴¹ Suhx jehg suhx taz che awg ni haq gaeg ver, Nid nar ver med yad teq pa awr lehr, chaw a meha teq co haq ve chaw geh teq geha tuag lehq chaw a meha teq co ve haq vend bax tar tug yaog. Awg lawn ghod ver, Yod naq bon mar che haq te lehq, i hehd a sug yawd ved vend bax haq duhd phuhz che yaog. Kheh ma khuhd, a meha chuhr huh Yod naq haq keh ir che te ghad chehd chehd liz, nig hehd vend bax haq ma duhd phuhz che yaog. ⁴² Suhx jehg suhx taz che awg ni haq ver, awg huhx muhd mig lo chehd che jawd mawd ma liz a meha teq co ve chaw geh teq geha tuag lehq chaw a meha teq co ve haq vend bax tar tug yaog. Awg lawn ghod ver, yawd Sawd laq monr ve cud yiq haq na tug mig gig awg leh med lo tu lehq lag che yaog. Kheh ma khuhd, a meha chuhr huh Sawd laq monr haq keh ir che te ghad chehd chehd liz, nig hehd yawd khuhd maq na yug che yaog.

Ned chaq chiz teq kheh kawq kawaq che

⁴³ Ned chaq chiz teq kheh chaw te ghad awg khuhn tuhez lehq a kaz mad cawg lehq awg god khehz teag lo ca koad kae lehq ghad jehd kig ca kaod ngawx-eg liz ca mad mawg che te

yand, ⁴⁴ yawd koz che, ‘Ngag tuhaz che ngag ved yehg lo kaw koeq sar,’ lehd koz lehq yawd kawq kawaq che te yand yehg u ve kawd-aw ghad kehr ghad kha sehax ghu jawq siz lar lawz che haq yawd gha mawg che yaog. ⁴⁵ Kheh te lehq, yawd kae lehq yawd haq keh haeg jad che ned suhr kheh haq sir veba lehq, yehg u ve khuhn phoz geh lehq chehd che yaog. Kheh te lehq awg khaz nuhr gaeg lehq chaw u ve awr Lehr awg kawd maq thad haq keh liz kawq haeg jad vehr che yaog. A meha teq co haq ve chaw haeg che awr Lehr, che ve haq sur daq che yaog,” lehz Yer suq koz che yaog.

Yer suq ve awr ye he lehq awg nax var teq pa

⁴⁶ Yer suq chaw awg mor nux haq tawd yaw vid chehd-ag huh, yawd ved awr ye he lehq awg nax var teq pa awr Lehr yawd haq tawd yaw daq gad lehq awg bag huh lag hox law chehd che yaog. ⁴⁷ Kheh te lehq, chaw te ghad lag lehq Yer suq haq koz vid che, “Nawr ye he lehq nawg nax var teq pa nawg haq tawd yaw daq gad lehq awg bag huh hox law chehd che yaog.”

⁴⁸ Yawd haq lag koz-a che phad haq Yer suq koz vid che, “Ngar ye he lehq ngag nax var teq pa a suawg le,” lehd koz na ngawx che yaog. ⁴⁹ Kheh te peg lehq yawd ved awg laq ghuhd teq pa haq yawd bez lar lehq koz che, “Chuhr huh ngawx, chaw che ve teq pa awr Lehr, ngar ye he lehq ngag nax var teq pa phehq che yaog. ⁵⁰ Muhd nuh maq lo chehd che ngag ved Awr pa ve a lor haq kha ghaq te che chaw teq pa awr Lehr ngag

nax var, ngag nax ma he lehq ngar ye phehq che yaog," lehd koz vid che yaog.

13

Awg yuhd ser var awg lawn tawd par hax te mar che

¹ Awg ni u ve haq Yer suq yehg u ve khuhn tuhez lehq Gar liq lehd ghig po nux pad huh kae lehq mi chehd che yaog. ² Chaw awg mor nux awr lehr Yer suq yawd chehd huh phoz lag vehr cheaq te lehq yawd yaeq lehq, huh lawd kor khuhn geh mi chehd che yaog. Chaw awg mor nux vawr, pehg puhg huh phoz hox chehd che yaog.

³ Kheh te lehq, yawd tawd par hax te lehq awg lawn laex ceng mar vid lehq koz che, "Awg yuhd ser var te ghad awg yuhd ca ser che yaog.

⁴ Yawd awg yuhd ser thad huh, awg yuhd ted pehg pehar yaq kaw khuhn che geh lehq ngaz teq pa yaq lehq ghawz cad vehr che yaog. ⁵ Awg yuhd ted pehg pehar mig sar pad kig huh huhx meh de khuhn che geh lehq mig sar maq nax cheaq te lehq har naq yeg vehr che yaog. ⁶ Kheh ma khuhd awg yeg u ve teq pa awg chi geh maq nax cheaq te lehq, muhd ni tuhaz ver, muhd cha chiz jad ver nuhr vehr god vehr che yaog. ⁷ Awg yuhd ted pehg pehar a chud de khuhn che geh lehq a chud yeg teq pa ir-ag lehq awg yeg u ve haq hoz vehr che yaog. ⁸ Awg yuhd ted pehg pehar mig khid daq kig huh che geh lehq awg sir nuhq che yaog. Ted pehg pehar teq ha pun, ted pehg pehar khuhq chi pun, ted pehg pehar sehz chi pun nuhq che yaog.

9 Nar puh cawg che chaw kha sehax naoq," lehd koz che yaog.

A thoq te lehq Yer suq tawd par hax te mar che

10 Awg laq ghuhd teq pa Yer suq geh lag lehq koz che, "A thoq te chaw che ve teq pa haq nawg tawd par hax te lehq mar vid cheawg le," lehd koz na ngawx che yaog.

11 Yer suq i hehd haq kawq koz vid che, "Muhd nuh maq muhd mig awg lawn khuhd ceh lar che awg ceng teq pa haq nig hehd sir tug a khawag cawg che yaog. Kheh ma khuhd, i hehd teq pa sir tug a khawag mad cawg hawg. **12** Awg lawn ghod ver, cawg chehd che chaw haq kawq thehnri vid lehq yawd kha peh vad-ag kawq cawg mad vid tug yaog. Kheh ma khuhd, mad cawg che chaw geh yawd kha cawg lar che teq pa haq liz kawq yug ve tug yaog. **13** Awg lawn ghod ver i hehd ngawx mawg chehd liz, mad mawg che heh te lehq kad chehd liz ma kad che heh te lehq maq na gha cheaq te lehq ngag i hehd teq pa haq tawd par hax gha te mar vid che yaog. **14** Cuh kar var Id sar yaq koz lar che tawd khuhd i hehd khuhn phehaq che yaog. Yawd koz lar che,

†'Nig hehd awg cehg mag gha kad liz, na maq gha hawg.

Nig hehd awg cehg mag gha mawg liz, maq sir hawg.

15 Awg lawn ghod ver, chaw ceng che ve mehz sir haq

hoz tehr lar lehq nar puh liz chuhd lar lehq, ni ma liz heh cheaq te lehq

† **13:14** 13:14-15 Isy 6:9-10

i hehd kad liz mag na gha, mawg liz maq sir,
ni ma khuhn liz maq gehg che yaog.

Kheh mehz ver, ngag geh phuhz kawaq heh
ver
ghu na vid che haq gha tug yaog,'
lehd koz che yaog.

¹⁶ Kheh ma khuhd nig hehd ve mehz sir mawg
lehq nar puh liz gha kad che awr lehr, awg bon
ir jad che yaog. ¹⁷ Ngag nig hehd haq awg cehg
mag koz ax laq, nig hehd gha mawg chehd che
awg ceng teq pa haq a mig thad lo ve Ghig sa ve
cuh kar var teq pa he lehq thed che cawd che
chaw teq pa laex ghad mawg gad jad liz, maq
gha mawg. Nig hehd gha kad che teq pa haq i
hehd kad gad jad liz, maq gha kad.

*Yer suq awg yuhd ser che awg lawn koz mar
vid che*

¹⁸ Awg yuhd ser var ve awg lawn tawd par hax
te mar lar che cuhx kig haq kha sehax na lar.

¹⁹ Chaw te ghad Ghig sa ve muhd mig awg lawn
gha kad lehq na maq gha ver, ned haeg lag lehq
yawd ved ni ma khuhn lo ser lar che awg yuhd
haq yug tuhz vehr che yaog. Che ve awr lehr, yaq
kaw khuhn che che awg yuhd haq koz che yaog.

²⁰ Huhx meh de lo che che awg yuhd awg lawn
awr lehr, bon khuhd haq gha kad lehq teq pear
lehax har naq ha lehg ha ka haq yug che chaw
haq koz che yaog. ²¹ Kheh ma khuhd bon khuhd
u ve haq te lehq tuq che khanr che he lehq du deh
che haq gha phud che te yand, yawd ved ni ma
sir khuhn awg chi kha sehax ma cuhz yeg cheaq
te lehq, khanr ma ghad lehq teq pear lehax yawd
chid bag vehr che yaog. ²² A chud de lo che che

awg yuhd awg lawn awr lehr, bon khuhd u ve haq gha kad liz mig gig khod-aq lo ve duhd har tug awg ceng teq pa he lehq phu si med nged jeg kor teq pa bon khuhd u ve haq hoz beh lar cheaq te lehq awg sir nuhq maq gha che chaw haq koz che yaog.²³ Mig khid daq kig lo che che awg yuhd awg lawn awr lehr, bon khuhd u ve haq gha kad lehq na gha che chaw teq pa haq koz che yaog. I hehd teq pa ted pehg pehar teq ha pun, ted pehg pehar khuhq chi pun he lehq ted pehg pehar sezh chi pun awg sir nuhaq che yaog,” lehd koz vid che yaog.

*A cag ser lar che khuhn a vanx yeg ga tuhaz
che awg lawn tawd par hax te mar che*

²⁴ Yer suq i hehd haq awg kag awr ve awg lawn tawd par hax ted mag kawq te mar vid lehq koz che, “Muhd nuh maq muhd mig awr lehr yawd ved ha khuhn daq che awg yuhd ser che chaw te ghad haq sur daq che yaog.²⁵ Chaw yad teq pa yuhq mir ka chehd huh, yawd ved cand par lag lehq a cag ser lar che khuhn a vanx yuhd kawq ser ke lar haz lehq kawq veh che yaog.²⁶ Awg yeg yeg vehr lehq awg sir nuhaq che te yand, a vanx haq liz kha sehax ngawx lehq sir gha che yaog.²⁷ Kheh te lehq yehg sehr phad haq awg ceg var teq pa na lehq koz che, ‘Jawd mawd-og, nawg ved ha khuhn lo daq che awg yuhd haq lehax nawg ser lar che ma hez hawg la. A thoq te a vanx cawg gha cheawg le,’ lehd koz na ngawx che yaog.²⁸ Yehg sehr phad kawq koz vid che, ‘Cand par te ghad ghad te che yaog,’ lehz i hehd haq koz vid che yaog. Awg ceg var teq

pa yawd haq na lehq koz che, ‘Nawg ngag hehd haq a vanx cehg u ve teq pa ca ghawg kha vid gad la,’ lehd koz vid che yaog. ²⁹ Yawd kawq koz vid che, ‘Taq te ser. Nig hehd a vanx cehg haq ghawg chid bag ver a cag cehg teq pa haq liz ga ghawg chid bag vehr lawg. ³⁰ Teh lar lehq a cag għig che awg yand kha gag nid ceng clear teq geha ir taz chehd vid ser,’ lehz yehg sehr phad koz che yaog. A cag għiġi yand gaeg ver, ‘A vanx cehg haq awg kawd għiġi chuhq lar lehq a mir khuhn tox ke peg nuhr heh, a cag haq għiġi dawz lehq cag sir ngag ved cag yehg khuhn saw ke laoq,’ lehz a cag għiġi var teq pa haq ngag koz vid tug yaog.’

A ghawd yuhd awg lawn tawd par hax te mar che

³¹ Yer suq i hehd haq tawd par hax ted mag kawq te mar vid lehq koz che, “Muhd nuh maq muhd mig awr lehr chaw te ghad yawd ved ha khuhn ser lar che a ghawd yuhd haq sur daq che yaog. ³² Awg yuhd u ve awr lehr awg yuhd awg ceng għa lia khuhn suaq keh i jad liz iar che te yand, ghawd phaq muhq nuha teq pa awg kag awr ve haq keh ir lehq awg cehg nux maz phehq veħr che yaog. Kheh te lehq muhd-aq lo pog tod che ngaz teq pa lag lehq awg kax teq pa thagħiħ awg phi te lehq għad jehd che yaog,” lehd koz che yaog.

Khaor mod khuhn did ke che awg lawn tawd par hax te mar che

³³ Yer suq i hehd haq tawd par hax ted mag kawq te mar vid lehq koz che, “Muhd nuh maq muhd mig awr lehr did haq sur daq che yaog.

Yad mid te ghad did haq yug lehq khaor mod mia sehz khuhr luhd khuhn ke ver, awg gha lia haq saw cid tuag vid gha che yaog," lehd koz che yaog.

Yer suq tawd par hax yehd che awg lawn

³⁴ Awg lawn che ve teq pa awg gha lia haq Yer suq tawd par hax te lehq chaw mor nux haq koz mar vid che yaog. Tawd par hax maq te ver yawd i hehd haq maq mar vid che yaog. ³⁵ Yawd che kheh te che awr Lehr Ghig sa ve cuh kar var koz lar che tawd khuhd heh phehaq vid tug te che yaog. Tawd khuhd u ve awr Lehr,

†“Ngag ved mawq kaw ngax lehq tawd par hax te mar vid tug yaog.

Mig gig haq tanr te phanr thad loar khuhd ceh lar che awg ceng haq ngag pheq mar vid tug yaog,”
lehd koz lar che yaog.

A cag ser lar che khuhn a vanx yeg ser che awg lawn cuhx kig koz mar vid che

³⁶ Yer suq yawd chaw mor nux haq phaz daq lar haz lehq yehg khuhn gehe che te yand yawd ved awg laq ghuhd teq pa yawd chehd huh lag lehq, “Ha khuhn ser che a vanx yeg awg lawn tawd par hax te mar che cuhx kig ngag hehd haq a cehax koz mar ax laoq,” lehd koz vid che yaog.

³⁷ Yer suq yawd kawq koz che, “Daq che awg yuhd ser par awr Lehr chaw yad ve Yad phu yaog. ³⁸ Ha awr Lehr mig gig che ve haq koz che yaog. Daq che awg yuhd awr Lehr muhd nuh maq muhd mig yad teq pa haq koz che yaog. A

† 13:35 13:35 Chid 78:2

vanx yeg awr lehr haeg che awg sehr phad ve awg yad teq pa haq koz che yaog. ³⁹ Awg yuhd u ve haq ser che cand par awr lehr ned haeg yaog. A cag ghiq che awg yand awr lehr mig gig che ve leh che awg yand haq koz che yaog. A cag ghiq sehr phad teq pa awr lehr muhd nuh maq cuh yad teq pa haq koz che yaog. ⁴⁰ A vanx yeg haq ghiq lehq a mir khuhn tox ke che heh te lehq mig gig che ve leh che awg yand gaeg ver, u ve heh phehaq tug yaog. ⁴¹ Chaw yad ve Yad phu awr lehr yawd ved muhd nuh maq cuh yad teq pa haq peha lehq su haq te yaq vid che chaw he lehq haeg che haq te che chaw awg gha lia haq yawd ved muhd mig awg khuhn i hehd saw yug tuhz peg ver, ⁴² a mir ji paw chiz jad che khuhn yug chid bag ke tug yaog. U huh i hehd kug huhg paz huhg lehq cig gig yuhz cheq tug yaog. ⁴³ Kheh te lehq, awg yand u ve khuhn thed che cawd che chaw teq pa awr lehr i hehd ve Awr pa ve muhd mig khuhn muhd ni heh te awg ghiq pawd-ag tug yaog. Nar puh cawg che chaw kha sehax naoq.

Khuhd ceh lar che awg phuhd khaz jad che med nged awg lawn

⁴⁴ Muhd nuh maq muhd mig awr lehr, ti mi khuhn khuhd ceh lar che awg phuhd khaz jad che med nged haq sur daq che yaog. Med nged u ve haq mawg che chaw awr lehr, kawq ghu khuhd ceh lar haz lehq ha lehg jad che khuhn koeq lehq yawd kha cawg lar che med nged awg ceng gha lia haq huhd kha lar haz lehq ti mi u ve haq vig yug che yaog.

Awg phuhd khaz jad che pix koer sehnx sir awg lawn

⁴⁵ Muhd nuh maq muhd mig awr lehr daq jad che pix koer sehnx sir haq ca che tad kag var haq sur daq che yaog. ⁴⁶ Yawd awg phuhd khaz jad che pix koer sehnx sir ted mag haq gha mawg che te yand, yawd koeq lehq yawd kha cawg lar che med nged awg ceng gha lia saw huhd ve lehq sehnx sir u ve haq vig yug che yaog.

Ngad geq che awg lawn

⁴⁷ Ted ceng liz, muhd nuh maq muhd mig awr lehr lad chuhd ghig khuhn phehd ke lehq ngad awg ceng gha lia haq hoz yug chehd che geq haq sur daq che yaog. ⁴⁸ Ngad kha peh vad-ag cawg vehr che te yand, ngad ca var teq pa geq haq ghig puhg lo ghawg yug peg ver, mi lar lehq daq che ngad teq pa haq khuhr luhd khuhn lez ke lehq mad daq che ngad teq pa haq yug chid bag che yaog. ⁴⁹ Mig gig leh che awg yand u ve liz che ve haq sur daq che yaog. Muhd nuh maq cuh yad te pa tuhaz lehq thed che cawd che chaw teq pa he lehq haeg che chaw teq pa haq fir daq pehg daq peg ver, ⁵⁰ haeg che chaw teq pa haq a mir ji paw chiz jad che khuhn yug bag ke tug yaog. U huh i hehd kug huhg paz huhg lar lehq cig geq yuhz cheq tug yaog.

Med nged awg pir he lehq awg suhx awg lawn

⁵¹ Awg lawn che ve teq pa awg gha lia haq nig hehd teq pa saw na gha vehor la,” lehd koz na ngawx che te yand, “na gha vehor,” lehz i hehd yawd haq kawq koz vid che yaog.

⁵² Yer suq kawq koz vid che, “Kheh te lehq, muhd nuh maq muhd mig awg lawn hend yug peg che liq buhq var awg gha lia awr lehr, yehg sehr phad te ghad a sug yawd ved med nged ke lar kig awg khuhn med nged awg pir he lehq awg suhx yug tuhz che haq sur daq che yaog,” lehz i hehd haq koz vid che yaog.

Nar sar rehq chaw Yer suq haq mad haq yug

⁵³ Tawd pa hax u ve teq pa haq Yer suq te mar vid peg lehq yawd u huh tuhz veh che yaog.

⁵⁴ Yawd ved muhd mig lo yawd kawq gag vehr lehq i hehd ve bon lawg kig khuhn mar vid che yaog. Kheh te lehq i hehd teq pa and lehq koz che, “Chaw che ve phad, che kheh te che cud yiq he lehq kand pax khar lo ca gha veva cheawg le. ⁵⁵ Yawd vawr a suhz te var ve yad par ma hez hawg la. Awr ye liz Mar riq meh che ma hez hawg la. Yawd ved awg nax var teq pa vawr, Yar koq, Yod sehq, Sid monr he lehq Yud daq teq pa ma hez hawg la. ⁵⁶ Yawd ved awg nax ma teq pa liz a nig geh chehd chehd che ma hez hawg la. Kheh te lehq chaw che ve phad vawr che kheh te gha che cud yiq he lehq kand pax che ve teq pa khar lo ca gha veva cheawg le,” lehd koz lehq

⁵⁷ nez nag che yaog. Yer suq i hehd haq koz vid che, “Ghig sa ve cuh kar var te ghad awr lehr awg mig awg phond cawg che yaog. Kheh ma khuhd a sug yawd ved muhd mig he lehq a sug yawd ved yehg awg khuhn awg mig awg phond mad cawg,” lehd koz che yaog. ⁵⁸ I hehd teq pa Yer suq haq maq yonr cheaq te lehq, u huh yawd and tug kha peh maq te che yaog.

14*A kaz tur vid var Yod hanr suh che*

¹ Awg yand u ve haq Gar liq lehd muhd mig khuhn jawd mawd Her roq uq penr chehd huh, Yer suq ve awg lawn haq gha kad lehq, ² yawd ved awg ceg teq pa haq koz vid che, "Che ve phad awr lehr a kaz tur vid var Yod hanr yaog. Yawd suh vehr che kawq teq tuag vehr cheaq te lehq yawd and tug awg ceng che ve teq pa haq te gha che yaog," lehd koz che yaog. ³ Jawd mawd Her roq yawd ved awg nax var Phid liq ve awg mid ma Her ror diq awg lawn haq te lehq, Yod hanr haq pheh lehq thawnr khuhn ke lar che yaog.

⁴ Awg lawn ghod ver Yod hanr awr lehr, "Yad mid u ve haq nawg he maq na hawg," lehz yawd haq koz vid jaw cheaq te lehq yaog. ⁵ Jawd mawd Her roq awr lehr Yod hanr haq dawz vehr gad liz muhd mig yad teq pa haq yawd kuhz che yaog. Awg lawn ghod ver, Yod hanr awr lehr Ghig sa ve cuh kar var yaog lehz muhd mig yad teq pa sawnr lar che yaog.

⁶ Kheh ma khuhd, Jawd mawd Her roq paw che awg ni haq duhd nuhd che pawehd te thad huh, Her ror diq ve awg yad mid chaw kheh ma ve mehz khuhd suhr lo pawehd te mar vid lehq Jawd mawd Her roq ni ma cawd jad che yaog.

⁷ Kheh te lehq yad mid u ve haq, "Nawg kha lawg che awg ceng gha lia nawg haq pehar tug yaog," lehd koz jawd mawd Her roq kar tiq te lehq khanr lar che yaog.

⁸ Yad mid u ve lawg che vawr, awr ye mar vid lar che heh te lehq, "A kaz tur vid var Yod hanr

ve a kor yug lehq a khehd pehd nehz khuhn ke lehq chuhr huh pehar laoq," lehd koz lawg che yaog.

⁹ Jawd mawd Her roq yawd duhd har jad che yaog. Kheh liz yawd chaw kheh ma ve mehz khuhd suhr khanr lar che tawd khuhd gha cawg lar cheaq te lehq yad mid u ve lawg che heh te vid tug a khawag pid che yaog. ¹⁰ Kheh te lehq, yawd chaw haq phehd pe lehq thawnr yehg khuhn Yod hanr ve a kor ca tawz yug pe che yaog. ¹¹ A kor u ve a khehd pehz nehz khuhn ke veha lag lehq yad mid u ve haq pid lehq yawd liz awr ye haq yug ve ca pid-eg che yaog. ¹² Kheh te lehq, Yod hanr ve awg laq ghuhd teq pa lag lehq yawd ved awg ton haq tur vid lar haz lehq i hehd teq pa Yer suq haq ca khae mar vid-eg che yaog.

Yer suq chaw ngad hinx ghad haq car vid che

¹³ Yer suq awg lawn u ve haq gha kad che te yand, yawd huh lawd kor cind ve lehq chaw gawr ghad te kig lo yawd te ghad lehax veh che yaog. Med teq pa khuhn chehd che muhd mig yad teq pa gha kad vehr lehq mig gig thang veaq seh yaq kaw tod lehq yawd khaz nuhr ghaq veh che yaog. ¹⁴ Yawd huh lawd kor khuhn tuhez che te yand, chaw awg mor nux haq yawd gha mawg che yaog. Yawd i hehd teq pa haq har kax lehq i hehd teq pa khuhn ve chaw nag teq pa haq ghu na vid che yaog.

¹⁵ Muhd phiq vehr lehq awg laq ghuhd teq pa yawd chehd lo lag lehq koz che, "Chuhr huh vawr heh pir khuhn te lehq muhd liz phiq vehr tez-og. Chaw che teq pa haq khaz khuhn kae lehq

cad tug ca vig cad-eg vid tug i hehd haq phehd pe vid-oq," lehd koz vid che yaog.

¹⁶ Kheh ma khuhd Yer suq i hehd haq koz vid che, "I hehd kae vid tug maq lor hawg. Nig hehd i hehd haq car vid laoq," lehd koz vid che yaog.

¹⁷ Awg laq ghuhd teq pa kawq koz vid che, "Ngag hehd geh khaor mod ngad dig he lehq ngad nehax niq kheha lehax cawg che yaog," lehd koz vid che yaog.

¹⁸ Yer suq kawq koz vid che, "U ve teq pa yug veba lehq ngag chehd lo laor," lehd koz vid che yaog. ¹⁹ Kheh te lehq, "Chaw mor nux haq, muhq de thang huh phoz mi cuh vid-oq," lehd koz vid che yaog. Khaor mod u ve ngad diq he lehq ngad niq kheh u ve haq yawd yug lar lehq muhd nuh maq lo kuhr chid ngawx lar lehq bon chid muh che yaog. U kheh te peg lehq yawd khaor mod haq khehq lehq awg laq ghuhd teq pa haq pid lehq awg laq ghuhd teq pa liz chaw awg mor nux haq pehg car vid che yaog. ²⁰ Kheh te lehq chaw awg gha lia kha buhz gha cad che yaog. Cad lex lar che teq pa haq ca kawq ghawz phoz che te yand, teq chi niq khuhr luhd kha peh ghad gha che yaog. ²¹ Cad che chaw teq pa awr lehr, yad mid he lehq chaw yad nehax haq maq sawnr liz, haw khaz lehax a lag kheh ngad hinx ghad cawg che yaog.

Yer suq a kaz thag huh yaq kaw tod kae che

²² U kheh te peg lehq Yer suq awr lehr muhd mig yad teq pa haq phehd pe vid chehd-ag huh, awg laq ghuhd teq pa haq huh lawd kor khuhn geh lehq yawd haq keh awg kawd ghig po nux ox

pax awr lo khanr kae pe lar che yaog. ²³ Yawd muhd mig yad teq pa haq phehd pe vid peg lehq yawd te ghad lehax bon ca laweg tug keh thag lo taez che yaog. Muhd sux naz vehr liz, yawd te ghad lehax u huh chehd chehd ser che yaog. ²⁴ Huh lawd kor u ve ghig po awg kaw jen lo gaeg che te yand muhd huh phawd ma cawd cheaq te lehq, ghig bad taz lehq huh lawd kor haq thinr jad che yaog.

²⁵ Muhd khax te khend lo muhd thid-ag phawd awr seh na rir te lehq khuhq nar rir awg kar u ve khuhn Yer suq a kaz thag huh yaq kaw tod ve lehq i hehd teq pa chehd lo kae che yaog. ²⁶ A kaz thag lo yawd yaq kaw tod lag che haq awg laq ghuhd teq pa gha mawg lehq i hehd kuhz jad lehq, “Chaw ha law,” lehd koz che yaog. I hehd kuhz jad cheaq te lehq hax ceh kug che yaog.

²⁷ Yer suq i hehd haq har naq kug vid lehq koz che, “Ni hehd ve ni ma tag vid-oq. Ta kuhz. Ngag yaog,” lehd koz vid che yaog.

²⁸ Per troq yawd haq koz vid che, “Jawd mawd-og, nawg awg cehg mag ver a kaz thag huh veaq seh ngag haq nawg chehd lo lag cuha laoq hehq,” lehd koz vid che te yand, ²⁹ “Laor hehq,” lehz yawd koz che yaog. Kheh te lehq Per troq huh lawd kor khuhn tuhez lehq a kaz thag veaq seh yaq kaw tod lehq Yer suq chehd lo kae che yaog. ³⁰ Kheh ma khuhd muhd huh hehnd jad che haq yawd gha mawg lehq kuhz jad vehr che yaog. Yawd a kaz ka vehr lehd te che te yand, “Jawd mawd-og, ngag haq a cehax ga laoq,” lehd koz kug che yaog.

³¹ Teq pear lehax Yer suq yawd ved laq kuhr che lehq yawd haq ghawg cid lar lehq koz vid che, "Kha sehax maq yonr che chaw-og, a thoq te lehq nawg thuhd duhd nuhg duhd te cheawg le," lehz yawd haq koz vid che yaog.

³² Yer suq he lehq Per troq ix mag huh lawd kor khuhn gehag vehr che te yand, muhd huh liz dehg vehr che yaog. ³³ Huh lawd kor khuhn chehd che chaw teq pa yawd haq a kor pi lehq koz che, "Nawg awr lehr awg cehg mag Ghig sa ve Yad phu yag lo," lehd koz che yaog.

³⁴ Ghig po nux ox pax awr lo khanr kae lehq Ger ner sar rehq muhd mig lo gaeg che yaog. ³⁵ U huh chehd che chaw teq pa awr lehr, Yer suq haq tawnd gha che te yand, i hehd chaw phehd pe lehq muhd mig u ve khuhn ted kag peg ted kag ca kaod koz vid lehq nag che guhg che chaw teq pa awg gha lia Yer suq chehd lo sir veba lag che yaog. ³⁶ Chaw nag teq pa awr lehr Yer suq yawd ved a poq awg jog med nehax haq gha soz tug kheh tawa yawd haq lawg khawx che yaog. Kha soz che chaw teq pa liz saw na vehr che yaog.

15

Chaw yad awg lid teh lar che haq Ghig sa ve awg lid lehd koz che

¹ Kheh te lehq Phar rir sehd teq pa he lehq liq buhq var teq pa Yer ruq sar lehnr med lo tu lehq Yer suq chehd lo lag na che, ² "Nawg ved awg laq ghuhd teq pa a thoq te lehq A pux chaw mawd teq pa pehar lar che awg lid teq pa haq te yaq cheawg le. Awg lawn ghod ver, i hehd teq pa

laq kuhr ma chuhd ser liz cad tug cad che yaog,"
lehd koz vid che yaog.

³ Kheh te lehq, Yer suq i hehd haq kawq koz vid che, "Nig hehd liz a thoq te nig hehd ve awg lid haq te lehq Ghig sa ve awg lid tawd khuhd haq te yaq cheawg le. ⁴ Awg lawn ghod ver Ghig sa koz lar che, [†]'Nawg ved awr pa awr ye haq yawz yawz yan yan teoq.' Kheh te lehq, [†]'A sug yawd ved awr pa awr ye haq kha muhd kha na koz che chaw te ghad awr lehr, awg cehg mag gha suh che yaog,' lehd koz lar che yaog. ⁵ Kheh ma khuhd nig hehd awr lehr, 'Chaw khar ve te ghad lehd ma koz, a sug yawd ved awr pa awr ye haq, "Ngag geh kha cawg che nig hehd gha cawd che med nged teq pa Ghig sa haq tand vid peor," lehd koz peg ver, ⁶ a suq yawd ved awr pa awr ye haq yawz yan tug maq lor,' lehz nig hehd koz che yaog. Kheh te lehq nig hehd ve awg lid haq te lehq Ghig sa pid lar che tawd khuhd haq nig hehd te lug vehr che yaog. ⁷ Chaw he ka var teq paog, nig hehd ve awg lawn Id sar yaq koz lar che tawd khuhd awr lehr cawd jad che yaog.

⁸ [†]'Chaw che ve teq pa awr lehr,
i hehd ve mawq kaw ngag haq yawz yan
chehd liz,
i hehd ve ni ma awr lehr, ngag haq vid daq jad
che yaog.

⁹ Chaw yad teq pa teh lar che awg lid awg
khad haq
mar vid cheaq te lehq,

[†] **15:4** 15:4 Tuhz 20:12, Bon 5:16 [†] **15:4** 15:4 Tuhz 21:17

[†] **15:8** 15:8-9 Isy 29:13

i hehd ngag haq a kor pi che awr lehr, cuhx
kig teq chaweh mad cawg,’ ”
lehd koz che yaog.

¹⁰ Kheh te lehq Yer suq chaw mor nux haq
kug veba lehq koz vid che, “Kha sehax na lehq
sir laor. ¹¹ Mawq kaw khuhn geh veh che awg
ceng awr lehr, chaw yad haq chaq chiz tug maq
te. Kheh ma khuhd mawq kaw khuhn tuhaz che
awg ceng awr lehr, chaw yad haq chaq chiz tug
te che yaog,” lehd koz che yaog.

¹² Awg yand u ve khuhn yawd ved awg laq
ghuhd teq pa yawd chehd lo lag lehq, “Tawd che
ve te khuhd haq Phar rir sehd teq pa gha kad
thad huh, i hehd nez nag jad che haq nawg sir
chehd-aq la,” lehd koz vid che yaog.

¹³ Yer suq kawq koz che, “Muhd nuh maq lo
chehd che ngag ved Awr pa maq kha lar che awg
cehg awg gha lia haq saw ghawg chid bag tug
yaog. ¹⁴ Chaw u ve teq pa a gad lehd vid lar ser.
I hehd mehz cox vehr liz yaq kaw mar par te che
yaog. Mehz cox che chaw awr lehr, mehz cox che
chaw haq yaq kaw seh kae ver, ix mag ni ghad
ghad mig kor khuhn che geh tug yaog,” lehd koz
che yaog.

¹⁵ Kheh te lehq Per troq Yer suq haq koz vid
che, “Tawd par hax che ve cuhx kig ngag hehd
haq a cehax kawq koz ax laoq,” lehd koz vid che
yaog.

¹⁶ Yer suq kawq koz vid che, “Khawd-ehg kheh
awr nag nig hehd liz na maq gha ser cheawg la.

¹⁷ Mawq kaw khuhn kha cad ke che awg ceng
gha lia ux peg khuhn gehe lehq, khuhd kog yehg
lo saw chid bag vehr che haq nig hehd maq sir la.

18 Kheh ma khuhd mawq kaw khuhn yaw tuhaz che tawd khuhd awr lehr ni ma khuhn lo tuhaz che yaog. Awg ceng che ve teq pa awr lehr chaw yad haq chaq chiz tug te che yaog. **19** Awg lawn ghod ver haeg che khad haq duhd che, chaw haq dawz vehr che, hax chawd hax paz te che, gid yaq che, su med nged khuhd che, ma hez hez che haq sax khiz khanr che he lehq maq sawnr ma caz koz che, che ve teq pa awr lehr ni ma khuhn lo tuhaz che yaog. **20** Awg ceng che ve teq pa awr lehr chaw haq chaq chiz tug te che yaog. Kheh ma khuhd laq kuhr ma chuhd lehq cad tug cad che vawr, chaw haq chaq chiz tug te che ma hez hawg,” lehd koz che yaog.

*Khar nar muhd mig chaw phehq che yad mid
te ghad ve your che awg lawn*

21 Yer suq u huh tuhez lehq Tud ruq he lehq Sid donr muhd mig phawd awr lo kae che yaog. **22** Awg yand u ve khuhn, muhd mig u ve teq tawn khuhn chehd che Khar nar muhd mig chaw phehq che yad mid te ghad awr lehr, “Dar viq ve Yad phu Jawd mawd-og, ngag haq a cehax har kax laoq. Ngag ved yad mid ned geh lehq tuq khanr jad che yaog,” lehd koz hax ceh kug che yaog.

23 Kheh ma khuhd Yer suq tawd teq pear liz maq yaw khuhq vid. Yawd ved awg laq ghuhd teq pa yawd chehd huh lag lehq lawg khawx che, “Yad mid che ve ngag hehd khaz nuhr ghaq lag lar lehq kaod kug tod cheaq te lehq ghaq kawq pe lor,” lehd koz vid che yaog.

24 Yer suq kawq koz vid che, “Id sar rer laq chaw teq pa khuhn che mehx vehr che yawg nehax heh te che teq pa haq lehax ghaq ca tug kheh tawa Ghig sa ngag haq lag peha lar che yaog,” lehd koz vid che yaog.

25 Yad mid u ve lag lehq Yer suq mehz khuhd suhr huh nar khehr teh mi lar a kor pi lehq koz che, “Jawd mawd-og, ngag haq a cehax ga laoq,” lehd koz che yaog.

26 Yer suq koz che, “Yad nehax teq pa ve cad tug haq yug lehq phid teq pa haq car vid ma cawd hawg,” lehd kawq koz vid che yaog.

27 Yad mid u ve kawq koz che, “Jawd mawd-og, nawg koz che awr lehr cawd che yaog. Kheh ma khuhd phid teq pa awr lehr awg sehr phad ve teh cuh awg huhx sez chehd che cad tug teq pa haq ca ghawz cad che yaog,” lehd koz vid che yaog.

28 Kheh te lehq Yer suq kawq koz che, “Yad mid-og, nawg yonr che awr lehr ir jad che yaog. Nawg he gad che heh nawg awg pun phehaq vid-og,” lehd koz vid che yaog. Kheh te lehq yawd ved yad mid liz teq pear lehax na vehr che yaog.

Chaw nag kha peh haq ghu na vid che

29 Yer suq u huh tuhez lehq Gar liq lehd ghig po nux pad huh kae che yaog. Awg yand u ve haq yawd kehaq lo taez lehq mi chehd che yaog.

30 Awg yand u ve khuhn chaw kha peh vad-ag Yer suq yawd chehd lo lag che yaog. Khi lug laq lug che chaw, mehz cox che chaw, kar che chaw he lehq awg kag awg nuz awr ve chaw nag teq pa laex ghad haq liz i hehd sir veha taz veha lehq

yawd ved khi pad huh teh lar che yaog. Kheh te lehq, yawd chaw awg gha lia haq saw ghu na vid che yaog. ³¹ Kheh te lehq, chaw kar teq pa tawd yaw gha vehr lehq khi lug laq lug che chaw teq pa liz kawq daq lehq yaq kaw tod gha vehr lehq, mehz cox che chaw teq pa liz mehz kawq mawg vehr che haq chaw awg gha lia gha mawg che te yand i hehd teq pa and jad lehq Id sar rer laq ve Ghig sa haq chid ir chid muh che yaog.

Yer suq chaw uhd hinx ghad haq cad tug car vid che

³² Yer suq yawd ved awg laq ghuhd teq pa haq kug Yug veba lehq koz vid che, “Chaw che ve teq pa haq ngag har kax che yaog. Awg lawn ghod ver i hehd chuhr huh ngag geh chehd che sehr ni gaeg lehq cad tug liz teq chaweh mad cawg. I hehd awr meq jehd chehd ver ngag i hehd haq mad kawq pe gad. Kawq pe ver yaq kaw kar lo i hehd ghad nud lehq awg ghad peg vehr tug yaog,” lehd koz vid che yaog.

³³ Awg laq ghuhd teq pa kawq koz che, “Chaw che kheh ma ve gha cad buhz tug, chuhr huh heh pir khuhn awg god choz teag lo cad tug khar lo cae ver gha hawg le,” lehd koz che yaog.

³⁴ Yer suq i hehd haq na che, “Nig hehd teq pa geh khaor mod khar nid dig cawg chehd-aq le.” I hehd teq pa koz che, “Khaor mod suhr dig he lehq ngad nehax a cehax cawg che yaog,” lehz i hehd yawd haq kawq koz vid che yaog.

³⁵ Kheh te lehq Yer suq chaw mor nux haq mig kang phoz mi cuh vid che yaog. ³⁶ Yer suq khaor mod u ve suhr dig he lehq ngad teq pa haq yug

lar lehq bon haq chid muh peg lehq khaor mod khehq che yaog. Kheh te peg lehq, khaor mod he lehq ngad teq pa awg laq ghuhd teq pa haq pid lehq awg laq ghuhd teq pa liz chaw mor nux haq pehg car vid che yaog. ³⁷ I hehd awg gha lia kha buhz ghad gha cad peg nuhr, cad lex lar che teq pa haq ca kawq ghawz khuhq che te yand, suhr khuhr luhd kha peh ghad gha che yaog. ³⁸ Kha cad che chaw teq pa awr Lehr, yad mid he lehq chaw yad nehax haq maq sawnr liz, haw khaz chaw mawd teq pa lehax uhd hinx ghad cawg che yaog.

³⁹ Yer suq chaw mor nux u ve teq pa haq kawq pe peg lehq yawd huh lawd kor cind ve lehq Mar gar dar muhd mig lo kae che yaog.

16

Phar rir sehd teq pa awg hez haq lawg che

¹ Awg yand u ve khuhn Phar rir sehd teq pa he lehq Sar duq kehd teq pa lag lehq Yer suq haq lawd ngawx lehq koz che, "Muhd nuh maq ve awg hez a cehax te mar laoq," lehd koz lawg che yaog. ² Yer suq koz che, "Nig hehd awr Lehr muhd phiq ver, 'Muhd nuh kawag lo nix-i ghad te ver, sawx vawr ver muhd daq tug yaog,' lehd koz che yaog. ³ Kheh te lehq, 'Muhd sawx huh muhd nuh maq lo awg ni sid he lehq mog hoz chehd ver yaq ni muhd huh muhd yeg lag tug yaog,' lehz nig hehd koz che yaog. Nig hehd awr Lehr muhd nuh maq lo liz ngawx lehq sir vix chehd liz, ngag te che awg cuhx awg yand awg hez teq pa haq nig hehd fir daq maq gha. ⁴ Haeg lehq

hax chawd hax paz te che chaw heh te lehq Ghig sa haq ma yawz maq yan che chaw che ve teq co awr lehr awg hez haq lehax lawg che yaog. Kheh ma khuhd Yod naq ve awg hez ma hez ver, awg kag awr ve awg hez i hehd haq maq te mar hawg,” lehd koz vid lar haz lehq yawd i hehd haq phaz daq lehq veh che yaog.

Phar rir sehd he lehq Sar duq kehd ve did awg lawn

⁵ Awg laq ghuhd teq pa ghig po nux ox pax awr lo khanr kae tod che te yand khaor mod mad yug veva che haq duhd nuhd che yaog. ⁶ Yer suq koz che, “Phar rir sehd he lehq Sar duq kehd teq pa ve did haq sa tiq kha sehax teoq,” lehd koz lehq i hehd haq mar vid che yaog.

⁷ Awg laq ghuhd teq pa koz daq che, “A nig khaor mod mad yug veva cheaq te lehq yawd che kheh koz che yaog,” lehd koz daq che yaog.

⁸ Yer suq awg lawn u ve haq sir lehq koz che, “Kha nehax maq yonr che chaw teq paog. Nig hehd khaor mod mad yug veva lag che awg lawn haq a thoq te lehq nig hehd kaod koz daq cheawg le. ⁹ A meha kha gag liz nig hehd ma duhd gha ser cheawg la. Khaor mod ngad dig haq chaw ngad hinx ghad cad peg nuhr, nig hehd awg lex khar niq khuhr luhd kawq ghawz gha che haq ma duhd nuhd vehr lehq la. ¹⁰ Kheh te lehq khaor mod suhr dig haq chaw uhd hinx ghad cad peg nuhr, nig hehd awg lex khar niq khuhr luhd kawq ghawz gha che haq ma duhd nuhd vehr lehq la. ¹¹ Ngag khaor mod awg lawn haq te lehq nig hehd haq koz chehd che ma hez hawg.

A thoq te lehq nig hehd na maq gha cheawg le. Phar rir sehd he lehq Sar duq kehd teq pa ve did haq sa tiq tar lehq jaw kae veh kae,” lehd koz che yaog.

¹² Kheh te lehq awg laq ghuhd teq pa khaor mod khuhn ke che did haq yawd koz chehd che ma hez law lehz i hehd na gha vehr che yaog. Kheh te lar Phar rir sehd he lehq Sar duq kehd teq pa ve mar che tawd khuhd haq sa tiq tar lehq jaw kae veh kae vid tug koz chehd che law, lehz i hehd gha sir che yaog.

Yer suq awg lawn Per troq sax khiz khanr che

¹³ Yer suq awr lehr Phid liq Kehd sar riq muhd mid lo gaeg che te yand yawd ved awg laq ghuhd teq pa haq na ngawx che, “Chaw yad ve Yad phu haq a suawg lehd su koz chehd-aq le.”

¹⁴ I hehd kawq koz che, “Chaw ted pehg pehar nawg haq Yod hanr a kaz tur var yaog lehd koz chehd-aq, ted pehg pehar Ed lid yaq yaog lehd koz chehd-aq, ted pehg pehar Yer rar miq, ma hez ver, Ghig sa ve cuh kar var te ghad ghad yaog lehd koz chehd-aq,” lehd koz che yaog.

¹⁵ Yer suq yawd ved awg laq ghuhd teq pa haq kawq na lehq koz che, “Kheh te ver, nig hehd teq pa vawr, ngag haq a suawg lehd koz chehd cheawg le.”

¹⁶ Sid monr Per troq kawq koz che, “Nawg awr lehr Khreq lehd koz che, teq chehd che Ghig sa ve Yad phu phehq che yaog.”

¹⁷ Yer suq yawd haq kawq koz vid che, “Yod naq ve yad par Sid monr-og, nawg awr lehr awg bon ir che yaog. Awg lawn ghod ver chaw yad

nawg haq awg lawn che ve pheq mar che ma hez hawg. Muhd nuh maq lo chehd che ngag ved Awr pa nawg haq pheq mar ax che yaog. ¹⁸ Kheh te lehq, ngag nawg haq koz ax laq, nawg awr Lehr Per troq yaog. Huhx meh che ve awg thag huh ngag ved awg mor haq ngag te tug yaog. Suh che muhd mig ve kand pax awr Lehr awg mor che ve haq ma ghad hawg. ¹⁹ Muhd nuh maq muhd mig ve sawnd liz ngag nawg haq peha tug yaog. Mig gig khod-aq lo nawg kha pheh lar che teq pa haq muhd nuh maq lo liz pheh lar tug yaog. Mig gig khod-aq lo nawg kha phi kha vid che teq pa haq muhd nuh maq muhd mig khuhn lo liz phi kha vid tug yaog," lehd koz vid che yaog.

²⁰ Kheh te lehq yawd Khreq phehq che awg lawn chaw te ghad-eg haq liz maq gha koz vid tug yawd i hehd haq tawd hehnd chawa yaw vid lar che yaog.

Yer suq yawd gha suh tug awg lawn koz vid lar che

²¹ Awg yand u ve haq tanr lehq Yer suq yawd Yer ruq sar lehnur med lo gha kae lehq awg hox chaw mawd teq pa, paw khod nux teq pa he lehq liq buhq var teq pa ve laq khuhn lo laex ceng haq yawd gha tuq gha khanr tug awg lawn lehd ma koz, yawd gha suh lehq sehr ni teq ni haq gaeg ver kawq teq tuag tug awg lawn teq pa yawd ved awg laq ghuhd teq pa haq koz mar vid che yaog.

²² Per troq yawd haq cuhz ghawg ve lehq, "Jawd mawd-og, u kheh te maq gha hawg. Awg ceng u ve teq pa nawg haq a cehax liz maq gha

phehq vid hawg," lehd koz lehq yawd haq ded che yaog.

²³ Yer suq kuhr phuhz ngawx lar lehq Per troq haq koz vid che, "Sar tanr-og, phawe lor. Ngag geh ta chehd-oq. Per troq nawg awr lehr ngag ved kanx khad haq tawr chuhd che yaog. Awg lawn ghod ver nawg ved duhd khad awr lehr Ghig sa ve duhd khad ma hez law, chaw yad ve duhd khad yaog," lehd koz che yaog.

²⁴ Kheh te lehq Yer suq yawd ved awg laq ghuhd teq pa haq koz vid che, "Chaw khar ve te ghad lehd ma koz ngag khaz nuhr ghaq lag gad ver, a sug yawd ved a lor haq teh lar haz lehq a sug yawd ved laq kan haq taz lehq ngag khaz nuhr ghaq laoq. ²⁵ Awg lawn ghod ver, chaw khar ve te ghad lehd ma koz, a sug yawd ved a saq gha pong vid tug te liz, yawd ved a saq gha sond tug yaog. Kheh ma khuhd chaw khar ve te ghad lehd ma koz, ngag awg pun a saq gha sond ver, yawd ved a saq haq kawq gha tug yaog.

²⁶ Awg lawn ghod ver chaw te ghad ghad mig gig koar kha cawg che awg ceng gha lia saw gha vehr liz yawd ved a saq sond vehr ver, yawd awg pun a thoq awg bon cawg tuawg le. Kheh te lehq, nawg a thoq ted ceng ca Yug ve lehq nawg ved a saq haq kawq pa khuhq gha hawg le. ²⁷ Awg lawn ghod ver chaw yad ve Yad phu awr lehr, yawd Awr pa ve awg mig awg phond ir jad che khuhn yawd ved muhd nuh maq cuh yad teq pa geh teq geha lag tug yaog. Awg yand u ve khuhn, a sug yawd te lar che heh chaw awg gha lia haq yawd kawq te vid tug yaog. ²⁸ Ngag nig hehd haq awg cehg mag koz ax laq, chuhr huh hox chehd

che chaw teq pa awg khuhn ve ted pehg pehar awr lehr, chaw yad ve Yad phu yawd ved muhd mig khuhn lag che haq maq gha mawg ser che kheh ceh yawd maq gha suh ser hawg,” lehd koz che yaog.

17

Yer suq ve awg hoq awg han pa che

¹ Khuhq ni peg lehq Yer suq awr lehr Per troq, Yar koq he lehq Yar koq ve awg nax var Yod hanr haq lehax sir ve lehq keh muh maq ted mag thag lo i hehd taez che yaog. ² Kheh te lehq i hehd mehz khuhd suhr huh Yer suq ve awg hoq awg han pa che yaog. Yawd ved mehz khuhd vawr, muhd ni heh te lehq awg ghiz pawd lehq yawd ved beg ke veq kad liz awg ghiz heh te lehq awg phu ched phehq vehr che yaog. ³ Mod ser he lehq Ed lid yaq liz i hehd mehz khuhd suhr huh tuhaz lehq Yer suq haq tawd yaw daq chehd che yaog. ⁴ Kheh te lehq Per troq Yer suq haq koz vid che, “Jawd mawd-og, a nig chuhr huh lag chehd chehd che awr lehr daq jad vehr che yaog. Nawg ni ma cawd ver ngag chuhr huh hax po seh lehd te tug yaog. Nawg awg pun ted mag, Mod ser awg pun ted mag he lehq Ed lid yaq awg pun ted mag te tug yaog,” lehd koz vid che yaog.

⁵ Per troq koz chehd che mad peg tand, awg ghiz pawd-aw ghad te che mog i hehd haq lag lehq hoz beh vehr che yaog. Kheh te lehq mog u ve khuhn awg khuhd buhg tuhaz lehq koz che, “Chaw che ve awr lehr ngag haq jad che ngag ved Yad phu yaog. Yawd haq ngag ni ma cawd

jad che yaog. Yawd ved tawd khuhd haq na yur-og," lehd koz che yaog.

⁶ Awg laq ghuhd teq pa gha kad che te yand i hehd kuhz jad lehq mehz khuhd miag lo boz cuhx vehr che yaog. ⁷ Awg yand u ve khuhn Yer suq lag lehq i hehd haq soz lar lehq koz che, "Tu lor. Ta kuhz," lehd koz vid che yaog. ⁸ I hehd kuhr kawq chid ngawx che te yand awg kag awr ve chaw te ghad-eg liz mad mawg. Yer suq te ghad lehax chehd chehd lawz che haq gha mawg che yaog.

⁹ Keh te peg lehq i hehd teq pa kehaq lo kawq yaq tod-ag huh Yer suq i hehd haq koz vid che, "Chaw yad ve Yad phu suh kig lo mad kawq teq tuag ser che kheh ceh nig hehd gha mawg lar haz che awg lawn che ve chaw te ghad-eg haq liz ta koz vid," lehd koz vid che yaog.

¹⁰ Keh te lehq yawd ved awg laq ghuhd teq pa yawd haq na che, "A thoq te lehq liq buhq var teq pa Ed lid yaq awg kawd lag lawg lehd koz lar cheawg le," lehd koz lehq na che yaog. ¹¹ Yer suq kawq koz vid che, "Ed lid yaq awr lehr awg kawd maq gha lag lehq awg ceng gha lia haq gha saw ghu te lar che yaog. ¹² Keh ma khuhd ngag nig hehd haq koz ax laq, Ed lid yaq lag peor. Keh liz i hehd yawd haq maq sir cheaq te lehq i hehd te gad che heh yawd haq te vid che yaog. U ve haq kha sur suar chaw yad ve Yad phu haq liz i hehd ve laq khuhn gha khanr tug yaog," lehd koz che yaog.

¹³ Keh te lehq awg laq ghuhd teq pa awr lehr, Yod hanr a kaz tur var ve awg lawn haq yawd koz chehd che law lehz i hehd sir vehr che yaog.

Puhq phez che yad par nehax te ghad haq Yer suq ghu na vid che

¹⁴ Yer suq he lehq yawd ved awg laq ghuhd teq pa chaw awg mor nux chehd-ag huh kawq gag che te yand haw khaz var te ghad lag lehq yawd mehz khuhd suhr huh nar khehr teh mi lar lehq koz che, ¹⁵ “Jawd mawd-og, ngag yad par haq a cehax har kax laoq. Yawd puhq phez cheaq te lehq gha khanr jad che yaog. Yawd a mir khuhn he lehq a kaz khuhn te thawz te thawz kuhd geh don chehd che yaog. ¹⁶ Nawg ved awg laq ghuhd teq pa chehd lo ngag yawd haq sir vega lag liz i hehd yawd haq ghu na vid maq gha,” lehd koz vid che yaog.

¹⁷ Yer suq kawq koz vid che, “Ni ma kuhq lehq maq yonr che chaw teq paog. Ngag nig hehd geh khawd-ehg muh maq gha chehd ser tuawg le. Nig hehd haq khawd-ehg muh maq gha yeg khanr ser tuawg le. Chaw yad nehax ix ve ngag chehd lo sir vega lar-oq,” lehd koz vid che yaog. ¹⁸ Kheh te lehq Yer suq ned u ve haq ded lehq ned u ve yad par nehax u ve khuhn tuhz veh che yaog. Te pehar lehax yad par nehax u ve liz na vehr che yaog.

¹⁹ Kheh te lehq, Yer suq yawad lehax chehd chehd huh awg laq ghuhd teq pa yawd geh lag lehq na che, “A thoq te lehq ngag hehd ned u ve haq ghaq tuhz maq gha cheawg le,” lehd koz che yaog.

²⁰ Yer suq kawq koz vid che, “Awg lawn ghod ver nig hehd kha sehax maq yonr cheaq te lehq yaog. Ngag nig hehd haq awg cehg mag koz ax laq, nig hehd yonr che ted ceng a ghawd yuhd

kheh hia liz cawg ver, keh che ve ted dig haq, ‘Ox lo jiz kae,’ lehd koz vid liz, jiz veh tug yaog. Nig hehd te maq gha che teq chaweh liz mad cawg hawg,” lehz i hehd haq koz vid che yaog.*

Yer suq yawd gha suh tug awg lawn te pawz kawq koz che

²² Gar liq lehd muhd mig khuhn i hehd teq geha phoz chehd thad huh Yer suq koz che, “Chaw yad ve Yad phu awr Lehr chaw yad ve laq khuhn chid aq che haq gha khanr tug awg yand ned vehr che yaog. ²³ I hehd yawd haq dawz vehr lehq sehr ni teq ni gaeg ver yawd kawq teq tuag tug yaog,” lehd koz che te yand, awg laq ghuhd teq pa duhd har jad che yaog.

Bon yehg nux awg pun awg khawnr ghawz che

²⁴ I hehd Kar per nar unr med lo kawq gaeg che te yand, bon yehg nux awg pun awg khawnr ghawz sehr phad teq pa Per troq chehd lo lag lehq, “Nawg ved sar lar vawr awg khawnr maq ke cheawg la,” lehd koz na ngawx che yaog.

²⁵ Per troq kawq koz vid che, “Ke che yaog,” lehd koz che yaog. Kheh te lehq Per troq yehg khuhn gehe che te yand, Yer suq tawd awg kawd yaw lehq koz che, “Sid monr-og, nawg khawdehg kheh duhd-aq le. Mig gig koar ve jawd mawd teq pa awr Lehr a suq geh awg khawnr ghawz cawd hawg le. A suq yawd ved yad geh la. Ma

* **17:20** 17:21 Liq phu ted pehg awg khuhn ka nad nehax che ve cawg che yaog. “Bon lawg che ted ceng he lehq cad tug ce che ted ceng ma hez ver, ned che ve ted ceng haq ghaq ma tuhz che yaog.”

hez ver su geh ghawz che la," lehd koz na ngawx che yaog.

²⁶ "Su geh ghawz che yaog," lehz Per troq koz che te yand, Yer suq awr Lehr, "Kheh te ver, i hehd ve yad teq pa awg khawnr maq ke vehr che yaog.

²⁷ Kheh ma khuhd awg khawnr ghawz par teq pa a nig haq maq gha nez nag vid tug nawg ghig po lo kae lehq ber ted mag ca bag keoq. Awg kawd maq gha che ngad haq yug lehq mawq kaw ngax ngawx ver phu ted thehq haq nawg gha mawg tug yaog. Phu u ve haq yug ve lehq ngag awg pun he lehq nawg awg pun i hehd haq ca ke videq," lehz Per troq haq koz vid che yaog.

18

Khar ve te ghad su haq keh ir jad che

¹ Awg yand u ve khuhn awg laq ghuhd teq pa Yer suq chehd lo lag lehq koz che, "Muhd nuh maq muhd mig awg khuhn a sug te ghad vawr, suaq keh ir jad hawg le," lehd koz na che yaog.

² Kheh te lehq Yer suq chaw yad nehax te ghad haq kug veba lehq i hehd teq pa kanr hox vid lar lehq koz che, ³ "Ngag nig hehd haq awg cehg mag koz ax laq, nig hehd ni ma maq pa lehq chaw yad nehax teq pa heh maq te ver, muhd nuh maq muhd mig khuhn nig hehd maq gha gehe hawg.

⁴ Kheh te cheaq te lehq, a sug te ghad lehd ma koz chaw yad nehax che ve heh te lehq ni ma nehr ghad tar che chaw awr Lehr, muhd nuh maq muhd mig awg khuhn suaq keh ir jad che chaw te ghad phehq che yaog. ⁵ Chaw a sug te ghad lehd ma koz chaw yad nehax heh te che te ghad

haq ngag ved awg meh awg khuhn haq yug ver,
ngag haq haq yug che yaog.

⁶ Kheh te lehq ngag haq yonr che chaw yad
nehax che ve teq pa khuhn ve te ghad haq maq
yonr vid tug te che chaw khar ve te ghad lehd ma
koz, yawd ved kuhr pehg haq huhx meh mawr
nux pheh ku li lehq nax jad che lad chuhd ghig
khuhn chid bag ke pe ver, yawd awg pun daq jad
vehr che yaog.

Su te yaq vid tug te che awg lawn

⁷ Su te yaq vid tug te cheaq te lehq, mig gig
chaw yad gha duhd har jad che yaog. Awg lawn
ghod ver su yaq vid tug te che ted ceng awr lehr
cawg tug yaog. Kheh ma khuhd su yaq vid tug te
che chaw teq pa awr lehr gha duhd har jad tug
yaog.

⁸ Nawg ved laq kuhr ma hez ver khi kud nawg
haq te yaq vid tug te ver, tawz khaoq. Khi kud
laq kuhr nig pax pax cawg lar lehq khar thad
liz maq suh vix lehq toq chehd che a mir khuhn
gha khanr cheaq keh, khi kud laq kuhr mad cawg
lehq a saq teq kig lo gha gehe che awr lehr, nawg
awg pun daq jad che yaog. ⁹ Nawg ved mehz sir
teq pax nawg haq te yaq vid tug te ver, mehz
sir u ve haq kehx khaoq. Mehz sir nig pax pax
cawg lar lehq a mir toq chehd che muhd naz hoq
khuhn gha khanr cheaq keh, mehz sir teq pax
lehax cawg lar lehq a saq teq kig lo gha gehe che
awr lehr nawg awg pun daq jad che yaog.

Mehx vehr che yawg teq kheh

¹⁰ Nig hehd awr lehr chaw yad nehax heh te
che te ghad ghad haq maq sawnr ma caz maq

gha te tug sa tiq kha sehax teoq. Awg lawn ghod ver ngag ni hehd haq koz ax laq, muhd nuh maq lo i hehd ve muhd nuh maq cuh yad teq pa awr lehr, muhd nuh maq lo ngag ved Awr pa ve mehz khuhd suhr huh khar thad liz chehd chehd che yaog.

¹² Nig hehd khawd-ehg kheh duhd-aq le. Chaw te ghad ghad yawd ved yawg teq ha kheh cawg lehq teq kheh mehx vehr ver, kuhd chi kuhd kheh haq keh thag lo teh lar haz lehq mehx vehr che teq kheh haq yawd ghaq ca ngawx veh tug yaog ma hez hawg la. ¹³ Ngag nig hehd haq awg cehg mag koz ax laq, yawg u ve haq kawq ca mawg vehr ver, maq mehx che yawg kuhd chi kuhd kheh haq ha lehg cheaq keh u ve teq kheh haq ha lehg jad che yaog. ¹⁴ Che ve haq kha sur suar, chaw yad nehax heh te che chaw che ve teq pa te ghad-eg haq liz lug vehr mehx vehr tug haq muhd nuh maq lo chehd che nig hehd ve Awr pa ni ma ma cawd che yaog.

A vix a nax a nig haq te yaq che awg lawn

¹⁵ Nawg ved a vix a nax te ghad ghad nawg haq te yaq ax ver, yawd chehd lo kae lehq nig mag lehax chehd-ag huh yawd ved yaq kig haq kawq koz mar vid-oq. Yawd nawg ved tawd khuhd haq na ver, nawg vix nawg nax haq nawg kawq gha vehr che yaog. ¹⁶ †Kheh ma khuhd nawg ved tawd khuhd haq yawd maq na yug ver, sax khiz te var te ghad la ni ghad sir daq ve lehq teq geha kae-og. Awg lawn ghod ver ni ghad la seh ghad gha sir gha mawg lar vid lehq sax khiz cawg lar

† 18:16 18:16 Bon 19:15

vid tug te che yaog. ¹⁷ I hehd ve tawd khuhd haq yawd maq na yug ver, Khreq yad awg mor haq koz vid-oq. Khreq yad awg mor ve tawd khuhd haq liz maq kawq na yug ver, bid saz a naz chaw he lehq awg khawnr ghawz var teq pa heh te sawnr tar vid-oq.

¹⁸ Ngag nig hehd haq awg cehg mag koz ax laq, mig gig khod-aq lo nig hehd kha pheh lar che teq pa haq muhd nuh maq lo liz pheh lar tug yaog. Mig gig khod-aq lo nig hehd kha phehd kha vid che teq pa haq muhd nuh maq lo liz phehd kha vid tug yaog.

¹⁹ Kheh te lehq ngag nig hehd haq kawq koz ax laq, mig gig khod-aq lo nig hehd awg khuhn ve chaw ni ghad ni ma hawr daq lehq ted ceng cear lawg ver, muhd nuh maq lo chehd che ngag ved Awr pa awr lehr, ix maq lawg che heh te vid tug yaog. ²⁰ Awg lawn ghod ver chaw ni ghad seh ghad ngag ved awg meh haq cud lehq phawng daq chehd ver, u huh i hehd geh ngag chehd tug yaog,” lehd koz che yaog.

²¹ Kheh te lehq Per troq Yer suq chehd huh lag lehq na che, “Jawd mawd-og, ngag vix ngag nax teq pa ngag haq te thawz te thawz kaod te yaq ax ver, ngag i hehd haq vend bax khar ni pawz gha phehd vid lawg le. Suhr pawz kha gag la,” lehd koz na ngawx che yaog.

²² Yer suq yawd haq kawq koz vid che, “Suhr pawz kha gag lehax ma hez hawg. Suhr pawz, suhr chi pawz kha gag la khar ni pawz liz gha phehd vid che yaog lehz ngag nawg haq koz ax che yaog.

Su haq jeg ma phehd vid che awg ceg awg lawn

²³ A thoq te lehq ngag nawg haq u kheh gha te lehd koz ver, muhd nuh maq muhd mig awr Lehr yawd ved awg ceg teq pa geh phu cag land haq ghu te gad che jawd mawd te ghad haq sur che yaog. ²⁴ Yawd cag land haq tanr ghu te chehd che te yand, jawd mawd ve jeg teq chi lang thehq cha lar che chaw te ghad haq su yawd chehd lo sir vega lag che yaog. ²⁵ Chaw u ve awr Lehr, yawd jeg khuhq sehr vid tug mad cawg cheaq te lehq, yawd ved awg sehr phad koz che, 'Yawd ved awg ton liz, yawd ved awg mid awg yad liz, yawd kha cawg lar che med nged jeg kor teq pa awg gha lia, saw ca huhd ve lehq sehr vid-oq,' lehd koz vid che yaog. ²⁶ Kheh te lehq awg ceg var u ve yawd mehz khuhd suhr huh nar khehr teh mi lar lehq koz che, 'Jawd mawd-og, ngag haq awg yand nehax a cehax lawg tar ax ser. Ngag awg gha lia saw ca khuhq sehr ax tug yaog,' lehd koz lawg khawx che yaog. ²⁷ Kheh te lehq jawd mawd awr Lehr yawd haq har kax cheaq te lehq yawd haq phehd vid lehq yawd ved jeg haq liz pong vid vehr che yaog.

²⁸ Awg yand u ve khuhn awg ceg var u ve tuhez che te yand, yawd geh jeg teq ha thehq cha lar che awg kag awr ve awg ceg te ghad haq yawd gha mawg lehq yug vega lehq kuhr pehg suhx chuhq lar lehq, 'Ngag ved jeg a meha har naq sehr laoq,' lehd koz vid che yaog. ²⁹ Kheh te lehq yawd geh jeg cha lar che awg ceg u ve te ghad awr Lehr nar khehr teh mi lar lehq koz che, 'Ngag haq awg yand nehax a cehax lawg tar ax. Ngag nawg haq ca khuhq sehr ax tug yaog,' lehd koz

lawg khawx che yaog. ³⁰ Kheh ma khuhd yawd maq na lehq jeg kawq sehr gha thad kha gag awg ceg var u ve haq thawnr khuhn yug ke lar che yaog. ³¹ Yawd che kheh te che haq awg kag awr ve awg ceg teq pa gha mawg che te yand, i hehd duhd har jad lehq awg lawn kha phehaq che teq pa awg sehr phad haq ca koz vid-eg che yaog. ³² Kheh te lehq yawd ved awg sehr phad yawd haq kug veba lehq koz vid che, ‘Haeg che awg ceg-og, nawg ngag haq lawg khawx cheaq te lehq nawg ved jeg awg gha lia haq ngag pong ax che yaog. ³³ Ngag nawg haq har kax che heh te lehq nawg liz su haq har kax vid cawd che yaog ma hez hawg la,’ lehd koz vid che yaog. ³⁴ Kheh te peg lehq yawd ved awg sehr phad nez nag jad lehq yawd ved jeg saw sehr peg thad kha gag thawnr khuhn yug ke lehq yawd haq du deh vid tug chid aq vid che yaog.

³⁵ Nig hehd teq pa liz a sug yawd ved a vix a nax te yaq che teq pa haq ni ma awg tawg kha gag vend bax ma phehd vid ver, muhd nuh maq lo chehd che ngag ved Awr pa liz nig hehd haq che kheh tea tug yaog,” lehz Yer suq i hehd haq koz vid che yaog.

19

Awg phad mawd awg mid ma chid bag daq che awg lawn Yer suq mar che

¹ Yer suq awg lawn che ve teq pa awg gha lia saw koz mar vid peg lehq yawd Gar liq lehd muhd mig lo tu lehq Yawd danr lawg kax ox pax awr lo cawg che Yud daq muhd mig lo kae che

yaog. ² Chaw kha peh vad-ag awg mor nux yawd khaz nuhr ghaq kae lehq yawd chaw nag u ve teq pa haq saw ghu na vid che yaog.

³ Awg yand u ve khuhn, Phar rir sehd ted pehg pehar yawd haq lawd ngawx tug lag lehq koz che, “A thoq ted ceng haq te lehq lehd ma koz awg lid tawd khuhd haq cud lehq a sug yawd ved awg mid ma haq chid bag gha hawg la,” lehd koz na ngawx che yaog.

⁴ Yer suq i hehd haq kawq koz vid che, †“Awg kawd maq thad huh te phanr sehr phad Ghig sa awr lehr haw khaz he lehq yad mid haq te phanr lar peg lehq koz che, ⁵ †‘Kheh te cheaq te lehq haw khaz awr lehr yawd ved awr pa awr ye haq phaz daq lar haz lehq yawd ved awg mid ma geh ca chehd lehq ix mag ni ghad liz teq suhr teq sar lehax phehq vehr che yaog.’ ⁶ Kheh te cheaq te lehq, ix mag awr lehr ni ghad mad kawq phehq-oq. Kheh te lar, te ghad lehax phehq vehr che yaog. Kheh te cheaq te lehq Ghig sa yug caz daq vid lar che haq chaw yad maq gha yug phaz daq vid hawg,” lehd koz vid che yaog.

⁷ Phar rir sehd teq pa kawq koz che, †“Kheh te ver, chid bag vid che liq te koz buhq vid peg ver chid bag gha hawg lehd a thoq te lehq Mod ser tawd pid lar cheawg le,” lehd koz yawd haq kawq na ngawx che yaog.

⁸ Yer suq i hehd haq kawq koz vid che, “Nig hehd ni ma heh cheaq te lehq a sug yawd ved awg mid ma haq chid bag tug Mod ser a khawag pehar che yaog. Kheh ma khuhd awg kawd maq

† **19:4** 19:4 Khiz 1:27, 5:2 † **19:5** 19:5 Khiz 2:24 † **19:7** 19:7

thad lo ver Ghig sa che kheh maq gha te lar.
⁹ Ngag nig hehd haq koz ax laq, hax chawd hax
 paz te che ted ceng ma hez ver a sug yawd ved
 awg mid ma haq chid bag lehq awg kag awg nuz
 awr ve yad mid haq he che chaw a sug te ghad
 lehd ma koz hax chawd hax paz te che yaog,”
 lehz Yer suq i hehd haq koz vid che yaog.

¹⁰ Awg laq ghuhd teq pa Yer suq haq koz vid
 che, “Awg phad mawd awg mid ma haq he che
 ted ceng che kheh phehq che ver, maq he che awr
 lex lehq daq jad che yaog,” lehd koz che yaog.

¹¹ Kheh te lehq Yer suq i hehd haq koz vid che,
 “Tawd khuhd che ve haq chaw gha lia khanr
 yug maq gha hawg. Khanr yug tug awg bon gha
 che chaw teq pa lehax khanr yug gha che yaog.

¹² Awg lawn ghod ver, chaw ted pehg pehar ver
 tanr paw tuhaz loar awg tawn phehq tuhaz che
 yaog. Chaw ted pehg pehar ver, awg tawn phehq
 vid tug su i hehd haq te vid che yaog. Chaw ted
 pehg pehar ver muhd nuh maq muhd mig awg
 pun a sug yawd ved awg ton haq chaw tawn te
 phehaq vid che yaog. Awg ceng che ve teq pa haq
 khanr yug gha che chaw teq pa awr lehr awg mid
 ma maq ca liz cawd che yaog,” lehd koz vid che
 yaog.

*Yer suq chaw yad nehax teq pa haq bon naq
 vid che*

¹³ Awg yand u ve khuhn chaw yad nehax teq
 pa haq Yer suq laq kuhr tar lehq bon lawg vid tug
 awg pun su yawd chehd lo sir veha lag che yaog.
 Awg laq ghuhd teq pa chaw yad nehax sir veha
 lag che chaw teq pa haq ded che yaog. ¹⁴ Kheh

ma khuhd Yer suq koz vid che, “Chaw yad nehax teq pa haq ngag chehd lo lag peha laoq. I hehd haq taq tawr lar. Awg lawn ghod ver, muhd nuh maq muhd mig awr lehr, chaw yad nehax che ve teq pa heh te che chaw ve muhd mig yaog,” lehd koz vid che yaog.

¹⁵ Chaw yad nehax teq pa haq laq kuhr tar vid peg lehq yawd liz u huh tuhz veh che yaog.

*Paw sa che chaw hax var te ghad Yer suq khaz
nuhr mad ghaq kae che*

¹⁶ Awg yand u ve khuhn chaw te ghad phad Yer suq chehd lo lag lehq koz che, “Sar lar-og, co tiq ha tiq haq gha tug ngag daq che kanx a thoq ted ceng gha te lawg le,” lehd koz na che yaog.

¹⁷ Yer suq kawq koz vid che, “A thoq te lehq nawg ngag haq daq che awg lawn na cheawg le. Daq che awg sehr phad te ghad lehax cawg che yaog. A saq teq kig lo nawg kae gad ver, awg lid tawd khuhd teq pa haq na yug lehq teoq,” lehz yawd haq koz vid che yaog.

¹⁸ [†]“Awg lid tawd khuhd khar ve ted mag le,” lehz yawd kawq na che te yand, Yer suq kawq koz vid che, “Chaw haq ta dawz vehr, hax chawd hax paz taq te, su ved med nged haq ta khuhd, su haq ma hez hez che sax khiz taq khanr, ¹⁹ nawr pa nawr ye haq yawz yawz yan yan teoq, [†]nawg awg ton haq haq che heh te lehq nawg pad huh chehd che chaw haq haq-oq,” lehd koz vid che yaog.

[†] **19:18** 19:18-19a Tuhz 20:12-16, Bon 5:16-20 [†] **19:19** 19:19b
Ak 19:18

20 Chaw hax var u ve phad koz che, “Awg ceng che ve teq pa awg gha lia ngag saw te peor. Ngag a thoq ted ceng gha kawq te ser lawg le,” lehd koz kawq na che yaog.

21 Yer suq yawd haq kawq koz vid che, “Nawg awg ceng gha lia saw lawq vid gad ver nawg koeq lehq nawg kha cawg lar che med nged jeg kor teq pa awg gha lia saw huhd lehq har yad ghuhd yad teq pa haq ca pehg vid-eq. Muhd nuh maq lo awg phuhd khaz che med nged nawg cawg lar tug yaog. U kheh te lar haz lehq nawg vawr kawaq lehq ngag khaz nuhr ghaq laoq,” lehd koz vid che yaog.

22 Chaw hax var u ve yawd tawd khuhd che ve haq gha kad che te yand, yawd duhd har jad che khuhn kawq veh che yaog. Awg lawn ghod ver yawd paw sa jad lehq med nged jeg kor cawg mad jad che yaog.

23 Yer suq yawd ved awg laq ghuhd teq pa haq koz vid che, “Ngag nig hehd haq awg cehg mag koz ax laq, paw sa che chaw teq pa awr lehr, muhd nud maq muhd mig khuhn gehe tug har jad che yaog. **24** Ngag nig hehd haq te pawz kawq koz ax laq sar, kar lar oq teq kheh a ghoq nar khuhn gehe che vawr, paw sa che chaw te ghad Ghig sa ve muhd mig khuhn gehe cheaq keh sa che yaog,” lehd koz vid che yaog.

25 Awg laq ghuhd teq pa tawd khuhd u ve haq gha kad che te yand, i hehd and jad lehq koz che, “Kheh te ver thaer khuhq che haq a sug gha vid tuawg le,” lehd koz che yaog.

26 Yer suq awg laq ghuhd teq pa haq ngawx lar lehq koz vid che, “Chaw yad vawr te maq gha

hawg. Kheh ma khuhd Ghig sa awr lehr awg ceng gha lia haq te gha che yaog," lehd koz vid che yaog.

²⁷ Awg yand u ve khuhn Per troq koz che, "Ngag hehd teq pa awr lehr awg ceng gha lia haq saw chid bag lar haz lehq nawg khaz nuhr ghaq tod che yaog. Kheh te ver ngag hehd teq pa a thoq gha tuawg le," lehd yawd haq koz vid che yaog.

²⁸ Yer suq i hehd teq pa haq koz vid che, "Ngag nig hehd haq awg cehg mag koz ax laq, mig gig awg suhx ghu te che awg yand khuhn chaw yad ve Yad phu awr lehr yawd ved awg mig awg phond cawg che kaw jaw awg thag lo mi che te yand, nig hehd teq pa ngag khaz nuhr ghaq tod che chaw teq pa liz kaw jaw teq chi nid mag awg thag lo mi lehq Id sar rer laq chaw teq chi nid ceng haq suhx gha jehg gha taz tug yaog. ²⁹ Ngag ved awg meh haq te lehq, a sug yawd ved yehg, a sug yawd ved a vix a nax, a sug yawd ved awr pa awr ye, a sug yawd ved awg yad awg dug, a sug yawd ved ti mi he lehq ha haq chid bag lar haz che chaw awg gha lia awr lehr, u ve haq keh teq ha pun kawq gha lehq co tiq ha tiq awg sinx haq liz gha tug yaog. ³⁰ Kheh ma khuhd su haq keh awg kawd chehd che chaw kha peh vad-ag, su khaz nuhr gha kawq chehd tug yaog. Su khaz nuhr chehd chehd che chaw kha peh vad-ag, su haq keh awg kawd chehd chehd lawz tug yaog.

20

A pehx med kho khuhn kanx te par teq pa awg

lawn

¹ Awg lawn ghod ver muhd nuh maq muhd mig awr lehr yawd ved a pehx med kho khuhn kanx te vid tug muhd sawx ted naq loar chaw ca veh che kho sehr phad te ghad haq sur daq che yaog.

² Yawd kanx canr te tu ghad phuhd teq ni ve ted thehq pid tug koz daq chez peg lehq yawd i hehd teq pa haq yawd ved a pehx med kho khuhn kanx te pe che yaog. ³ Muhd sawx phawd awr a lag kuhd nar rir heh te yand huh kho sehr phad yawd kax lo kawq kae lehq kax khuhn kanx mad cawg he lehq kheha chehd chehd che chaw teq pa haq yawd gha mawg che yaog. ⁴ 'Nig hehd teq pa liz ngag ved a pehx med kho khuhn kae lehq kanx ca te ver, nig hehd ve ghad phuhd kenr daq cawd daq che heh ngag nig hehd haq pehar tug yaog,' lehd yawd koz vid lehq ⁵ i hehd teq pa liz kae che yaog. Kheh te peg lehq kho sehr phad muhd kaw cuhaz huh te pawz he lehq muhd phiq phawd awr seh nar rir kheh yand huh te pawz kawq kae lehq u ve heh te che yaog. ⁶ Kheh te lehq muhd phiq phawd awr lo a lag kheh ngad nar rir te yand huh kho sehr phad te pawz kax lo kawq kae lehq chaw ted pehg teq chaweh maq te lehq kheha ca hox chehd cheaq yawd gha mawg lehq, 'Nig hehd teq pa a thoq te lehq teq ni tad vand chuhr huha lehax hox chehd cheawg le,' lehd koz i hehd haq na ngawx che yaog. ⁷ Chaw u ve teq pa kawq koz che, 'Chaw te ghad-eg liz ngag hehd haq kanx canr maq te cuha cheaq te lehq yaog,' lehz i hehd yawd haq kawq koz vid che te yand, kho sehr phad i hehd haq koz vid che, 'Nig hehd teq pa liz ngag ved a pehx med

kho khuhn kae lehq kanx ca te lor,’ lehz i hehd haq koz vid che yaog.

⁸ Muhd phiq vehr lehq kho sehr phad awr Lehr, ‘Kanx te che chaw teq pa haq ca kug-eq. Su khaz nuhr leh leha lag che te ghad haq tanr lehq awg kawd maq thad loar lag lehq te chehd che chaw awg gha lia haq i hehd ve ghad phuhd pid-oq,’ lehz yawd ved med nged haq sax var haq koz vid che yaog. ⁹ Muhd phiq pawd awr a lag kheh ngad nar rir te yand huh lag teag che chaw teq pa awr Lehr, te ghad ve ted thehq gha che yaog. ¹⁰ Su haq keh awg kawd maq lag lehq kanx ca teag che chaw teq pa lag che te yand, i hehd teq pa awr Lehr su haq keh lex lehq i hehd ve ghad phuhd gha mad jad tug yaog lehz duhd lar liz, i hehd teq pa te ghad ve ted thehq lehax gha che yaog. ¹¹ I hehd ve ghad phuhd yug peg che te yand, kho sehr phad haq khand lehq ded lehq koz vid che, ¹² ‘Awg khaz nuhr lo lag lehq ca teag che chaw teq pa awr Lehr, teq nar riar lehax kanx gha te che yaog. Kheh liz ngag hehd teq ni tad vand muhd cha awg chiz hehz kanx te nar che chaw teq pa haq kha sur suar nawg i hehd haq ghad phuhd pid che law,’ lehd koz vid che yaog. ¹³ Kheh te lehq kho sehr phad i hehd teq pa khuhn ve chaw te ghad haq kawq koz vid che, ‘Awg chawd-og, ngag nig hehd haq ma hez awr ca tea che ma hez hawg. Ngag nig hehd haq ted thehq lehax pehar tug koz daq lar che ma hez hawg la. ¹⁴ Nawg ved ghad phuhd haq yug ve lehq kae lor. Awg lawn ghod ver su khaz nuhr lo lag che chaw te ghad haq liz nawg kheh ma pid tug ngag ni ma cawd che yaog. ¹⁵ Ngag ved phu

haq ngag khawd-ehg kheh te yehd gad liz yehd tug a khawag cawg che ma hez hawg la. Ngag ni ma daq lehq su haq pid che haq nawg soer lehq la,’ lehd koz vid che yaog.

¹⁶ Che ve haq sur daq che yaog. Su khaz nuhr lo chehd che chaw awr lehr, su haq keh awg kawd maq chehd lawz tug yaog. Su haq keh awg kawd maq chehd lar che chaw awr lehr, su khaz nuhr lo kawq chehd chehd lawz tug yaog,” lehz Yer suq koz che yaog.

Yer suq yawd gha suh tug awg lawn te pawz kawq koz vid che

¹⁷ Kheh te lehq Yer suq yawd Yer ruq sar lehnر med lo kae tod che awg yand khuhn yawd ved awg laq ghuhd teq chi ni ghad haq lehax kug ve kae lehq yaq kaw kar lo i hehd teq pa haq koz vid che, ¹⁸ “A nig Yer ruq sar lehnر med lo kae tod che yaog. Chaw yad ve Yad phu awr lehr paw khod nux teq pa he lehq liq buhq var teq pa ve laq khuhr khuhn chid aq vid che haq gha khanr lehq yawd gha suh vid tug i hehd yawd haq suhx jehg suhx taz tug yaog. ¹⁹ Kheh te lehq su yawd haq maq sawnr ma caz te che, jawq che, laq kan thag huh thaq vehr che, awg ceng che ve teq pa haq gha khanr tug bid saz a naz chaw teq pa ve laq khuhn yawd haq chid aq vid tug yaog. Kheh ma khuhd sehr ni teq ni gaeg ver yawd kawq teq tuag tug yaog,” lehd koz vid che yaog.

Yar koq he lehq Yod hanr awg pun awr ye Yer suq geh a yad lawg vid che

²⁰ Awg yand u ve khuhn Yer ber dehd ve yad par ni ghad he lehq awr ye i hehd teq pa Yer suq

chehd lo lag lehq awr ye boz cuhx lar a kor pi
lehq yawd geh ted ceng lawg che yaog.

²¹ Yer suq yad mid u ve haq na lehq koz che,
“Nawg a thoq he gad lehq le,” lehd koz vid che
te yand, “Nawg ved muhd mig awg khuhn ngag
ved yad par che ve ni ghad haq nawg ved laq yaq
awr pax awr te ghad he lehq laq vehr awr pax
awr te ghad a cehax mi vid-oq,” lehd koz vid che
yaog.

²² Yer suq i hehd haq koz vid che, “Nig hehd a
thoq lawg chehd che haq nig hehd maq sir. Ngag
gha dawg tug kawz haq nig hehd dawg gha hawg
la,” lehd koz na ngawx che te yand, “Dawg gha
hawg,” lehz i hehd kawq koz vid che yaog.

²³ Yer suq i hehd haq koz vid che, “Ngag ved
kawz haq nig mag gha dawg cehg mag tug yaog.
Kheh ma khuhd a sug ngag ved laq vehr laq yaq
awr mi tug vawr, ngag pehar tug a khawag mad
cawg hawg. Ngag ved Awr pa i hehd awg pun
ghu teh vid lar che chaw teq pa lehax gha mi tug
yaog,” lehz i hehd haq koz vid che yaog.

²⁴ Awg lawn u ve haq awg kag awr ve cuh yad
teq chi ghad gha kad che te yand, awg vix awg
nax u ve ni ghad haq i hehd nez nag che yaog.

²⁵ Kheh te lehq, Yer suq i hehd teq pa awg gha lia
haq saw kug veha lehq koz vid che, “Bid saz a naz
chaw ve jawd mawd teq pa awr lehr i hehd muhd
mig yad haq uq penr lehq i hehd ve awg hox awg
nax teq pa liz muhd mig yad teq pa awg thag lo
kand pax haq yug lehq bax te nex te che yaog.

²⁶ Kheh ma khuhd, nig hehd teq pa awg khuhn
vawr che kheh maq gha te hawg. Nig hehd teq
pa awg khuhn chaw ir phehq gad che chaw a sug

te ghad lehd ma koz, yawd nig hehd ve awg ceg gha te che yaog. ²⁷ Nig hehd awg khuhn ve chaw awg hox te gad che chaw a sug te ghad lehd ma koz, nig hehd haq su vig yug lar che awg ceg te ghad heh gha phehq vid che yaog. ²⁸ Awg lawn ghod ver; chaw yad ve Yad phu heh te lehq su yawd awg pun kanx te vid tug lag che ma hez. Yawd vawr su awg pun kanx te tug lag lehq chaw kha peh vad haq pong vid tug, yawd ved a saq tand vid tug awg pun lag che yaog,” lehd koz che yaog.

Mehz cox var ni ghad mehz kawq mawg vehr che

²⁹ Yer suq he lehq yawd ved awg laq ghuhd teq pa Yer riq khod med khuhn tuhz veh tod-ag huh, chaw awg mor nux i hehd khaz nuhr ghaq veh che yaog. ³⁰ Awg yand u ve haq yaq kaw jad huh mi chehd che mehz cox var ni ghad awr Lehr Yer suq ix mag pad huh phanr veh tod che haq gha kad che te yand, “Dar viq ve Yad phu Jawd mawd-og, ngag nid-ag haq a cehax har kax laoq,” lehd koz huh kug che yaog.

³¹ Chaw mor nux ix mag haq, “Taq chuhax chehd-oq,” lehd koz ga ded chehd liz ix mag awr Lehr, “Dar viq ve Yad phu Jawd mawd-og, ngag nid-ag haq a cehax har kax laoq,” lehd koz lex lehq hax ceh nux maz kawq huh kug che yaog.

³² Kheh te lehq Yer suq jehd lehq ix mag haq kug veha lehq koz vid che, “Nig mag haq ngag a thoq tea vid gad lehq le,” lehd koz na ngawx che yaog.

³³ Kheh te lehq ix mag koz che, "Jawd mawdog, ngag nid-ag ve mehz sir mawg tug tea vid gad che yaog," lehz Yer suq haq koz vid che yaog.

³⁴ Kheh te lehq Yer suq ix mag haq har kax lehq ix mag ved mehz sir haq vad vid che yaog. Teq pear lehax ix mag ved mehz sir mawg vehr lehq ix mag liz yawd khaz nuhr ghaq veh che yaog.

21

Yer suq pix lar nehax haq cind lehq ghad sehr phad heh Yer ruq sar lehnr med khuhn gehe che

¹ Yer suq he lehq yawd ved awg laq ghuhd i hehd teq pa Yer ruq sar lehnr med pad lo gaeg lehq Sar lonr keh thang huh chehd che Ber phar ger khaz lo gaeg che te yand Yer suq yawd ved awg laq ghuhd ni ghad haq kae pe lehq koz che,

² "Nig mag mehz khuhd suhr huh cawg che khaz u ve khuhn tanr gehe ver, pix lar awr ye ma he lehq awg yad nehax pheh teh lar che haq gha mawg tug yaog. Niq kheh kheha phi lehq ngag chehd lo seh veba laoq. ³ Chaw te ghad ghad nig mag haq te ceng ceng koz na ver, 'Jawd mawd lor che yaog,' lehd kawq koz vid-oq. Yawd har naq pehar vehr tug yaog," lehd koz vid che yaog.

⁴ Awg lawn che ve awr lehr, Ghig sa ve cuh kar var koz lar che tawd khuhd heh phehaq vid tug awg pun te che yaog. Yawd koz lar che, ⁵ "Yid onr ve med yad teq pa haq che kheh koz vid-oq. †'Ngawx lor, nig hehd ve Jawd mawd awr lehr, ni ma nud nehg che khuhn pix lar ma he lehq

† 21:5 21:5 Isy 62:11, Ykh 9:9

awg yad nehax haq cind lehq nig hehd chehd lo
lag chehd che yaog,’ ”
lehd koz lar che yaog.

⁶ Awg laq ghuhd u ve ni ghad khaz u ve khuhn
kae lehq Yer suq ix mag haq cuh che heh ca te
che yaog. ⁷ Ix mag awr lehr pix lar awr ye ma
he lehq awg yad nehax haq seh vea lehq pix lar
u ve awg thag huh a poq kuhz kaq vid peg lehq
Yer suq taz cind vid che yaog. ⁸ Yawd haq awg
mig awg phond pid che awg hez te tug, chaw
awg mor awg cud nux awg khuhn chaw ted pehg
pehar ver a sug yawd ved a poq yug lehq yaq kaw
khuhn khawd vid lehq ted pehg pehar ver suhz
pir ca chuh veha lehq yaq kaw khuhn khawd vid
che yaog. ⁹ Yer suq ghud med awr he lehq kuhr
tehx nuhr hez tod che chaw mor nux teq pa kaod
kug lehq koz che, [†]“Dar viq ve Yad phu haq Ho
sa na phehq vid-oq. Jawd mawd Ghig sa ve awg
meh khuhn lag che chaw haq awg bon ir vid-oq.
Muhd nuh maq lo chehd che ir jad muh jad che
Ghig sa haq liz Ho sa na phehq vid-oq,” lehd koz
che yaog.

¹⁰ Yer suq Yer ruq sar lehnر med khuhn gehe
che te yand, med yad teq pa awg gha lia phoz koz
daq che diz vad-ag he lehq, “Che ve phad che a
suawg le,” lehd koz na daq che yaog.

¹¹ “Chaw che ve phad awr lehr, Gar liq lehd
muhd mig Nar sar rehq med lo lag che Ghig sa
ve cuh kar var Yer suq yaog,” lehz chaw awg mor
nux koz che yaog.

Bon yehg nux haq daq kehg vid tug te che

[†] 21:9 21:9 Chid 118:25-26

12 Yer suq bon yehg nux awg vaw khuhn gehe lehq u huh med nged huhd daq pa daq chehd che chaw awg gha lia haq saw ghaq kog lehq phu pa chehd che teh cuh he lehq a pia kar mi huhd chehd che mi khuhd teq pa haq liz yawd saw phuhz chid bag che yaog. **13** † “Ngag ved yehg haq bon lawg kig yehg,” lehd koz lehq Liq phu khuhn buhq lar liz nig hehd teq pa awr lehr yehg che ve haq chaw khuhd chehd kig yehg yug te vehr che law,” lehz Yer suq i hehd haq koz vid che yaog.

14 Mehz cox var teq pa he lehq khi lug laq lug che chaw teq pa bon yehg nux khuhn Yer suq chehd lo lag lehq yawd i hehd teq pa haq ghu na vid che yaog. **15** Paw khod nux he lehq liq buhq var teq pa awr lehr, Yer suq te che and tug teq pa he lehq bon yehg khuhn chaw yad nehax teq pa, “Dar viq ve Yad phu haq Ho sa na phehq vid-oq,” lehd koz kug chehd che haq i hehd gha mawg che te yand, i hehd nez nag jad che yaog. **16** “Chaw yad nehax che ve teq pa khawd-ehg kheh koz kug chehd che haq, nawg kad chehd-aq la,” lehd koz Yer suq haq na ngawx che te yand, Yer suq kawq koz che, “Ngag kad chehd che yaog.

† ‘Nawg awg pun chid muh che tawd khuhd
chaw yad nehax teq pa he lehq
cux pehz nux chehd che yad nehax teq pa ve
mawg kaw khuhn
tuhaz vid tug nawg te vid lar peor,’
lehd koz lehq Liq phu khuhn buhq lar che haq
nig hehd teq pa maq gha ghawn jaw lehq la,”

† **21:13** 21:13 Isy 56:7 † **21:16** 21:16 Chid 8:3

lehz i hehd haq koz vid che yaog.

¹⁷ Kheh te peg lehq Yer suq awr lehr i hehd teq pa haq phaz daq lar haz lehq med u ve khuhn tuhez lehq Ber tar niq khaz khuhn ca hax-eg che yaog.

Yer suq a kud cehg haq khen vid che

¹⁸ Muhd thid-ag lehq muhd sawx ted naq Yer suq med khuhn koeq tod che awg yand khuhn yawd awr meq vehr che yaog. ¹⁹ Awg yand u ve khuhn yaq kaw jad huh cuhz chehd che a kud cehg ted cehg haq yawd gha mawg lehq ca ngawx-eg che te yand awg sir mad nuhq lehq awg phaq lehax cawg che haq yawd gha mawg che yaog. Kheh te lehq Yer suq a kud cehg haq koz vid che, “Yaq ni khaz nuhr ver nawg awg sir te pawz-a liz maq gha kawq nuhq hawg,” lehd koz vid che te yand, teq pear lehax awg nuhr tiq awg god khehz te lehq suh vehr che yaog.

²⁰ Awg laq ghuhd teq pa u ve haq gha mawg che te yand, “A kud cehg che ve a thoq te lehq teq pear lehax nuhr lehq god suh vehr che lehq nar,” lehd koz lehq Yer suq haq na ngawx che yaog.

²¹ Yer suq kawq koz che, “Ngag nig hehd haq awg cehg mag koz ax laq. Nig hehd yonr che ni ma thuhd phuhz nuhg phuhz maq te ver, a kud cehg che ve haq ngag te gha cheaq keh liz nig hehd teq pa vawr kawq te gha nuhr, keh che ve ted dig haq, ‘Jiz kae lehq lad chuhd ghig khuhn gehe lor,’ lehd koz vid ver, koz vid che heh te vehr tug yaog. ²² Nig hehd yonr che khuhn bon lawg ver, nig hehd kha lawg che awg ceng teq pa

haq Ghig sa tea tug yaog," lehz i hehd haq koz vid che yaog.

Yer suq kand pax gha che awg lawn su yawd haq na ngawx che

²³ Yer suq bon yehg nux awg khuhn gehe lehq mar vid chehd-ag huh paw khod nux teq pa he lehq muhd mig yad ve awg hox chaw mawd teq pa yawd chehd lo lag lehq, "Nawg khar lo kand pax gha lehq che kheh te cheawg le. Kand pax u ve a sug nawg haq pehar cheawg le," lehd koz na ngawx che yaog. ²⁴ Yer suq kawq koz vid che, "Ngag liz nig hehd haq tawd te khuhd na ngawx sar. Nig hehd yaw khuhq ax gha ver, ngag khar lo kand pax gha lehq che kheh te che awg lawn nig hehd haq koz ax tug yaog. ²⁵ Yod hanr yawd a kaz tur vid tug kand pax a sug pid lar cheawg le. Ghig sa geh la, ma hez ver chaw yad geh la," lehd i hehd haq na ngawx che yaog. I hehd teq pa phoz jehg daq lehq koz che, "'Muhd nuh maq lo gha cheawg,' lehz a nig koz ver, 'A thoq te lehq nig hehd yawd haq maq yonr cheawg le,' lehz yawd a nig haq kawq koz tug yaog. ²⁶ 'Chaw yad teq pa geh gha cheawg,' lehd koz ver, muhd mig yad teq pa haq kuhz tug cawg che yaog. Awg lawn ghod ver Yod hanr awr lehr Ghig sa ve cuh kar var te ghad yaog lehz chaw kheh ma ve yonr chehd che yaog," lehz i hehd koz daq che yaog. ²⁷ Kheh te cheaq te lehq, "Ngag hehd maq sir," lehz i hehd teq pa Yer suq haq kawq koz vid che yaog. Yer suq i hehd haq kawq koz vid che, "Kheh te ver, ngag liz khar lo kand pax gha lehq che kheh te

che awg ceng teq pa ngag nig hehd haq ma koz ax hawg.

Yad par ni ghad awg lawn tawd par hax te mar che

²⁸ Awg lawn che ve haq nig hehd khawd-ehg kheh duhd chehd-aq le. Chaw te ghad yawd ved yad ni ghad cawg che yaog. Awg vix var te ghad haq yawd koz vid che, 'Yad par-og, yaq ni a pa ve a pehx med kho khuhn kanx ca teoq,' lehd koz vid che yaog. ²⁹ 'Ngag maq kae-og,' lehz awg yad par u ve kawq koz vid che yaog. Kheh ma khuhd awg khaz nuhr maq muh tand yawd ni ma kawq pa vehr lehq kawq kae che yaog. ³⁰ Kheh te lehq awg nax var te ghad geh liz awr pa kawq kae lehq koz vid che, 'Yad par-og, yaq ni a pa ve a pehx med kho khuhn kanx ca teoq,' lehd koz vid che yaog. Kheh te lehq awg yad par che ve kawq koz che, 'Ngar paog, ngag kae tug yaog,' lehz awg yad par koz vid che yaog. Kheh ma khuhd, yawd mad kawq kae. ³¹ Yad par u ve ni ghad a sug te ghad vawr, awr pa ve a lor haq te che law le," lehd i hehd haq na ngawx che te yand, "Awg vix var te ghad yaog," lehz i hehd Yer suq haq kawq yaw khuhq vid che yaog.

Kheh te lehq Yer suq i hehd haq koz vid che, "Ngag nig hehd haq awg cehg mag koz ax laq, awg khawnr ghawz var he lehq meh mar lanx teq pa awr lehr, nig hehd teq pa haq keh awg kawd Ghig sa ve muhd mig awg khuhn gha gehe tug yaog. ³² Awg lawn ghod ver, Yod hanr awr lehr thed che cawd che yaq kaw haq tod lag lehq nig hehd geh lag che liz nig hehd maq yonr. Kheh

ma khuhd, awg khawnr ghawz var he lehq meh mar lanx teq pa vawr, i hehd Yod hanr haq yonr che yaog. Nig hehd awr lehr che ve teq pa haq gha mawg peg liz vend bax haq ma duhd phuhz lehq Yod hanr haq maq yonr che yaog.

Mad daq che a pehx med kho te var awg lawn tawd par hax te mar che

³³ Tawd par hax che ve ted mag haq kha sehax na ngawx ser. Yehg sehr phad te ghad awr lehr, a pehx med kho ted mag te peg lehq kho liz kha sehax caw ko lar lehq a pehx med ghig nex kig liz kha nehax dud lehq te lar che yaog. Kheh te lehq, muhd-aq lo taz law kig liz te peg lehq kho u ve su kho te cad var haq ngar vid lar haz lehq, yawd vawr awg bag muhd mig lo veh che yaog.

³⁴ A pehx med sir meh vehr lehq awg sir sax yand gaeg che te yand, kho sehr phad u ve yawd ved awg ceg var teq pa haq a pehx med sir sax lehq pehg daq tug, kho ngar vid lar che teq pa chehd lo kae pe che yaog. ³⁵ Kheh ma khuhd, kho ngar te cad var u ve teq pa awr lehr awg sehr phad ve awg ceg var u ve teq pa haq yug lehq, te ghad haq vawr ga phuhz dawz lehq, te ghad haq vawr dawz vehr lehq, te ghad haq vawr huhx meh ga bag che yaog.

³⁶ Awg khaz nuhr te pawz gaeg lehq kho sehr phad yawd ved awg ceg var teq pa haq awg kawd maq te pawz kae pe cheaq keh, mad chawa kawq kae pe che yaog. Kheh liz, kho ngar te cad var u ve teq pa awr lehr i hehd haq liz awg kawd maq thad ve teq pa haq te vid che heh, kawq te vid che yaog.

³⁷ Awg leh med te pawz gaeg lehq kho sehr phad, 'Ngag ved awg

yad par haq, i hehd yawz yan tug yaog,’ lehz koz lehq yawd haq i hehd chehd lo kae pe che yaog.

³⁸ Kheh ma khuhd, kho ngar te var teq pa yad par u ve haq gha mawg che te yand, ‘Chaw che ve awr lehr awg sinx gha awg ka gha sehr phad te ghad yaog. Lar-og, yawd haq dawz vehr lehq yawd ved awg sinx a nig yuag veg,’ lehz i hehd teq pa koz daq che yaog. ³⁹ Kheh te lehq kho ngar te var u ve teq pa kho sehr phad ve awg yad par haq yug lehq kho awg bag phawd awr lo yug chid bag pe lehq dawz vehr che yaog.

⁴⁰ Kheh te lehq kho sehr phad lag che te yand, kho ngar te var u ve teq pa haq yawd khawd-ehg kheh te vid tuawg le,” lehz Yer suq i hehd haq na ngawx che yaog.

⁴¹ I hehd teq pa Yer suq haq kawq koz vid che, “Haeg jad che chaw u ve teq pa haq hehnd jad che awg khuhn te lehq gha dawz vehr tug yaog. A pehx med sir meh vehr ver awg sehr phad haq kawq pehg khuhq vid gha che chaw teq pa haq kawq ngar vid,” lehd koz vid che yaog.

⁴² Yer suq i hehd haq koz vid che,

†“ ‘Yehg kawx par teq pa chid bag lar che huhx meh dig vawr,
a yed ir jad che, awg cir huh tanr kawx lar
che huhx meh dig phehq vehr che yaog.

Awg ceng che ve awr lehr, Jawd mawd Ghig sa te
lar che kanx te lehq,
a nig mehz khuhd suhr and tug awg ceng
phehq vehr che yaog,’

† **21:42** 21:42 Chid 118:22-23

lehz Liq phu awg khuhn buhq lar che haq nig hehd maq gha ghawn jaw lehq la. ⁴³ Kheh te lehq ngag nig hehd haq koz ax laq. Ghig sa ve muhd mig awr lehr nig hehd awg khuhn yug tuhz lehq Ghig sa ve a lor haq te lehq awg sir nuhq che chaw teq pa haq kawq pid tug yaog. ⁴⁴ Huhx meh dig u ve thag huh kuhd kaq che chaw teq pa awr lehr awg ghuhd awg mi tehz te veh tug yaog. Kheh te lehq chaw a sug te ghad thag huh lehd ma koz, huhx meh dig u ve che kaq ver, chaw u ve awr lehr awg mi tehz veh tug yaog,” lehd koz vid che yaog. ⁴⁵ Yawd koz chehd che tawd par hax u ve teq pa haq paw khod nux teq pa he lehq Phar rir sehd teq pa gha kad che te yand, yawd i hehd awg lawn koz chehd che law lehz i hehd gha sir che yaog. ⁴⁶ I hehd teq pa Yer suq haq pheh yug gad liz, chaw mor nux haq kuhz che yaog. Awg lawn għod ver Yer suq awr lehr Ghig sa ve cuh kar var phehq che yaog lehz i hehd teq pa yonr chehd che yaog.

22

Khehx cad che awg lawn tawd par hax te mar che

¹ Kheh te lehq Yer suq i hehd haq tawd par hax te pawz kawq te mar vid lehq koz che, ² “Għig sa ve muhd mig awr lehr yawd ved yad par awg pun khehx cad tug għu lar che jawd mawd te għad haq sur che yaog. ³ Khehx ca cad-ag vid tug kug lar che chaw teq pa haq, ‘Cad laoq,’ lehd koz ca kug vid tug, yawd ved awg ceg teq pa haq yawd kae pe liz, chaw u ve teq pa mad lag.

⁴ Kheh liz, te pawz awg kag awr ve awg ceg teq pa haq jawd mawd u ve te pawz kawq kae pe lehq, ‘ “Cad tug teq pa haq kha nehax ghu lar peor. Ngag ved nud haq dawz lehq nud yad nehax awg phoq chuhd te che haq liz dawz lehq saw te lar peor. Cad laoq,” lehd koz lehq kug lar che chaw teq pa haq ca koz vid-eq,’ lehz yawd koz vid che yaog. ⁵ Kheh ma khuhd, awg lawn u ve haq i hehd teq chaweh ma duhd ngawx lehq te ghad vawr ha khuhn veh lehq te ghad vawr tad kag ca te veh che yaog. ⁶ Awg kag awr ve chaw teq pa awr lehr, yawd ved awg ceg teq pa haq yug pheh lar phuhz dawz peg lehq dawz vehr che yaog. ⁷ Jawd mawd nez nag jad lehq yawd ved maq yad teq pa haq kae pe lehq yawd ved awg ceg haq dawz vehr che chaw teq pa haq saw dawz vehr lehq i hehd ve med haq liz a mir saw tox ke vehr che yaog. ⁸ Kheh te lehq jawd mawd yawd ved awg ceg var teq pa haq yawd koz vid che, ‘Khehx cad tug haq ngag kha sehax ghu lar peor. Kheh ma khuhd khehx cad kig lo lag tug ngag kug lar che chaw che ve teq pa awr lehr lag maq kenr. ⁹ Kheh te cheaq te lehq, yaq kaw tad lonx khad teq pa lo kae lehq chaw kha mawg che teq pa haq khehx cad kig lo saw ca kug veha laoq,’ lehd koz vid che yaog. ¹⁰ Kheh te lehq awg ceg var u ve teq pa yaq kaw tad lonx nux maz teq pa lo kae lehq kha mawg che chaw awg gha lia, mad daq che chaw lehd ma koz, daq che chaw lehd ma koz, saw ca kug veha lehq khehx cad kig lo lag che chaw kha peh vad-ag phehq vehr che yaog.

¹¹ Khehx cad-ag che chaw teq pa haq jawd

mawd ca geh ngawx-ag che te yand, haw khaz var te ghad yawd khehx cad kig lo lag che haq maq hawr che beg ke veq tod che chaw te ghad haq yawd gha mawg che yaog. ¹² Kheh te lehq, jawd mawd koz vid che, ‘Awg chawd-og, khehx cad kig lo lag tug beg ke liz mad veq lehq khawd-ehg kheh te khehx cad kig lo lag gag cheawg le,’ lehd koz vid che te yand, haw khaz var u ve teq chaweh liz kawq koz vid maq gha. ¹³ Kheh te lehq awg yand u ve khuhn jawd mawd awg ceg teq pa haq koz vid che, ‘Yawd ved khi kud laq kuhr haq yug tehr chuhq lehq awg bag lo awg naz tud teag lo yug chid bag peoq. U huh kha chehd che chaw teq pa awr lehr cig geq yuhz cheq lar lehq gha kug huhg paz huhg chehd tug yaog,’ lehd koz vid che yaog. ¹⁴ Awg lawn ghod ver kug yug lar che chaw kha peh vad-ag cawg liz, lez yug che chaw teq pa vawr, a ceanax lehax cawg che yaog,” lehz Yer suq koz che yaog.

Jawd mawd nux Kehd sar haq awg khawnr ke che awg lawn

¹⁵ Awg yand u ve khuhn Phar rir sehd teq pa tuhez lehq Yer suq tawd yaw yaq cuh vid tug awg khad ca lehq jehg daq che yaog. ¹⁶ Kheh te lehq, i hehd ve awg laq ghuhd teq pa he lehq jawd mawd Her roq ve chaw teq pa haq Yer suq chehd lo kae pe che yaog. I hehd kae lehq koz che, “Sar lar-og, nawg awr lehr thed che cawd che chaw phehq lehq Ghig sa ve yaq kaw haq thed-e ghad mar vid che yaog. Nawg chaw te ghad-eg haq liz ma kuhz lehq su ved mehz khuhd haq liz maq ngawx che haq ngag hehd sir che

yaog. ¹⁷ Kheh te cheaq te lehq, nawg khawd-ehg kheh duhd lar che ngag hehd haq a cehax koz ax laoq. Jawd mawd nux Kehd sar haq awg khawnr ke vid cawd hawg la. Maq ke vid cawd hawg la,” lehd koz na ngawx che yaog.

¹⁸ Kheh ma khuhd, i hehd ve ni ma kuhq che haq Yer suq sir vehr lehq, “Chaw her ka var teq paog, nig hehd a thoq te lehq ngag haq lawd ngawx cheawg le. ¹⁹ Awg khawnr ke chehd che phu ted thehq yug veba ngag a cehax ngawx-ag,” lehd koz vid lehq i hehd yawd haq phu ted thehq yug maw vid che yaog. ²⁰ Yer suq i hehd haq koz vid che, “A sug ved awg han he lehq a sug ved awg meh cawg law le,” lehd koz na ngawx che te yand,

²¹ “Jawd mawd nux Kehd sar ve yaog,” lehz i hehd kawq koz vid che yaog. Kheh te lehq Yer suq i hehd haq kawq koz vid che, “Kheh te ver jawd mawd nux Kehd sar ve med nged ver, jawd mawd nux Kehd sar haq kawq khuhq vid-oq. Ghig sa ve med nged ver, Ghig sa haq khuhq vid-oq.”

²² Tawd khuhd u ve haq i hehd gha kad che te yand, and jad vehr lehq i hehd teh lar haz lehq kawq vehr che yaog.

Kawq teq tuag che awg lawn su yawd haq na che

²³ Kawq teq tuag che mad cawg hawg lehd koz che Sar duq kehd chaw teq pa u ve teq ni khuhn Yer suq geh ca na-ag lehq koz che, ²⁴ “Sar largog, Mod ser koz lar che, †Haw khaz var te ghad

yad mad cawg ser lehq suh vehr ver, awg nax var yawd ved awg mid ma haq kawq he lehq awg vix var awg pun awg ceng awg khad gha cawg vid che yaog,’ lehd koz lar che yaog. ²⁵ Te pawz thad huh ngag hehd geh ve awg vix awg nax suhr ghad cawg che yaog. Awg vix var nux u ve te ghad awg mid ma he lehq yad mad cawg ser tand, suh vehr lehq awg mid ma u ve awg nax var haq teh vid lar haz che yaog. ²⁶ U ve haq kha sur suar ni ghad te ghad, seh ghad te ghad he lehq suhr ghad kha gag che ve heh lehax te lar haz lehq saw suh vehr che yaog. ²⁷ Awg khaz nuhr gaeg lehq yad mid u ve liz suh vehr che yaog. ²⁸ Kheh te lehq, kawq teq tuag che te yand, yad mid ma u ve te ghad a sug mid ma gha te lawg le. Awg lawn ghod ver yad mid ma u ve haw khaz u ve teq pa awg gha lia haq he jaw peg che yaog,” lehd koz na ngawx che yaog.

²⁹ Yer suq i hehd haq kawq koz vid che, “Liq phu he lehq Ghig sa ve kand pax haq nig hehd teq pa na maq gha cheaq te lehq, nig hehd teq pa duhd yaq vehr che yaog. ³⁰ Awg lawn ghod ver kawq teq tuag che te yand, awg phad mawd awg mid ma he daq che lehd ma koz, laq kuhr cax vid che lehd ma koz, maq te. Muhd nuh maq cuh yad heh saw phehq vehr che yaog. ³¹ Chaw suh kig lo kawq teq tuag che awg lawn Ghig sa nig hehd haq koz ax lar che haq nig hehd maq gha ghawn jaw la. ³² †Ngag vawr Ar brar hanr ve Ghig sa, Id caq ve Ghig sa he lehq Yar koq ve Ghig sa phehq che yaog,’ lehz yawd koz lar

† 22:32 22:32 Tuhz 3:6, 3:15

che yaog. Yawd awr lehr suh che chaw teq pa ve Ghig sa phehq che ma hez. Teq chehd che chaw teq pa ve Ghig sa phehq che yaog," lehz Yer suq i hehd haq koz vid che yaog. ³³ Tawd khuhd u ve haq chaw awg mor nux gha kad che te yand, yawd mar vid che tawd khuhd u ve haq i hehd teq pa and jad che yaog.

Awg liq tawd khuhd awg gha lia awg khuhn suaq keh ir jad che awg lid tawd khuhd

³⁴ Sar duq kehd teq pa Yer suq haq tawd kawq yaw khuhq maq gha che awg lawn Phar rir sehd teq pa gha kad che te yand i hehd teq geha phoz lag che yaog. ³⁵ I hehd ve awg mor awg khuhn awg lid tawd khuhd sir jad che te ghad Yer suq haq lawnd ngawx che khuhn che kheh koz vid che yaog. ³⁶ "Sar lar-og, awg lid tawd khuhd teq pa awg khuhn khar ve ted mag vawr awg lid tawd khuhd awg gha lia khuhn suaq keh ir jad cheawg le," lehd koz yawd haq na ngawx che yaog.

³⁷ Yer suq kawq koz vid che, † "Nawg ved ni ma awg gha lia, nawg ved co ha awg gha lia he lehq nawg ved duhd khad awg gha lia nawg ved Jawd mawd Ghig sa haq gha haq che yaog." ³⁸ Che ve awr lehr, awg lid tawd khuhd awg gha lia haq keh ir jad che awg lid tawd khuhd he lehq awg kawd maq ve awg lid tawd khuhd ted mag phehq che yaog. ³⁹ Ni khuhd te khuhd liz che ve haq sur daq che yaog. †Nawg awg ton haq haq che heh te lehq nawg pad nawg ki huh chehd che chaw teq pa haq gha haq che yaog. ⁴⁰ Awg

† 22:37 22:37 Bon 6:5 † 22:39 22:39 Ak 19:18

lid tawd khuhd awg gha lia he lehq Ghig sa ve cuh kar var teq pa ve tawd khuhd kha buhq lar che awg gha lia cuhx kig tawd khuhd che ve nid mag awg khuhn lo lehax saw chehd chehd che yaog," lehd koz che yaog.

Dar viq ve Yad phu awg lawn Yer suq i hehd haq na ngawx che

⁴¹ Phar rir sehd teq pa phawng daq chehd-ag huh, Yer suq i hehd teq pa haq na lehq koz che,
⁴² "Khreq awg lawn haq nig hehd teq pa khawd-ehg kheh duhd cheawg le. Yawd a sug ved yad phu phehq cheawg le," lehd koz na ngawx che yaog.

"Yawd awr lehr Dar viq ve yad phu phehq che yaog," lehd I hehd yawd haq kawq koz vid che yaog. ⁴³ Yer suq kawq koz che, "Kheh te ver Awg ha phu Dar viq haq duhd pawnr vid lehq a thoq te lehq yawd haq, 'Jawd mawd,' lehd koz cheawg le. ⁴⁴ Awg lawn ghod ver Dar viq koz che,

†'Jawd mawd Ghig sa vawr ngag ved Jawd mawd haq koz vid che,

"Nawg ved cand par teq pa haq nawg ved khi ho awg huhx lo ngag tar thad kha gag

ngag ved laq yaq awr pax awr mi lar-oq," lehd koz lar che yaog.' ⁴⁵ Dar viq yawd haq, 'Jawd mawd,' lehd koz ver, yawd awr lehr khawd-ehg kheh te lehq Dar viq ve yad phehq cheawg le," lehd koz na ngawx che yaog. ⁴⁶ Chaw te ghad-eg yawd haq tawd teq per-a liz kawq yaw khuhq vid maq gha lehq u ve teq ni haq tanr lehq

su te ghad-eg liz yawd haq tawd kawq na ngawx
maq pir vehr che yaog.

23

*Phar rir sehd he lehq liq buhq var teq pa awg
lawn Yer suq sa tiq pid che*

¹ Awg yand u ve khuhn Yer suq chaw awg mor nux he lehq yawd ved awg laq ghuhd teq pa haq koz vid che, ² “Liq buhq var teq pa he lehq Phar rir sehd teq pa vawr Mod ser ve awg lid tawd khuhd mar tug a khawag cawg che yaog. ³ Kheh te cheaq te lehq, i hehd teq pa nig hehd haq kha mar che awg ceng teq pa haq na yug lehq teog. Kheh ma khuhd, i hehd te che heh taq te. Awg lawn ghod ver i hehd koz mar che vawr ted ceng te che vawr ted ceng te che yaog. ⁴ Huhd jad che med nged awg veg nux su haq cuhx puhr vid che heh te lehq i hehd chaw yad teq pa haq awg lid hehnd jad lehq yehd har jad che te teh vid che yaog. Kheh te lar, i hehd ve awg ton vawr laq nuh med nehax ted mag nehax liz maq ga chid vid che yaog. ⁵ I hehd kha te che kanx awg ceng gha lia chaw yad teq pa ngawx mawg vid tug lehax te che yaog. Liq phu awg tawn nehax doz puhd kig liz awg nux maz te lehq a poq awg jog med liz awg yehg du nux te deh che yaog. ⁶ I hehd vawr thi cad thi dawg kig lo liz awg mig awg phond cawg che mi kig haq mi lehq bon lawg kig khuhn liz su mehz khuhd suhr lo awg mig awg phond cawg kig lo ca mi gad jad che yaog. ⁷ I hehd teq pa awr lehr, kax khuhn lo su i hehd haq tar ir yawz yan vid gad che he lehq su i hehd haq, ‘Sar

lar,' lehd koz ax che haq, i hehd he gad jad che yaog. ⁸ Su nig hehd haq, 'Sar lar,' lehd taq gha koz vid. Awg lawn ghod ver nig hehd Sar lar te ghad lehax cawg lehq nig hehd teq pa awr lehr a vix a nax lehax yaog. ⁹ Mig gig khod-aq lo te ghad-eg haq liz, 'Awr pa,' lehd ta koz. Awg lawn ghod ver nig hehd muhd nuh maq lo chehd che Awr pa te ghad lehax cawg che yaog. ¹⁰ Kheh te lehq su nig hehd haq Seh kae sehr phad lehd taq gha koz vid. Awg lawn ghod ver Khreq te ghad lehax nig hehd haq seh kae sehr phad phehq che yaog. ¹¹ Nig hehd awg khuhn ve suaq keh ir jad che chaw te ghad awr lehr, su ved awg ceg gha te che yaog. ¹² A sug yawd awg ton haq tar ir che chaw a sug te ghad lehd ma koz, tar i che haq gha khanr tug yaog. A sug yawd awg ton haq tar i che chaw a sug te ghad lehd ma koz, tar ir che haq gha tug yaog.

¹³ Liq buhq var he lehq Phar rir sehd, chaw her ka var teq paog, nig hehd gha duhd har jad tug yaog. Awg lawn ghod ver, chaw yad teq pa muhd nuh maq muhd mig awg khuhn gehe tug haq, nig hehd ghaz mir hoz tehr lar che yaog. Nig hehd liz maq gehe he lar lehq, gehe gad che chaw teq pa haq liz nig hehd tawr chuhd lar che

yaog.* **15** Liq buhq var he lehq Phar rir sehd, chaw her ka var teq paog, nig hehd gha duhd har jad tug yaog. Awg lawn ghod ver, chaw te ghad nig hehd ve awg laq ghuhd phehaq vid tug, mig gig thag lo he lehq lad chuhd ghig thag lo veaq ted kag peg ted kag ca kaod mar che yaog. Chaw te ghad nig hehd ve awg laq ghuhd phehq vehr che te yand, nig hehd awr Lehr yawd haq muhd naz hoq khuhn nig hehd haq keh nig pun kheh taw maq gha khanr tug te vid che yaog.

16 Yaq kaw mar sehr phad mehz cox var teq paog, nig hehd gha duhd har jad tug yaog. Nig hehd mar lar che, 'Chaw te ghad ghad bon yehg nux haq cud lehq khanr lar ver, yawd khanr lar che heh maq te liz teq chaweh ma hez hawg. Kheh ma khuhd, bon yehg nux ve si haq cud lehq khanr lar ver, yawd khanr lar che heh gha te che yaog,' lehz nig hehd koz mar che yaog. **17** Mehz cox che chaw kar var-og, khar ve ted ceng vawr a yed a cehax ir hawg le. Si vawr ir cheawg la. Ma hez ver si haq daq vid ja vid gha che bon yehg nux vawr ir cheawg la. **18** Nig hehd koz che, 'Chaw te ghad ghad tand kig haq cud lehq khanr lar che ver, yawd khanr lar che heh maq te liz teq chaweh ma hez hawg. Kheh ma khuhd, tand

* **23:13** 23:14 Liq phu ted pehg awg khuhn ka nad nehax che ve cawg che yaog. "Liq buhq var he lehq Phar rir sehd, chaw her ka var teq paog, nig hehd gha duhd har jad tug yaog. Awg lawn ghod ver, meh chuhd ma ve yehg haq nig hehd her ka yug lar lehq, awg thang phawd awr lehax ma hez che te lehq bon pehz muh mehz lawg che yaog. Kheh te cheaq te lehq, nig hehd awr Lehr su haq keh hehnd jad che cir yanr che haq gha khanr tug yaog."

kig awg thag lo cawg che tand tug haq cud lehq khanr lar che ver, yawd khanr lar che heh gha te che yaog,' lehz nig hehd koz che yaog. ¹⁹ Mehz cox var teq paog, khar ve ted ceng vawr a yed ir cheawg le. Tand tug vawr ir cheawg la. Ma hez ver, tand tug haq daq vid ja vid gha che tand kig vawr ir cheawg la. ²⁰ Kheh te cheaq te lehq tand kig haq cud lehq khanr lar che chaw teq pa awr lehr, tand kig he lehq u ve awg thag huh kha cawg chehd che teq pa haq saw cud lehq khanr lar che yaog. ²¹ Chaw khar ve te ghad lehd ma koz, bon yehg nux haq cud lehq khanr lar ver, bon yehg nux he lehq u ve khuhn chehd che phad haq cud lehq khanr lar che yaog. ²² Muhd nuh maq haq cud lehq khanr lar che chaw khar ve te ghad lehd ma koz, Ghig sa ve kaw jaw he lehq kaw jaw thag huh mi chehd sehr phad haq cud lehq khanr lar che yaog.

²³ Liq buhq var he lehq Phar rir sehd, chaw her ka var teq paog, nig hehd gha duhd har jad tug yaog. Awg lawn ghod ver, nig hehd awr lehr, a sur, i khind he lehq muhd noer teq pa haq teq chi pun teq pun tand vid lehq awg lid tawd khuhd awg khuhn cawg che a yed ir jad che teq pa, thede ghad cawd-aw ghad te che, har kax vix che he lehq yonr che, che ve teq pa haq nig hehd maq te. Che ve teq pa haq liz nig hehd teq pa te cawd lehq, lex lehq awg kag awg nuz awr ve awg ceng haq liz nig hehd te cawd che yaog. ²⁴ Yaq kaw mar sehr phad mehz cox var teq paog, nig hehd awr lehr, a kaz dawg tug khuhn cawg che a pix phehq tug a kaz puhd ma nehax haq che kha lar haz liz, kar lar oq teq ton maq ve haq lehd dawg

ke pe che yaog.

²⁵ Liq buhq var he lehq Phar rir sehd, chaw her ka var teq paog, nig hehd gha duhd har jad tug yaog. Awg lawn ghod ver nig hehd teq pa awr lehr, a khehd he lehq kawz khehd teq pa haq awg bag phawd awr lehax chuhd liz, awg khuhn phawd awr vawr, lawd phaq pehz ir mehz he lehq her ka yug gad che kha peh vad-ag cawg chehd che yaog. ²⁶ Mehz cox var Phar rir sehd teq paog, a khehd he lehq kawz khehd haq awg khuhn phawd awr awg kawd chuhd ser, u kheh te ver awg bag phawd awr liz daq kehg vehr tug yaog.

²⁷ Liq buhq var he lehq Phar rir sehd, chaw her ka var teq paog, nig hehd gha duhd har jad tug yaog. Awg lawn ghod ver, nig hehd awr lehr, phux-u ghad te che gehz lar che chaw tur phuh haq sur daq che yaog. Chaw tur phuh u ve awg bag phaw awr ver pehz daq mehz te chehd liz, awg khuhn phawd awr ver, chaw ghuhd khawaz lehax he lehq awg chaq chiz te che kha peh vad-ag te chehd che yaog. ²⁸ Che ve haq sur daq che yaog. Nig hehd awr lehr, awg thag phawd awr chaw yad ngawx mawg che ver, thed che cawd che chaw phehq che haq sur che yaog. Kheh ma khuhd, awg khuhn phawd awr ver, her ka che he lehq haeg che awg ceng kha peh vad-ag cawg chehd che yaog. ²⁹ Liq buhq var he lehq Phar rir sehd, chaw her ka var teq paog, nig hehd gha duhd har jad tug yaog. Awg lawn ghod ver nig hehd teq pa awr lehr, Ghig sa ve cuh kar var teq pa ve tur phuh teq pa haq ghu te lehq, thed che cawd che chaw teq pa ve kawx lar che tur phuh

teq pa haq ngawx sa tug te che yaog. ³⁰ Kheh te lehq nig hehd koz che, 'Ngag hehd teq pa a nig ved awg pux awr pi co u ve haq gha chehd cawd che heh ver, Ghig sa ve cuh kar var teq pa haq ngag hehd maq ga dawz vehr hawg,' lehz nig hehd koz che yaog. ³¹ Nig hehd che kheh koz che awr lehr, Ghig sa ve cuh kar var teq pa haq dawz vehr che chaw teq pa ve awg yad awg dug phehq che yaog lehz, nig hehd a sug yawd awg ton awg lawn sax khiz khanr chehd che yaog. ³² Kheh te lehq, nig hehd teq pa liz nig hehd ve awg pux awr pi teq pa te che haq te peg vid tug teoq. ³³ Vig haeg awg tuhq ma hehnd jad che yad teq paog, suhx jehg suhx taz che te yand nig hehd khawd-ehg kheh te ver muhd naz hoq haq pong gha tuawg le. ³⁴ Kheh te cheaq te lehq, cuh kar var, cud yiq cawg var he lehq liq buhq var teq pa haq ngag nig hehd chehd lo lag peha tug yaog. Nig hehd awr lehr ted pehg pehar haq yug dawz vehr lehq, laq kan thag huh thaq vehr tug yaog. Ted pehg pehar haq nig hehd ve bon lawg kig awg khuhn jawq lehq, te med peg te med lo nig hehd kae lehq ghaq dawz vehr tug yaog. ³⁵ Kheh te cheaq te lehq, thed che cawd che Ar ber laq ve awg suhr haq tanr lehq, bon yehg nux he lehq tand kig awg kar huh nig hehd dawz vehr che Bar rar khiq yad par Yar khar riq ve awg suhr thad kha gag, mig gig koar lo kha sez lar peg che thed che cawd che chaw teq pa ve awg suhr awg gha lia nig hehd haq chiag tug yaog. ³⁶ Ngag nig hehd haq awg cehg mag koz ax laq, awg ceng che ve teq pa haq te lehq Ghig sa chaw a meha teq co ve haq cir yanr tug yaog.

*Yer ruq sar lehnr med awg pun Yer suq duhd
har jad che*

³⁷ Yer ruq sar lehnr med-og, Yer ruq sar lehnr med-og, khar thad liz Ghig sa ve cuh kar var teq pa haq nig hehd dawz vehr lehq, nig hehd geh lag peha che chaw teq pa haq huhx meh bag vehr che yaog. Ghaz ye ma awr Lehr, yawd ved awg yad teq pa haq yawd ved tawg laq huhx uh saw chehd vid gad che heh te lehq, nig hehd ve awg yad awg dug teq pa haq ngag huhx lo khar ni pawz phoz chehd vid gad liz, nawg ngag haq maq te cuh-a. ³⁸ Ngawx lor, nig hehd ve chehd kig awr Lehr, awg gawg cux yen ghad tor ghad veh tug yaog. ³⁹ Kheh te cheaq te lehq, ngag nig hehd haq koz ax laq, †Jawd mawd Ghig sa ve awg meh khuhn lag che chaw te ghad haq awg bon ir videoq,’ lehz nig hehd ma koz che kheh ceh, nig hehd ngag haq maq gha kawq mawg hawg,” lehd koz che yaog.

24

Bon yehg nux haq te lug tug

¹ Yer suq bon yehg nux khuhn tuhz veh tod che awg yand khuhn yawd ved awg laq ghuhd teq pa lag lehq, bon yehg nux awg vaw khuhn ve yehg teq pa yawd haq bez mar vid che yaog. ² Yer suq i hehd haq koz vid che, “Yehg che ve teq pa haq nig hehd mawg chehd-aq la. Ngag nig hehd haq awg cehg mag koz ax laq, yehg che ve teq pa awr Lehr, huhx meh ted dig thag huh ted dig mad cawg vehr thad kha gag su te lug tug yaog.”

† 23:39 23:39 Chid 118:26

Awg leh med gag vehr tez che awg hez teq pa

³ Yer suq Sar lonr keh thag huh mi chehd che awg yand khuhn, yawd ved awg laq ghuhd teq pa lehax yawd chehd lo lag lehq, "Awg ceng che ve teq pa khar thad phehaq tug le. Nawg kawq yaq tug he lehq mig gig che ve awg yand leh tug awg hez khawd-ehg kheh phehaq tug awg le. Ngag hehd haq a cehax koz ax laoq," lehd koz vid che yaog.

⁴ Yer suq i hehd haq kawq koz vid che, "Chaw te ghad-eg liz nig hehd haq maq gha her ka yug tug, sa tiq taoq. ⁵ Awg lawn ghod ver, chaw kha peh vad-ag ngag ved awg meh haq ca uhx lar lehq, 'Ngag awr lehr Khreq yaog,' lehd koz lehq, chaw kha peh haq ca kaod her ka lehq ca beg yug tug yaog. ⁶ Maq bawz che he lehq bawz daq lehd te chehd che awg khuhd haq nig hehd gha kad tug yaog. Kheh liz, nig hehd ta kuhz. Awg lawn ghod ver, awg ceng che ve teq pa awg cehg mag phehaq liz, mig gig ve a saq awg leh med mad gag ser hawg. ⁷ Chaw ceng ted ceng he lehq ted ceng, muhd mig te pez he lehq te pez yaq daq jiz daq tug yaog. Meq che kaz che he lehq mig hiz che teq pa ted kag peg ted kag lo phehaq tug yaog. ⁸ Awg ceng che ve teq pa awr lehr, yad mid yad paw tug ux peg tanr nag che haq sur che yaog.

⁹ Awg yand u ve khuhn, su nig hehd haq pheh ve lehq du deh lehq, dawz vehr tug yaog. Awg lawn ghod ver, nig hehd ngag ved chaw phehq cheaq te lehq chaw ceng awg gha lia nig hehd haq ngawx bawg tug yaog. ¹⁰ Kheh te lehq, awg yand u ve haq chaw mad awr ve yonr che ted

ceng haq chid bag vehr tug yaog. Kheh te lehq, te ghad he lehq te ghad kawq phuhz daq lehq cand daq tug yaog. ¹¹ Ma hez hez che cuh kar var teq pa liz kha peh vad-ag tuhaz lehq, chaw kha peh haq ca kaod her ka lehq hax ceh ca beg yug tug yaog. ¹² Awg lawn ghod ver, haeg che awg ceng cawg mad-ag cheaq te lehq, chaw mad awr ve haq pehnd che ted ceng yawnd vehr pehz vehr che yaog. ¹³ Kheh ma khuhd, awg leh med kha gag yeg chehd che chaw teq pa awr lehr, thaer khuhq che haq gha tug yaog. ¹⁴ Chaw ceng awg gha lia Ghig sa ve muhd mig awg lawn gha kad vid tug awg pun, ha lehg che bon khuhd che ve mig gig khod-aq awg kag gha lia lo ca koz mar vid tug yaog. U kheh te peg ver, awg leh med gag vehr tug yaog.

¹⁵ Kheh te lehq, liq che ve haq gha ghawn che chaw awr lehr sir-oq. Ghig sa ve cuh kar var Dar yer laq koz lar che heh te lehq, te lug te sez vix che chaq chiz che awg ceng awr lehr, daq kehg che chehd kig khuhn hox chehd che haq nig hehd gha mawg che te yand, ¹⁶ Yud daq muhd mig khuhn chehd che chaw teq pa haq kehaq lo phaw taez vid. ¹⁷ Yehg thag lo chehd che chaw a sug yawd ved yehg khuhn med nged ca geh yug tug taq yaeq. ¹⁸ Ha khuhn chehd che chaw teq pa liz, a sug yawd ved beg ke veq kad taq ca kawq yug tod. ¹⁹ Awg ni awg yand u ve haq gaeg ver, yad mid yad hu chehd che he lehq yad nehax cucx pehz nux chehd che chaw teq pa awr lehr, phehq bawg jad tug yaog. ²⁰ Nig hehd gha phawe tug awg yand u ve awr lehr, muhd kaz che awg

yand he lehq Sa ba to awg ni ve awg yand haq maq gha cawd daq vid tug bon lawg-oq. ²¹ Awg lawn ghod ver, mig gig haq tanr te phanr che teq ni haq tanr lehq yaq ni kha gag mad phehaq jaw ser lehq, che ve khaz nuhr liz mad kawq phehaq tug, tuq jad khanr jad che ted ceng awr lehr, u huh phehaq tug yaog. ²² Awg yand u ve mad yug ngeh vid ver, chaw te ghad-eg liz a saq gha pong kig mad cawg. Kheh ma khuhd, lez yug lar che chaw teq pa haq te lehq, awg yand u ve teq pa haq yug ngeh vid lar che yaog.

²³ Awg yand u ve khuhn, chaw te ghad ghad lag lehq, 'Ngawx chuhr, Khreq chuhr huh chehd chehd che yaog. Od lo chehd chehd che yaog,' lehz nig hehd haq koz ax ver taq yonr. ²⁴ Awg lawn ghod ver, ma hez hez che Khreq he lehq ma hez hez che cuh kar var teq pa tuhaz tug yaog. I hehd awr lehr, te gha ver lez yug lar che chaw teq pa haq liz her ka yug beg yug gha tug, ir che and tug he lehq awg hez teq pa te maw vid tug yaog. ²⁵ Kha sehax tawnd lar mehr. Mad phehaq ser thad loar, ngag nig hehd haq sa tiq pehar lehq koz ax lar peg che yaog.

²⁶ Kheh te cheaq te lehq, 'Ngawx chuhr, Khreq heh pir lo chehd chehd che yaog,' lehd koz liz taq kae. 'Bawehd awg khuhn lo Khreq chehd chehd che yaog,' lehd koz liz taq yonr. ²⁷ Awg lawn ghod ver, muhd ni tuhz phawd awr lo muhd pehq che awr lehr, muhd ni kehg phawd awr lo pawd che heh te lehq, chaw yad ve Yad phu kawq yaq tug awr lehr, che ve heh te lehq lag tug yaog.

²⁸ Suh chehd che awg ton khar lo cawg liz, nag beg ngaz teq pa u huh phoz lag tug yaog.

Chaw yad ve Yad phu kawq yaq tug awg yand

²⁹ †Tuq che khanr che awg yand u ve peg vehr khaz nuhr, teq pear lehax muhd ni awg naz tud te lehq, har pa liz awg ghiz mad kawq pawd. Muhd ki sir teq pa muhd-aq lo cheag lehq, muhd nuh maq ve kand pax cawg che a yad teq pa liz hiz hiz nez nez phehq vehr tug yaog. ³⁰ †Awg yand u ve haq, chaw yad ve Yad phu ve awg hez muhd nuh maq lo tuhaz tug yaog. Mig gig koar lo ve chaw ceng awg gha lia paz huhg kehd huhg lehq, chaw yad ve Yad phu awr lehr, awg mig awg phond ir lehq kand pax cawg che khuhn muhd nuh maq ve mog thag lo cind lehq yaq che haq gha mawg tug yaog. ³¹ Kheh te peg ver, behd pehz hehnd mehz mez lehq yawd yawd ved muhd nuh maq cuh yad teq pa kae pe tug yaog. Kheh te lehq, muhd nuh maq cuh yad teq pa muhd uhg cir mig uhg phawd lo lez yug lar che chaw teq pa haq yug phawng daq vid tug yaog.

³² A kud cehg haq tehz mar che tawd par hax che ve haq hend yug-oq. Awg kax tuhaz lehq awg car car vehr ver, muhd god yand gag vehr tez che haq nig hehd gha sir che yaog. ³³ Che ve haq su daq che yaog. Awg ceng che ve teq pa phehaq che haq nig hehd gha mawg che te yand, yawd awr lehr, yehg ghaz mir khuh pad huh lag gag vehr che haq nig hehd sir-oq. ³⁴ Ngag nig hehd haq awg cehg mag koz ax laq, chaw che ve teq coaq ve maq suh ser huh, awg ceng che ve teq pa saw phehaq tug yaog. ³⁵ Muhd nuh maq he lehq mig naz ma mehx vehr tug yaog. Kheh

† 24:29 24:29 Isy 13:10, 34:4, 5 † 24:30 24:30 Dyl 7:13

ma khuhd, ngag ved tawd khuhd awr lehr maq
mehx vehr hawg.

*Ghig sa ma hez ver awg ni awg hax u ve chaw
te ghad-eg liz maq sir hawg*

³⁶ Awg ni awg hax u ve haq chaw te ghad-eg liz maq sir. Muhd nuh maq cuh yad teq pa liz, Yad phu liz, maq sir. Awr pa te ghad lehax sir che yaog. ³⁷ Chaw yad ve Yad phu kawq yaq tug awr, Nod ar ve awg co heh phehq tug yaog. ³⁸ Nod ar huh lawd kor khuhn gehe che teq ni thad kha gag, a kaz maq thunr ser che awg yand khuhn, i hehd awr lehr cad che dawg che, awg phad mawd awg mid ma he daq lehq laq kuhr cax che, che kheh te chehd che yaog. ³⁹ A kaz thunr lag lehq i hehd haq po chid ve veh thad kha gag i hehd maq sir che heh te lehq, chaw yad ve Yad phu kawq yaq che te yand liz, che ve haq kha sur suar lag tug yaog. ⁴⁰ Awg yand u ve khuhn, chaw ni ghad ha khuhn lo teq geha chehd che liz, te ghad haq sir ve lehq te ghad haq teh lar haz tug yaog. ⁴¹ Yad mid ni ghad teq geha huhx meh mawr giz chehd liz, te ghad haq sir ve lehq te ghad haq teh lar haz tug yaog. ⁴² Kheh te cheaq te lehq, nig hehd ve Jawd mawd khar ve teq ni haq kawaq tug nig hehd maq sir cheaq te lehq kha nehax ghu hehnd lehq law laor. ⁴³ Yehg sehr phad awr lehr, chaw khuhd lag tug awg yand sir chehd heh ver, yawd ved yehg khuhn chaw khuhd maq gha gehag vid tug yawd kha nehax paog lar vehr tug yaog lehz nig hehd sir laor. ⁴⁴ Kheh te cheaq te lehq, nig hehd liz kha nehax ghu lar hehnd laor. Awg lawn ghod ver,

nig hehd ma duhd ma gad che awg yand awg khuhn, chaw yad ve Yad phu kawq yaq tug yaog.

⁴⁵ Kar tiq yeg lehq cud yiq cawg che awg ceg te ghad awr lehr, a suawg le. Awg sehr phad ve yehg ka yad awg khuhn awg kag awr ve awg ceg teq pa haq awg yand cawd cawd cad tug dawg tug pehg car vid tug awg pun yawd ved awg sehr phad awr lehr, awg ceg var u ve haq awg hox te cuh vid che yaog. ⁴⁶ Awg ceg te ghad che kheh te lehq kanx kha sehax te chehd che haq yawd ved awg sehr pha kawaq lehq gha mawg ver, awg ceg u ve awr lehr awg bon ir che yaog. ⁴⁷ Ngag nig hehd haq awg cehg mag koz ax laq, awg sehr phad awr lehr, yawd ved med nged jeg kor awg gha lia awg ceg var u ve haq awg hox te cuh vid tug yaog. ⁴⁸ Kheh ma khuhd, haeg jad che awg ceg var u ve te ghad awr lehr, 'Ngag ved jawd mawd har naq mad kawaq tag ser hawg,' lehd duhd lehq, ⁴⁹ awg kag awg nuz awr ve awg ceg var teq pa haq dawz lehq, juhg dawg buhz che chaw teq pa geh cad chehd dawg chehd tug yaog. ⁵⁰ Awg ceg u ve ma duhd ma gad che awg ni awg yand awg khuhn mad juhg tand, yawd ved awg sehr phad kawq gag ver, ⁵¹ yawd haq toq nux te puhr vid lehq, mawg kig huh ver ted ceng, mad mawg kig lo ver ted ceng te che chaw teq pa geh ghaq kog pe tug yaog. U huh kha chehd che chaw teq pa awr lehr, paz huhg kehd huhg chehd lehq cig geq yuhz cheq lar che yaog.

25

Yad mid hax teq chi ghad awg lawn tawd par

hax te mar che

¹ Kheh te lehq, muhd nuh maq muhd mig awr Lehr, a sug yawd ved a mir khehd haq yug lar lehq awg mid ma he sehr phad haq law haq yug chehd che yad mid hax teq chi ghad haq sur daq che yaog. ² I hehd awg khuhn ve ngad ghad vawr, cud yiq mad cawg lehq ngad ghad vawr, cud yiq cawg che yaog. ³ Cud yiq mad cawg che yad mid ngad ghad vawr, a sug yawd ved a mir khehd lehax yug ve kae lar lehq nag mand kawq ke thehnur tug mad yug ve kae che yaog. ⁴ Kheh ma khuhd, cud yiq cawg che yad mid ngad ghad vawr, a sug yawd ved a mir khehd he lehq peg vehr ver kawq ke thehnur tug nag mand haq liz yug ve kae che yaog. ⁵ Awg mid ma he sehr phad har naq mad lag cheaq te lehq, yad mid hax u ve teq pa awg gha lia yuhq mir geq lehq yuhq mir saw ka vehr che yaog.

⁶ Muhd khax te khend lo gaeg lehq, ‘Awg mid ma he sehr phad lag vehor. Yawd haq ca haq yug laoq,’ lehd koz kug che yaog. ⁷ Kheh te lehq yad mid hax u ve teq pa tuag lehq, a sug yawd ved a mir khehd haq tox che yaog. ⁸ Cud yiq mad cawg che yad mid ngad ghad u ve awr Lehr, cud yiq cawg che yad mid ngad ghad haq koz vid che, ‘Ngag hehd ve a mir khehd suh vehr lehd te cheaq te lehq, ngag hehd haq nag mand nehax a cehax kawq pehg ax,’ lehd koz vid che yaog. ⁹ Kheh ma khuhd, cud yiq cawg che teq pa kawq koz vid che, ‘Ngag hehd awg pun he lehq nig hehd awg pun nag mand mad lawq hawg. Kheh te cheaq te lehq, nag mand huhd par geh ca vir-eg,’ lehd koz vid che yaog. ¹⁰ Kheh te lehq i

hehd teq pa nag mand ca vig tod che te yand, awg mid ma he sehr phad lag lehq, ghu lar hehnd lar che chaw teq pa khehx cad kig lo yawd geh teq geha gehg veh peg lehq, ghaz mir hoz lar vehr che yaog.

¹¹ Awg khaz nuhr, yad mid hax cud yiq mad cawg che ngad ghad kawaq lehq, 'Jawd mawd-og, Jawd mawd-og, ngag hehd haq ghaz mir a cehax phawa laoq,' lehd koz kug che yaog. ¹² Kheh ma khuhd, yawd kawq koz che, 'Ngag nig hehd haq awg cehg mag koz ax laq, ngag nig hehd haq a cehax liz maq sir daq,' lehd koz vid che yaog.

¹³ Kheh te cheaq te lehq, nig hehd khar thad liz kha sehax ghu hehnd lehq law lar. Awg lawn ghod ver, ngag khar thad kawaq tug awg ni, awg yand nig hehd maq sir hawg.

Awg ceg var seh ghad awg lawn tawd par hax te mar che

¹⁴ Muhd nuh maq muhd mig awr lehr, awg sehr phad te ghad awg bag muhd mig lo kae-ag lehd te lehq, yawd ved med nged jeg kor haq ngawx haq sax vid tug, awg ceg var teq pa haq kug lehq aq vid lar haz che haq sur daq che yaog. ¹⁵ I hehd teq pa pix che cheng che haq yawd ngawx lehq, te ghad haq phu ngad hinx, te ghad haq niq hinx he lehq te ghad haq teq hinx pid lar haz lehq yawd veh che yaog. ¹⁶ Phu ngad hinx gha che awg ceg var te ghad vawr, har naq phu u ve yug ve lehq tad kag ca te cheaq te lehq, awg mehaq ngad hinx kawq gha che yaog. ¹⁷ Phu niq hinx gha che awg ceg var te ghad liz, awg mehaq niq hinx kawq gha che yaog. ¹⁸ Kheh ma khuhd, phu

teq hinx gha che chaw te ghad vawr, yawd ved awg sehr phad ve phu u ve yug lehq mig kor dud lehq khuhd ceh lar che yaog.

¹⁹ Awg khaz nuhr awg yand muh vehr lehq, awg sehr phad kawaq che yaog. Kheh te lehq, yawd awg ceg var u ve teq pa phu khawd-ehg kheh te yehd che haq kug na ngawx che yaog.

²⁰ Phu ngad hinx gha lar che awg ceg var te ghad vawr, awg mehaq liz ngad hinx kawq yug veha lehq koz che, 'Jawd mawd-og, nawg ngag haq phu ngad hinx pehar lar che yaog. Ngawx-oq, ngag awg mehaq liz ngad hinx kawq gha veha vehr che yaog,' lehd koz vid che yaog. ²¹ Yawd ved awg sehr phad koz che, 'Nawg te che daq vehr che yaog. Kar tiq yeg lehq daq che thed che awg ceg-og, i che awg ceng haq nawg thed cheaq te lehq, mad che awg ceng haq ngawx haq sax tug, ngag nawg haq aq ax tug yaog. Nawg liz ngag geh teq geha ga ha lehg laoq,' lehz yawd haq koz vid che yaog.

²² Phu niq hinx gha lar che te ghad liz lag lehq, 'Jawd mawd-og, nawg ngag haq phu niq hinx pehar lar che yaog. Ngawx-oq, ngag awg mehaq liz niq hinx kawq gha vehr che yaog,' lehd koz vid che yaog. ²³ Yawd ved awg sehr phad koz che, 'Nawg te che daq vehr che yaog. Kar tiq yeg lehq daq che thed che awg ceg-og, i che awg ceng haq nawg thed cheaq te lehq, mad che awg ceng haq ngawx haq sax tug, ngag nawg haq aq ax tug yaog. Nawg liz ngag geh teq geha ga ha lehg laoq,' lehz yawd haq koz vid che yaog.

²⁴ Phu teq hinx lehax gha lar che awg ceg var liz lag lehq koz che, 'Jawd mawd-og, nawg awr lehr te har che chaw te ghad phehq

che haq ngag sir che yaog. Nawg maq ser lar kig lo nawg ghiq yug lehq, nawg maq kha lar kig lo awg sir awg no haq nawg ghawz phoz che haq ngag sir che yaog. ²⁵ Kheh te lehq ngag kuhz cheaq te lehq, nawg ved phu haq ngag yug lehq mig kor khuhn dud fiz lehq khuhd ceh lar che yaog. Ngawx chuhr, nawg ved med nged nawg haq kawq khuhq pehar che yaog,’ lehd koz vid che yaog. ²⁶ Awg sehr phad ded lehq koz vid che, ‘Haeg jad che chaw bawg var-og, maq ser lar kig lo ngag ghiq yug lehq, maq kha lar kig lo awg sir awg no haq ngag ghawz phoz che haq nawg sir chehd ver, ²⁷ phu che ve yug ve lehq phu chid vid kig thawnr yehg khuhn liz ca ke lar cawd che yaog. U kheh te ver, ngag kawaq che te yand ngag ved phu che ve he lehq awg mehaq haq liz ngag kawq gha tug yaog. ²⁸ Kheh te lehq, yawd geh phu teq hinx haq yug khuhq lehq, phu teq minr cawg che chaw te ghad haq pid-oq. ²⁹ Awg lawn ghod ver, cawg chehd che chaw awg gha lia haq kawq thehnr vid lehq, yawd kha peh vad-ag cawg tug yaog. Kheh ma khuhd, mad cawg che chaw geh, yawd kha cawg lar che haq liz kawq yug ve tug yaog. ³⁰ Kheh te peg lehq, awg bon mad cawg che awg ceg var te ghad haq awg bag lo awg naz tud teag lo yug chid bag peoq. U huh kha chehd che chaw teq pa awr lehr, kug huhg paz huhg chehd lehq cig geq yuhz cheq lar tug yaog,’ lehz awg sehr phad koz che yaog.

Chaw ceng awg gha lia haq suhx jehg tug

³¹ Chaw yad ve Yad phu lag che te yand, yawd ved awg mig awg phond ir jad che khuhn lag

lehq, muhd nuh maq cuh yad awg gha lia yawd
 geh lag lehq, yawd ved awg mig awg phond cawg
 che kaw jaw awg thag lo yawd mi tug yaog.
³² Awg yand u ve khuhn, chaw ceng awg gha lia
 yawd mehz khuhd suhr huh phoz lag vid lehq,
 yawg huhx var, yawg he lehq a chiq haq pehg
 daq che heh te lehq, yawd i hehd teq pa haq pehg
 daq tug yaog. ³³ Yawg teq pa haq yawd ved laq
 yaq awr phawd awr tar lehq, a chiq teq pa haq
 laq vehr awr phawd awr tar tug yaog. ³⁴ Awg
 yand u ve khuhn, laq yaq awr phawd awr ve
 chaw teq pa haq Jawd mawd che kheh koz vid
 tug yaog. 'Ngag ved Awr pa geh awg bon gha
 che chaw teq paog, laoq. Mig gig te phanr thad
 loar nig hehd awg pun ghu lar che muhd mig
 awg khuhn ca chehd laoq. ³⁵ Awg lawn ghod
 ver, ngag awr meq che te yand, nig hehd ngag
 haq awr canr che yaog. Ngag a kaz sex che te
 yand, nig hehd ngag haq a kaz tawa che yaog.
 Ngag khehx chaw phehq che te yand, nig hehd
 ngag haq haq Yug ax che yaog. ³⁶ Ngag beg ke
 veq kad mad cawg che te yand, nig hehd ngag
 haq veq deh ax che yaog. Ngag nag guhg che
 te yand, nig hehd ngag haq ngawx haq sax che
 yaog. Ngag thawnr khuhn chehd che te yand,
 nig hehd ngag haq ca ngawx-ag che yaog,' lehd
 yawd koz tug yaog. ³⁷ Awg yand u ve khuhn,
 thed che cawd che chaw yawd haq che kheh koz
 yaw khuhq vid tug yaog. 'Jawd mawd-og, nawg
 awr meq che haq ngag hehd gha mawg lehq awr
 canr che khar thad le. Nawg a kaz sex che haq
 ngag hehd gha mawg lehq a kaz tawa che khar
 thad le. ³⁸ Nawg khehx chaw phehq che haq ngag

hehd gha mawg lehq haq yug ax che khar thad le. Beg ke veq kad mad cawg lehq beg ke veq kad feax che khar thad le. ³⁹ Nawg nag guhg che lehd ma koz, thawnr khuhn chehd che lehd ma koz, ngag hehd gha mawg lehq nawg haq ca ngawx-ag che khar thad le,’ lehd kawq koz vid tug yaog. ⁴⁰ Kkeh te lehq, Jawd mawd i hehd haq kawq koz vid che, ‘Ngag nig hehd haq awg cehg mag koz ax laq, i jad che a vix a nax nig hehd awg khuhn ve chaw te ghad haq nig hehd te vid che awr lehr, ngag haq tea che yaog,’ lehz i hehd haq kawq koz vid tug yaog.

⁴¹ Kkeh te lehq, laq vehr awr phawd awr chehd che chaw teq pa haq yawd che kkeh koz ded vid tug yaog. ‘Khen che haq gha khanr che chaw teq paog, ngag haq phaz daq ve lehq, ned haeg he lehq yawd ved cuh yad teq pa awg pun ghu lar che co co tar taer toq chehd che a mir awg khuhn gehe log. ⁴² Awg lawn ghod ver, ngag awr meq thad nig hehd ngag haq teq chaweh liz maq canr. Ngag a kaz sex thad, nig hehd ngag haq teq chaweh liz maq tawa. ⁴³ Ngag khehx chaw phehq thad, nig hehd ngag haq mad haq yug ax. Ngag beg ke veq kad mad cawg thad, nig hehd ngag haq beg ke veq kad maq feax. Ngag nag guhg thad lehd ma koz, thawnr khuhn chehd thad lehd ma koz, nig hehd ngag haq maq ca ngawx-ag,’ lehd koz vid tug yaog. ⁴⁴ Kkeh te lehq i hehd liz koz che, ‘Jawd mawd-og, nawg awr meq che, a kaz sex che, khehx chaw phehq che, beg ke veq kad mad cawg che, nag guhg che, thawnr khuhn chehd che haq ngag hehd gha mawg lehq, nawg haq maq ga che khar thad le,’ lehz yawd haq

kawq koz vid tug yaog. ⁴⁵ Awg yand u ve khuhn, Jawd mawd kawq koz vid che, 'Ngag nig hehd haq awg cehg mag koz ax laq, chaw che ve teq pa awg khuhn i jad che chaw nehax te ghad haq nig hehd maq te vid cheaq te lehq, ngag haq nig hehd maq tea che yaog,' lehz i hehd haq kawq koz vid tug yaog. ⁴⁶ Kheh te cheaq te lehq, i hehd awr lehr, co co tar taer cir yanr che haq gha khanr yug tug yaog. Kheh ma khuhd, thed che cawd che chaw teq pa awr lehr, co co tar taer a saq teq che haq gha haq yug tug yaog," lehz Yer suq koz vid che yaog.

26

Yer suq haq dawz vehr tug awg hox teq pa jehg daq che

¹ Awg lawn u ve teq pa haq Yer suq saw koz lar haz peg lehq, yawd ved awg laq ghuhd teq pa haq yawd koz vid che, ² "Che khaz nuhr niq ni gaeg ver Par sar khar pawehd* gag tug haq nig hehd liz sir chehd che yaog. Chaw yad ve Yad phu haq laq kan thag huh thaq vehr tug chid aq vid che haq yawd gha khanr tug yaog," lehd koz vid che yaog.

³ Kheh te lehq, paw khod nux teq pa he lehq Yud daq chaw teq pa ve awg hox chaw mawd teq pa vawr, Kar yar phaq meh che paw khod nux ve chehd kig lo jehg daq lehq, ⁴ Yer suq haq khawdehg kheh te pheh yug lehq dawz vehr gha tug, i hehd awg khad ca lehq khuhd jehg daq che yaog.

* **26:2** 26:2 Par sar khar pawehd Ghig sa ga lehq Ed jid tuq muhd mig khuhn yug pong ax che haq, duhd nuhd che pawehd.

⁵ Kheh ma khuhd i hehd koz daq che, "Muhd mig yad teq pa maq gha kaod suq saq tug pawehd te chehd che awg yand che ve khuhn taq te ser," lehd koz daq che yaog.

Yad mid te ghad Yer suq ve a kor haq nag mad huhx gehz vid che

⁶ Yer suq Ber tar niq khaz khuhn khir tuq phehq jaw che phad Sid monr ve yehg khuhn chehd chehd thad huh, ⁷ yad mid te ghad yawd chehd lo lag lehq, awg phuhd khaz jad che nag mad huhx ke lar che a kaw phua ted mag yug vaha lag lehq, Yer suq teh cuh pad huh awr mi cad chehd che haq yawd ved a kor thag huh nag mad juhd puhr vid che yaog. ⁸ Yawd che kheh te che haq awg laq ghuhd teq pa gha mawg che te yand, i hehd teq pa nez nag jad lehq koz che, "A thoq te lehq teq chaweh awg bon mad cawg kig huh che ve haq yehd bag vehr cheawg le. ⁹ Nag mad huhx che ve haq yug ve lehq, awg phuhd pehz khaz mehz ca huhd lehq har yad ghuhd yad teq pa haq pehg vid gha che yaog," lehd koz vid che yaog.

¹⁰ Yer suq awg lawn che ve haq gha kad che te yand, i hehd haq koz vid che, "A thoq te lehq yad mid che ve haq te soq saq vid cheawg le. Yawd ngag haq daq che awg ceng tea che yaog. ¹¹ Har yad ghuhd yad teq pa vawr, nig hehd geh khar thad liz chehd che yaog. Kheh ma khuhd ngag vawr, nig hehd geh khar thad liz ma chehd chehd hawg. ¹² Nag mad huhx che ve ngag ved awg ton haq nger puhr che awr lehr, ngag awg ton haq tur ax tug awg pun yawd ghu lar che

yaog. ¹³ Ngag nig hehd haq awg cehg mag koz ax laq, ha lehg che bon khuhd che ve mig gig khodaq lo khar lo ca mar vid-eg liz, yad mid che ve haq duhd nuhd vid tug awg pun yawd te lar che kanx che ve haq koz mar vid tug yaog,” lehd koz che yaog.

Yer suq haq chid aq vid tug Yud daq te che

¹⁴ Awg yand u ve haq, awg laq ghuhd teq chi ni ghad awg khuhn chehd che, Yud daq Id sar kar rir oq meh che te ghad paw khod nux teq pa geh kae lehq, ¹⁵ “Yer suq ve awg ton nig hehd haq chid aq ax ver, ngag haq khawd-ehg ma pehar lawg le,” lehd koz vid che yaog. Kheh te lehq i hehd teq pa yawd haq phu sehz chi thehq pid che yaog. ¹⁶ Awg yand u ve haq tanr lehq, Yer suq ve awg ton su haq chid aq vid tug, awg yand daq che haq lehax Yud daq ca chehd che yaog.

*Yer suq yawd ved awg laq ghuhd teq pa geh
Par sar khar pawehd cad che*

¹⁷ Khaor mod awg khuhn did maq ke che pawehd awg kawd maq ve teq ni haq, awg laq ghuhd teq pa Yer suq chehd lo lag lehq koz che, “Nawg awg pun Par sar khar pawehd cad tug, khar lo ted kag ngag hehd haq ca ghu cuha vid gad lehq le,” lehd koz na ngawx che yaog.

¹⁸ Yer suq kawq koz vid che, “Med khuhn lo gehe lehq haw khaz var u ve te ghad chehd lo kae lehq, ‘Sar lar koz che, “ngag ved awg yand gag vehr tez-og. Nawg ved yehg khuhn ngag ved awg laq ghuhd teq pa geh teq geha Par sar khar pawehd haq ngag cad tug yaog,” ced,’ lehz yawd

haq koz vid-eq," lehd awg laq ghuhd teq pa haq koz vid che yaog.

¹⁹ Kheh te lehq, Yer suq koz vid che heh awg laq ghuhd teq pa kae lehq, Par sar khar pawehd cad tug awg pun ca ghu che yaog.

²⁰ Muhd phiq muhd sux naz vehr huh, Yer suq awg laq ghuhd teq chi ni ghad geh teh cuh pad huh awr mi cad chehd che yaog. ²¹ I hehd teq pa awr phoz cad chehd-ag huh, Yer suq koz vid che, "Ngag nig hehd haq awg cehg mag koz ax laq, nig hehd awg khuhn ve chaw te ghad ngag haq kawq phuhz lehq su haq chid aq vid tug yaog."

²² I hehd teq pa duhd har jad che khuhn, "Jawd mawd-og, ngag la," lehd koz lehq te ghad peg te ghad yawd haq kawq na ngawx che yaog.

²³ Yer suq kawq koz che, "Ngag geh teq geha a khehd ted mag khuhn lehax cad chehd che chaw te ghad, ngag haq su ved laq khuhn chid aq vid tug yaog. ²⁴ Chaw yad ve Yad phu awr lehr, yawd ved awg lawn Liq phu khuhn buhq lar peg che heh te lehq yawd gha kae tug yaog. Kheh ma khuhd, chaw yad ve Yad phu haq chid aq vid che chaw te ghad awr lehr, gha duhd har jad tug yaog. Chaw u ve maq pawag che heh ver, yawd awg pun lex lehq daq jad che yaog," lehd koz vid che yaog. ²⁵ Yawd haq kawq phuhz var Yud daq koz che, "Jawd mawd-og, ngag awr la," lehd koz na ngawx che te yand, "Yaog, nawg yaog," lehz Yer suq yawd haq kawq koz vid che yaog.

Jawd mawd Yer suq ve pawehd cad che

²⁶ I hehd teq pa phoz cad chehd huh, Yer suq khaor mod haq yug lehq bon haq chid muh che

yaog. Kheh te peg lehq yawd khaor mod haq yug lehq khehq lehq awg laq guhd teq pa haq yawd pid lehq koz che, "Yug lehq cad-oq. Che ve awr Lehr ngag ved awg ton yaog," lehd koz vid che yaog.

²⁷ Kawz khehd haq liz yawd yug lehq bon haq chid muh peg lehq, i hehd teq pa haq pid lehq koz che, "Nig hehd awg gha lia che ve haq dawroq. ²⁸ Awg lawn ghod ver, che ve awr Lehr kar tiq sax caz haq caz daq che ngag ved awg suhr yaog. Chaw kha peh vad-ag vend bax gha pong tug awg pun ngag ved awg suhr nger puhr che yaog. ²⁹ Ngag nig hehd teq pa haq koz ax laq, Awr pa ve muhd mig awg khuhn lo nig hehd geh teq geha a pehx med ghig awg suhx haq ngag gha dawg tug awg ni kha gag, ngag a pehx med ghig haq mad kawq dawg-og," lehz i hehd haq koz vid che yaog.

*Per troq Yer suq haq chid bag tug awg lawn
Yer suq koz vid che*

³⁰ Kheh te peg lehq, i hehd teq pa Ghig sa haq liq khuhd ka chid muh lar haz lehq tuhez lehq Sar lonr khehaq lo kae che yaog. ³¹ Awg yand u ve khuhn Yer suq i hehd haq koz vid che, "Yaq pehax nig hehd awg gha lia ngag haq saw chid bag lar haz lehq phaw veh tug yaog. Awg lawn ghod ver, †'Yawg huhx var haq ngag dawz vehr lehq, yawg teq pa ted mag ted kag lo phaw veh tug yaog,' lehz Liq phu khuhn buhq lar che yaog. ³² Kheh ma khuhd, ngag kawq teq tuag ver, nig

† 26:31 26:31 Ykh 13:7

hehd haq keh awg kawd Gar liq lehd muhd mig lo ngag kae tug yaog," lehd koz vid che yaog.

³³ Per troq koz che, "Su awg gha lia nawg haq saw chid bag lar haz lehq phaw veh liz, ngag awr lehr u kheh maq ca te hawg," lehz yawd haq koz vid che yaog.

³⁴ Yer suq Per troq haq koz vid che, "Ngag nawg haq awg cehg mag koz ax laq, yaq pehax ghaz mad buhg ser huh, nawg ngag haq maq sir daq lehz sehr pawz koz tug yaog," lehd koz vid che yaog.

³⁵ Per troq koz che, "Ngag nawg geh gha suh liz, ngag nawg haq maq ca chid bag lar haz hawg," lehd koz vid che yaog. Kheh te lehq awg laq ghuhd teq pa liz u kheh saw koz vehr che yaog.

Yer suq Ger ser mar niq kho khuhn bon ca laweg che

³⁶ Kheh te peg lehq Yer suq awr lehr, yawd ved awg laq ghuhd teq pa geh kae lehq, Ger ser mar niq lehd koz che ted kag lo gaeg che yaog. Yawd koz che, "Ngag ox lo bon ca laweg chehd-ag huh, nig hehd chuhr huh mir lar-oq," lehz awg laq ghuhd teq pa haq koz vid che yaog. ³⁷ Kheh te peg lehq, Per troq he lehq Yer ber dehd ve awg yad par ni ghad haq yawd sir ve kae che yaog. Awg yand u ve khuhn yawd ved ni ma khuhn duhd har lehq phehq bawg jad che yaog. ³⁸ I hehd haq koz vid che, "Ngag ved ni ma duhd har jad che suhag lehd tea. Chuhr huh chehd lehq ngag geh teq geha law lar-oq."

³⁹ Kheh te lar haz lehq, yawd awg nuz awr a cehax kawq kae lar lehq, yawd ved mehz khuhd

miaq lo boz cuhx lar lehq koz che, “Ngar paog, kawz che ve ngag haq pong gha ver, pong ax laoq. Kheh ma khuhd, ngag ved a lor cawd che heh tad phehq vid. Nawg ved a lor cawd che heh phehq vid-oq,” lehd koz bon lawg che yaog.

⁴⁰ Awg laq ghuhd teq pa geh yawd kawaq lehq, i hehd yuhq mir ka chehd lawz che haq gha mawg che te yand, Per troq haq koz vid che, “Teq nar rir nehax liz nig hehd ngag haq law lar maq gha cheawg la. ⁴¹ Nig hehd ber che lawd che awg khad khuhn maq gha kae tug bon lawg lehq law lar-oq. Nig hehd thed cawd che haq te gad che ni ma cawg liz, awg suhr awg sar phawd awr awg ghad nud che yaog,” lehd koz che yaog.

⁴² Yawd ni pawz te pawz kawq kae lehq, “Ngar paog, kawz che ve haq ngag mad dawg lehq mad pong gha che ver, nawg a lor cawd che heh phehaq vid-oq,” lehd koz bon kawq lawg che yaog. ⁴³ Kheh te lehq, yawd te pawz kawq kawaq liz, i hehd yuhq mir geq jad che mehz phaw ma ghad cheaq te lehq yuhq mir ka chehd che haq yawd gha mawg che yaog.

⁴⁴ Kheh te lehq, yawd i hehd haq teh lar haz lehq sehr pawz te pawz liz, yawd lawg jaw che heh te lehq, bon ca kawq laweg che yaog. ⁴⁵ Awg yand u ve haq, awg laq ghuhd teq pa geh yawd te pawz kaw kawaq lehq koz vid che, “Nig hehd teq pa yuhq mir ka lehq awg ghad jehd chehd ser cheawg la. Chaw yad ve Yad phu haq, vend bax yad ve laq khuhn chid aq vid tug awg yand gag vehr che yaog. ⁴⁶ Tu lor. Kae veg. Ngawx lor. Ngag haq kawq phuhz lehq chid aq vid che phad lag gag vehor,” lehd koz vid che yaog.

Yer suq haq pheh yug che

⁴⁷ Yer suq tawd yaw chehd che mad peg tand, cuh yad teq chi ni ghad awg khuhn chehd che Yud daq meh che te ghad lag lehq, a teh puhd lehq suhz tag taz che chaw awg mor nux liz yawd geh ga lag che yaog. Chaw mor nux u ve teq pa awr lehr, paw khod nux teq pa he lehq Yud daq chaw teq pa ve awg hox chaw mawd teq pa cuh peha lar che chaw teq pa yaog. ⁴⁸ Yawd haq chid aq vid che chaw te ghad awr lehr, i hehd haq awg hez che kheh te tug yaog lehd koz che yoag. "Ngag bux vid che phad awr lehr, yawd yaog. Yawd haq yug pheh lor," lehz koz che yaog.

⁴⁹ Kheh te lehq, Yud daq Yer suq chehd lo thedeg ghad gehag lehq, "Jawd mawd-og, awg bon ir vid-oq," lehd koz lehq, yawd haq bux vid che yaog.

⁵⁰ Yer suq yawd haq koz vid che, "Awg chawdog, nawg duhd lar che heh har naq teoq," lehz yawd haq koz vid che yaog.

Kheh te lehq, i hehd teq pa gehag lehq Yer suq haq yug cid lar lehq pheh vehr che yaog. ⁵¹ Awg yand u ve khuhn, Yer suq geh chehd chehd che chaw te ghad, yawd ved a teh ghawg tuhaz lehq paw khod nux vig lar che awg ceg var te ghad ve nar puh chuh chez vehr che yaog. ⁵² Kheh te lehq Yer suq yawd haq koz vid che, "Nawg ved a teh haq awg phi khuhn kawq khuhq keoq. Awg lawn ghod ver, a teh haq kha yehd che chaw vawr, a teh haq te lehq suh tug yaog. ⁵³ Muhd nuh maq cuh yad teq chi niq mor haq keh mad che liz ngag haq lag ga vid tug a meha ngag Awr pa geh lawg maq gha hawg lehz nawg duhd cheawg la.

54 Kheh ma khuhd, ngag u kheh te lawg ver, che kheh gha phehaq tug yaog lehd koz lehq Liq phu khuhn buhq lar che teq pa heh khawd-ehg kheh te ca phehq lag gha tuawg le,” lehd koz che yaog.

55 Awg yand u ve khuhn Yer suq chaw awg mor nux haq koz vid che, “Nig hehd teq pa vawr chaw khuhd haq ca phehag che heh te lehq a teh puhd lehq suhz tag taz veha lehq ngag haq ca phehag cheawg la. Ni gha lia bon yehg nux khuhn ngag mi lar lehq mar vid chehd huh liz, nig hehd ngag haq maq ca phehag. **56** Kheh ma khuhd, che kheh phehaq tug awr lehr, Ghig sa ve cuh kar var teq pa ve liq khuhn buhq lar che heh saw phehaq tug awg pun yaog,” lehd koz che yaog.

Awg yand u ve haq, awg laq ghuhd awg gha lia yawd haq saw chid bag lar haz lehq phaw veh che yaog.

Yud daq chaw ve Jehg daq var awg mor Yer suq haq suhx jehg che

57 Yer suq haq yug pheh ve che chaw teq pa awr lehr, paw khod nux Kar yar phaq ve yehg lo yug ve kae che yaog. U huh, liq buhq var he lehq awg hox chaw mawd teq pa phawng daq chehd che yaog. **58** Per troq awr lehr, paw khod nux ve sax nanx awg pad huh kho ko lar kig huh kha gag Yer suq khaz nuhr vid viad lo ghaq kae lehq, awg lawn che ve haq awg leh med kha gag gha sir gha mawg tug, yawd gehe lehq saw par teq pa geh mi chehd che yaog. **59** Paw khod nux teq pa he lehq phawng daq chehd che chaw awg gha lia awr lehr, Yer suq haq gha dawz vehr tug, yawd awg lawn ma hez hez che sax khiz haq ca che

yaog. ⁶⁰ Ma hez hez che sax khiz khanr var kha peh vad-ag cawg liz, jehg sehr phad teq pa teq chaweh sax khiz yug te tug ca mad mawg. Awg leh med lo gaeg lehq, ma hez hez che sax khiz khanr var ni ghad tuhaz lehq koz che, ⁶¹ “Chaw che ve phad koz che, ‘Ghig sa ve bon yehg nux haq ngag te lug lehq, sehr ni awg khuhn lo lehax kawq te gha hawg,’ ” lehz ix mag sax khiq khanr che yaog.

⁶² Awg yand u ve khuhn paw khod nux tuag lehq koz che, “Chaw che ve phad nawg haq awg lawn sax khiz khanr chehd che yaog. Nawg teq chaweh liz ma koz khuhq vehr cheawg la,” lehd Yer suq haq na che yaog. ⁶³ Kheh liz, Yer suq taq chuh-ax ghad chehd chehd che yaog. Paw khod nux yawd haq kawq koz vid che, “Ghig sa ve Yad phu Khreq lehd koz che te ghad awr lehr, nawg yaog la. Ngag hehd haq koz ax tug, teq chehd che Ghig sa ve mehz khuhd suhr ngag nawg haq khanr cuha che yaog,” lehd koz che yaog.

⁶⁴ Yer suq kawq koz vid che, “Nawg koz che heh yaog. Kheh te lehq, ngag nig hehd haq awg cehg mag koz ax laq, che khaz nuhr ver chaw yad ve Yad phu vawr, [†]kand pax ir jad che awg sehr phad ve laq yaq awr phawd awr mi lar lehq, [†]mog khuhn yaq che haq nig hehd gha mawg tug yaog,” lehz yawd haq koz vid che yaog. ⁶⁵ Kheh te lehq paw khod nux yawd ved beg ke veq kad haq juhq seh lehq koz che, “Chaw che ve phad awr lehr, awg cehg mag Ghig sa haq maq sawnr ma caz koz che yaog. A nig sax khiz a thoq haq kawq

[†] **26:64** 26:64a Chid 110:1 [†] **26:64** 26:64b Dyl 7:13

ca sar le. Yawd Ghig sa haq maq sawnr ma caz koz che haq a meha chuhr huh nig hehd gha kad vehor. ⁶⁶ Nig hehd teq pa khawd-ehg kheh duhd-aq le,” lehd koz na ngawx che te yand, “Yawd vawr suh kenr vehr che yaog,” lehz i hehd teq pa koz che yaog.

⁶⁷ Kheh te lehq, su yawd ved mehz khuhd khuhn cux ghig pheq puhr lehq chung phehd lehq, ted pehg vawr mehz khuhd khuhn tha ke vid che yaog. ⁶⁸ Kheh te peg lehq yawd haq na che, “Khreq-og, nawg haq a sug dawz che law le. Ghig sa ve cuh kar var heh te lehq ngag hehd haq koz ax laoq,” lehd koz vid che yaog.

Per troq Yer suq haq chid bag che

⁶⁹ Awg yand u ve haq Per troq sax nanx yehg awg bag huh mi chehd lehq, awg ceg ma te ghad yawd chehd-ag huh lag lehq koz che, “Nawg liz Gar liq lehd chaw Yer suq geh chehd che yaog,” lehd koz che yaog.

⁷⁰ Kheh ma khuhd, Per troq chaw kheh ma ve mehz khuhd suhr huh her ka lehq koz che, “Nawg koz chehd che ix ve haq ngag maq sir,” lehd koz che yaog. ⁷¹ Kheh te peg lehq Per troq yehg ghaz mir khuh bag lo tuhez thad huh, awg kag awg nuz awr ve awg ceg ma te ghad yawd haq mawg lehq u huh chehd che chaw teq pa haq koz vid che, “Che ve phad awr lehr Nar sar rehq chaw Yer suq geh chehd che yaog,” lehd koz vid che yaog.

⁷² Per troq te pawz kawq her ka lehq koz che, “Chaw u ve phad haq ngag maq sir daq,” lehd koz lehq khanr che yaog.

⁷³ Teq per nehax heh gaeg lehq, u huh hox chehd che chaw teq pa Per troq chehd lo lag lehq, "Nawg liz awg cehg mag i hehd awg mor khuhn chehd che chaw te qhad phehq che yaog. Awg lawn ghod ver, nawg tawd yaw che khuhd haq lehax na liz, ngag hehd sir che yaog," lehz yawd haq koz vid che yaog.

⁷⁴ Kheh te lehq Per troq khen lehq, "Chaw u ve phad haq ngag maq sir daq," lehd koz lehq khanr che yaog. Yawd u kheh koz chehd che awg yand awg khuhn ghaz buhg vehr che yaog. ⁷⁵ "Ghaz mad buhg ser huh nawg ngag haq sehr pawz kha gag chid bag tug yaog," lehz Yer suq koz vid lar che haq Per troq kawq duhd nuhd vehr che yaog. Kheh te lehq, yawd tuhez lehq duhd har jad che khuhn hax ceh huhg che yaog.

27

Yer suq haq jawd mawd Pid laq chehd lo sir ve kae che

¹ Muhd sawx ted naq muhd thid-ag che te yand, paw khod nux teq pa he lehq Yud daq chaw teq pa ve awg hox chaw mawd teq pa awg gha lia Yer suq haq dawz vehr tug jehg daq che yaog. ² Kheh te peg lehq, i hehd Yer suq haq pheh yug ve lehq, muhd mig jawd mawd Pid laq ve laq kuhr khuhn yawd haq chid aq vid che yaog.

Yud daq suh che

³ Kheh te lehq Yer suq haq chid aq vid che phad Yud daq awr lehr, Yer suq haq dawz vehr tug suhx jehg suhx taz che haq yawd gha mawg che te yand, yawd kawq duhd phuhz lehq, phu u ve

sehz chi thehq paw khod nux teq pa he lehq awg hox chaw mawd teq pa haq kawq yug khuhq pid lehq koz che,⁴ “Vend bax mad cawg che chaw te ghad haq ngag chid aq ax cheaq te lehq, ngag vend bax te vehr che yaog,” lehd koz vid che yaog.

I hehd kawq koz che, “Che ve haq ngag hehd khawd-ehg kheh te caz daq hawg le. U ve awr lehr, nawg ved kanx yaog,” lehd koz vid che yaog.

⁵ Phu u ve haq bon yehg nux khuhn chid bag ke lar haz lehq, yawd tuhez lehq yawd khad yawad kuhr pehg ca pheh suh vehr che yaog.

⁶ Paw khod nux teq pa phu u ve haq ghawz veva lehq koz che, “Phu che ve awr lehr, awg suhr hehr vehr cheaq te lehq, phu tand geh khuhq daq ma cawd hawg,” lehd koz che yaog.

⁷ Kheh te lehq, i hehd teq pa jehg daq lehq, khehx chaw teq pa haq tur vid tug, phu u ve yug ve lehq a jeq mawq khu te par ve mig gig te pez haq vig lar che yaog. ⁸ Kheh te lehq, yaq ni kha gag mig gig u ve te pez haq awg suhr mig gig lehd koz che yaog.

⁹ U thad lo, cuh kar var Yer rar miq koz lar che heh phehaq che yaog. Yawd koz che, [†]“Id sar rer laq chaw teq pa ted pehg pehar awg phuhd koz chez lar che, chaw te ghad ve awg phuhd phu sehz chi thehq haq yug lehq,¹⁰ Jawd mawd Ghig sa ngag haq koz ax lar che heh, a jeq mawq khu te par ve mig gig te pez haq i hehd vig che yaog.”

Jawd mawd Pid laq Yer suq haq na ngawx che

[†] 27:9 27:9-10 Ykh 11:12-13

¹¹ Yer suq haq muhd mig jawd mawd mehz khuhd suhr huh sir ve hox vid lar lehq, muhd mig jawd mawd yawd haq na che, "Nawg awr Lehr Yud daq chaw teq pa ve jawd mawd yaog la," lehd koz vid che yaog.

"Nawg koz che heh yaog," lehz Yer suq kawq yaw khuhq vid che yaog. ¹² Kheh ma khuhd, paw khod nux he lehq awg hox chaw mawd teq pa yawd haq vend bax tar che te yand, yawd teq chaweh liz mad kawq koz khuhq vid.

¹³ Kheh te lehq, muhd mig jawd Pid laq Yer suq haq na lehq koz che, "Nawg awg lawn i hehd vend bax tar lehq sax khiz khawd kheh koz khanr chehd che haq nawg maq gha kad la," lehd koz vid che yaog. ¹⁴ Kheh ma khuhd, yawd teq chaweh liz mad kawq koz khuhq vid cheaq te lehq, muhd mig jawd mawd Pid laq and jad che yaog.

Yer suq haq ma hez ver, Bar rar baq haq gha phehd che awg lawn

¹⁵ Pawehd u ve haq te che te yand, thawnr khuhn chehd che chaw teq pa awg khuhn ve chaw kheh ma ve ni ma cawd che chaw te ghad haq muhd mig jawd mawd phehd kha vid tug awg lid cawg che yaog. ¹⁶ Awg yand u ve haq, thawnr khuhn geh chehd che chaw teq pa awg khuhn, awg meh buhg jad che Bar rar baq meh che chaw te ghad cawg che yaog. ¹⁷ Kheh te lehq, i hehd phawng daq chehd che te yand, muhd mig jawd mawd Pid laq na che, "Nig hehd awg pun a sug haq phehad vid gad le. Bar rar baq haq la, ma hez ver Khreq lehd koz che Yer suq haq

la," lehd koz na ngawx che yaog. ¹⁸ Awg lawn ghod ver, Yer suq haq soer che ni ma cawg che haq te lehq, i hehd yawd haq chid aq ax che yaog lehz, muhd mig jawd mawd Pid laq sir chehd che yaog.

¹⁹ Kheh te lehq, suhx jehg suhx taz kig kaw jaw thag lo muhd mig jawd mawd Pid laq yawd mi chehd-ag huh, yawd ved awg mid ma yawd haq tawd che kheh koz sanr peha che yaog. "Thed che cawd che chaw che ve phad haq teq chaweh taq te. Awg lawn ghod ver a mig hax ngag yuhq maz a cehax liz mad daq. Kheh te lehq yaq ni teq ni maq ve ngag duhd har jad che yaog," lehd koz tawd sanr fea che yaog.

²⁰ Kheh ma khuhd, paw khod nux teq pa he lehq awg hox chaw mawd teq pa vawr, Bar rar baq haq lawg yug lehq Yer suq haq dawz vehr tug, muhd mig yad teq pa haq awg ghad hax ceh pid che yaog. ²¹ Muhd mig jawd mawd Pid laq muhd mig yad haq koz vid che, "Chaw che ve ni ghad awg khuhn a suq haq phehd vid gad lehq le," lehd koz na che yaog. Kheh te lehq i hehd teq pa koz che, "Bar rar baq haq yaog" lehd koz che yaog.

²² "Kheh te ver, Khreq lehd koz che Yer suq haq ngag khawd-ehg kheh gha te lawg le," lehd koz lehq muhd mig jawd mawd Pid laq i hehd haq na ngawx che te yand, i hehd teq pa awg gha lia koz che, "Laq kan thag huh thaq vehr lor," lehd koz che yaog.

²³ Muhd mig jawd mawd Pid laq kawq koz vid che, "A thoq te lehq le. Yawd a thoq ted ceng haq te yaq kig cawg cheawg le," lehd i hehd haq na

ngawx che te yand, i hehd teq pa hax ceh nux maz kawq kug lehq koz che, "Yawd haq laq kan thag huh thaq veh-oq," lehd koz che yaog.

²⁴ Muhd mig jawd mawd Pid laq awr lehr, muhd mig yad teq pa diz diz huhd huhd te tuag vehr che haq yawd gha mawg lehq, yawd teq chaweh te maq gha vehr che haq yawd gha sir vehr lehq, muhd mig yad kheh ma ve mehz khuhd suhr laq kuhr chuhd lehq koz che, "Chaw che ve phad gha suh che toq ngag awg khod-aq lo tad gag vid. Nig hehd khad nawg-a nig hehd teoq," lehd koz vid che yaog.

²⁵ Muhd mig yad teq pa awg gha lia koz che, "Toq che ve awr lehr, ngag hehd he lehq ngag hehd ve awg yad awg dug teq pa khanr yug che yaog," lehd koz vid che yaog.

²⁶ Kheh te lehq muhd mig jawd mawd Pid laq awr lehr, Bar rar baq haq phehd kha vid lehq, Yer suq haq jawq peg lehq laq kan thag huh thaq vehr tug maq yad teq pa haq chid aq vid che yaog.

Maq yad teq pa Yer suq haq maq sawnr ma caz te che

²⁷ Kheh te lehq muhd mig jawd mawd Pid laq ve maq yad teq pa, Yer suq haq maq yad teq pa ve sax nanx nux khuhn sir ve kae lehq, maq yad ted taq ve awg gha lia Yer suq haq ga phoz paog vid lar che yaog. ²⁸ I hehd teq pa yawd ved a poq haq kuhz kha lehq, a poq yehg maq awg ni sid te che yawd haq kawq deh vid che yaog. ²⁹ A chud te haq yug lehq si ux cuhr heh te ghaq lehq, yawd ved a kor haq khuhz vid che yaog. Yawd ved laq

kuhr laq yaq awr pax awr ve khuhn pund cehg ted mag Yug cid vid lar lehq, yawd mehz khuhd suhr huh khi cuhx teh mi lehq koz che, "Yud daq ve jawd mawd-og, nawg awg bon ir vid-oq," lehd koz lehq, yawd haq maq sawnr ma caz koz gid che yaog. ³⁰ U kheh te peg lehq, yawd haq cux ghig kaod pheq puhr vid lehq, pund cehg u ve Yug lehq yawd ved a kor haq kawq kaod dawz che yaog. ³¹ Yawd haq maq sawnr ma caz te koz gid peg lehq, yawd ved a poq awg ni sid te che haq Yug khuhz kha lehq, yawd ved a poq awg pir kawq ghawz veq vid peg lehq, laq kan thag huh thaq vehr tug yawd haq seh ve kae che yaog.

Yer suq haq laq kan thag huh thaq vehr che

³² I hehd teq pa tuhaz tod-ag huh, Kud rer ner med yad Sid monr meh che te ghad haq mawg che yaog. I hehd yawd haq Yug lehq Yer suq ve laq kan haq taz cuh vid che yaog. ³³ Gawd laq gawd taq lehd koz che awg ti ted kag lo i hehd gaeg che yaog. Awg meh u ve cuhz kig awr lehr, a kor ghuhd lehd koz che yaog. ³⁴ I hehd teq pa a pehx med ghig ce maq te che Yug lehq awg khad tuhx te che awg ceng haq pawnd daq lehq, Yer suq haq taw vid che yaog. Kheh liz, yawd lehq ngawx peg lehq mad kawq dawg che yaog.

³⁵ I hehd teq pa yawd haq laq kan thag huh Yug thaq ke peg lehq, yawd ved beg ke veq kad teq pa haq Yug lehq pehg daq tug nar bar kehx Yug che yaog. ³⁶ Kheh te lehq, i hehd teq pa u huh mi lar lehq yawd haq paog chehd che yaog. ³⁷ Kheh te lehq, i hehd teq pa yawd haq vend bax tar che liq buhq khang gid lar che yawd ved a kor thag

lo nehx lar lehq, "Chaw che ve phad vawr, Yud daq chaw teq pa ve Jawd mawd Yer suq yaog," lehd koz lar che yaog. ³⁸ Awg yand u ve khuhn, chaw khuhd liz ni ghad Yer suq geh teq geha laq kan thag huh thaq vehr lar che yaog. Laq yaq awr pax awr te ghad he lehq laq vehr awr pax awr te ghad thaq ke lar che yaog.

³⁹ Phanr taz phanr yaq te tod chehd che chaw teq pa, yawd haq maq sawnr ma caz te koz gid lehq a kor hiz lar lehq koz che, ⁴⁰ "Bon yehg nux haq te lug lehq sehr ni awg khuhn lehax kawq te gha che chaw-og, nawg awg ton haq pong vid tug teoq. Nawg Ghig sa ve Yad phu yaog ver, laq kan thag huh yaq laoq," lehd koz vid che yaog.

⁴¹ Paw khod nux teq pa awr lehr, liq buhq var teq pa he lehq awg hox chaw mawd teq pa geh teq geha su heh te lehq yawd haq koz gid ghig gid che yaog. ⁴² I hehd koz che, "Su haq yawd pong vid gha che yaog. Yawd awg ton haq yawd kawq ga pong vid maq gha. Yawd Id sar rer laq ve jawd mawd ma hez hawg la. Kheh te lehq, yawd a meha laq kan thag huh yaq ver, ngag hehd liz yawd haq yonr tug yaog. ⁴³ Yawd Ghig sa haq yonr che yaog. 'Ngag awr lehr Ghig sa ve Yad phu yaog,' lehd yawd koz lar cheaq te lehq Ghig sa yawd haq ni ma cawd ver, Ghig sa yawd haq yug pong vid-oq," lehz i hehd koz che yaog. ⁴⁴ Yawd geh teq geha laq kan thag huh thaq ke lar che chaw khuhd var ni ghad liz, su heh te lehq yawd haq maq sawnr ma caz te koz gid che yaog.

Yer suq suh che

⁴⁵ Muhd kaw cuhaz huh te lehq muhd phiq phawd awr seh nar rir kha gag, mig gig koar lo awg naz hoq awg naz tud saw phehq vehr che yaog. ⁴⁶ Muhd phiq phawd awr seh nar rir kheh yand gaeg lehq, Yer suq awg khuhd pehz hehnd mehz lehq koz che, “E li, E li, la ma sa ba tha tha ni,” lehd koz kug che yaog. Cuhx kig vawr, †“Ngag ved Ghig sa-og, Ngag ved Ghig sa-og, a thoq te lehq nawg ngag haq chid bag lar haz cheawg le,” lehd koz che yaog.

⁴⁷ U huh hox chehd che chaw teq pa ted pehg tawd khuhd u ve haq gha kad che te yand, “Chaw che ve phad awr lehr, Ed lid yaq haq ca kug chehd che law,” lehd koz che yaog. ⁴⁸ I hehd awg khuhn ve chaw te ghad teq pear maq lehax cex kae lehq, a kaz chuhq gha che pha nuad ted mag yug veba lehq, pund tag awg med-e gehd choz lar lehq a pehx med ghig ce maq te che khuhn tiz ke peg lehq, yawd haq bez taw vid che yaog.

⁴⁹ Kheh ma khuhd, chaw ted pehg pehar koz che, “Taq te ser. Ed lid yaq yawd haq ca ga vid-ag tug lehq nar, law ngawx lar veg ser,” lehd koz che yaog.

⁵⁰ Yer suq awg khuhd pehz hehnd mehz te pawz kawq kug peg lehq sax chez vehr che yaog.

⁵¹ Awg yand u ve haq, bon yehg nux khuhn ve pha thed lar che liz, awg thag lo te lehq awg huhx lo kha gag ni khod te pheq vehr che yaog. Mig hiz lehq huhx meh teq pa liz awg khod sez phehq vehr che yaog. ⁵² Tur phuh teq pa phaw kha vehr lehq, suh vehr lar che Ghig sa ve daq

† 27:46 27:46 Chid 22:1

kehg che chaw kha peh vad-ag awg ton kawq teq tuag che yaog.⁵³ Yer suq kawq teq tuag peg khaz nuhr, i hehd liz tur phuh khuhn tuhaz lehq, Yer ruq sar lehnr med khuhn gehe lehq, chaw laex ghad i hehd haq gha mawg che yaog.

⁵⁴ Maq yad awg hox he lehq yawd geh Yer suq haq paog chehd che maq yad teq pa awr Lehr, mig hiz che he lehq kha phehaq che awg ceng teq pa haq gha mawg che te yand, i hehd teq pa kuhz jad lehq koz che, "Chaw che ve phad awr Lehr, awg cehg mag Ghig sa ve Yad phu te ghad phehq che yaog," lehz koz daq che yaog.

⁵⁵ Awg kanr a cehax vid-aq lo yad mid teq pa liz kha peh vad-ag hox lar ngawx chehd che yaog. I hehd teq pa awr Lehr, Yer suq Gar liq lehd muhd mig khuhn tuhaz thad lo ag, yawd khaz nuhr ghaq lag lehq yawd ved awg ceg te lehq te car te taw vid tod che yad mid teq pa yaog.⁵⁶ I hehd awg mor awg khuhn, Mar riq Mar gar dar laq, Yar koq he lehq Yod sehq ve awr ye Mar riq he lehq Yer ber dehd awg yad par teq pa ve awr ye, chaw che ve teq pa chehd chehd che yaog.

Yer suq haq tur vid che

⁵⁷ Muhd phiq vehr huh, Ar riz mar thehr med yad Yod sehq meh che paw sa var te ghad lag che yaog. Yawd awr Lehr, Yer suq ve awg laq ghuhd te ghad phehq che yaog.⁵⁸ Yawd muhd mig jawd mawd Pid laq geh kae lehq, Yer suq ve awg ton haq ca lawg yueg che yaog. Kheh te lehq, yawd haq pid tug muhd mig jawd mawd Pid laq tawd sanr vid che yaog.⁵⁹ Kheh te lehq Yod sehq awr Lehr, Yer suq ve awg ton haq yug ve kae lehq,

daq kehg che pha phua yug thiz vid lehq, ⁶⁰ huhx meh thuhz lar che yawd ved tur phuh awg suhx khuhn yug ve ke lehq, tur phuh awg khod med huh huhx meh diq nux ted mag phuhz chuhd lar haz lehq koeq che yaog. ⁶¹ Awg yand u ve khuhn, Mar riq Mar gar dar laq he lehq awg kag awr ve Mar riq te ghad liz, tur phuh awg pad huh mi lar ngawx chehd che yaog.

Yer suq ve tur phuh haq maq yad teq pa paog vid lar che

⁶² Sawx awr kheha gaeg ver, Sa ba to awg ni gag vehr lehq, paw khod nux te pa he lehq Phar rir sehd teq pa muhd mig jawd mawd Pid laq geh kae lehq koz vid che, ⁶³ "Jawd mawd-og, chaw he ka var che ve phad awr Lehr, yawd teq chehd ser thad huh, 'Sehr ni gaeg ver, ngag kawq teq tuag tug yaog,' lehz ngag hehd haq yawd koz ax lar che yaog. ⁶⁴ Kheh te cheaq te lehq, yawd ved awg laq ghuhd teq pa yawd haq maq gha ca khuhd yug ve lehq, 'Yawd suh kig lo kawq teq tuag vehor,' lehz su haq maq gha ca koz vid tug, sehr ni kha gag yawd ved tur phuh u ve haq kha nehax paog lar vid tug tawd sanr vid-oq. U kheh maq te ver, a mig her ka cheaq keh a meha kawq her ka ver, sang nar jad vehr tug yaog," lehd koz vid che yaog.

⁶⁵ Jawd mawd Pid laq i hehd haq koz vid che, "Nig hehd teq pa geh paog par maq yad teq pa sir ve lehq nig hehd te gha che heh te lehq kha sehax paog cuh vid lar-eq," lehz i hehd haq koz vid che yaog.

66 Kheh te lehq i hehd teq pa kae lehq, tur phuh haq su maq gha phaw vid tug huhx meh dig haq cunr dawz lar lehq, paog par teq pa haq kha sehax paog cuh vid lar che yaog.

28

Yer suq kawq teq tuag che awg lawn

1 Sa ba to awg ni te peg lehq, suhr ni teq ni khuhn awg kawd maq ve teq ni muhd sawx ted naq huh, Mar riq Mar gar dar laq he lehq awg kag awr ve Mar riq te ghad, ix mag tur phuh lo ca ngawx-eg che yaog. **2** Awg yand u ve khuhn, mig hiz jad che yaog. Awg lawn ghod ver, Jawd mawd Ghig sa ve muhd nuh maq cuh yad te ghad muhd nuh maq lo yaq lehq tur phuh haq phuhz chuhd lar che huhx meh diq u ve haq phuhz kha lar lehq, yawd huhx meh dig u ve thag huh taz mi chehd che yaog. **3** Muhd nuh maq cuh yad u ve yawd ved awg hoq awg han vawr, muhd pehq che heh te lehq, yawd ved beg ke veq kad liz phux-u ghad te che yaog. **4** Paog chehd che maq yad teq pa Ghig sa ve muhd nuh maq cuh yad haq gha mawg lehq kuhz ched jad cheaq te lehq, chaw suh heh te lehq kuhd teh vehr che yaog.

5 Muhd nuh maq cuh yad u ve yad mid u ve ni ghad haq koz vid che, “Ta kuhz. Laq kan thag huh thaq vehr lar che Yer suq haq nig mag ca ngawx-ag cheawg lehz ngag sir chehd-aq. **6** Yawd chuhr huh ma chehd. Awg lawn ghod ver, yawd koz lar che heh te lehq Ghig sa yawd haq kawq teq tuag vid vehor. Yawd haq teh lar kig huh ca

ngawx laoq. ⁷ Har naq koeq lehq yawd ved awg laq ghuhd teq pa haq che kheh ca koz vid-oq, ‘Suh kig lo Ghig sa yawd haq kawq teq tuag vid vehor. Nig hehd haq keh awg kawd Gar liq lehd muhd mig lo yawd veh che yaog. U huh nig hehd yawd haq gha mawg tug yaog,’ lehd koz vid-oq. Awg lawn che ve ngag nig mag haq koz ax che yaog,’ lehd koz vid che yaog.

⁸ Kheh te lehq ix mag kuhz liz kuhz, ha liz ha lehg jad che khuhn te pawaz lehax tur phuh lo tuag lehq, awg laq ghuhd teq pa haq cex kawq koz vid-eg che yaog.

⁹ Awg yand u ve khuhn, Yer suq liz ix mag mehz khuhd suhr huh lag hox lar lehq ix mag haq koz vid che, “Awg bon ir vid-oq,” lehd koz vid che yaog. Kheh te lehq ix mag yawd ved khi kud haq vuhz cuhx lar lehq yawd haq a kor pi vid che yaog. ¹⁰ Kheh te lehq, Yer suq ix mag haq koz vid che, “Ta kuhz. Ngag ved a vix a nax teq pa haq Gar liq lehd muhd mig lo kae tug ca koz vid-eq. U huh i hehd ngag haq gha mawg tug yaog,” lehd koz vid che yaog.

Paog chehd che maq yad teq pa paw khod nux haq koz vid che

¹¹ Yad mid u ve ni ghad kae tod che awg yand u ve haq, paog chehd che chaw teq pa ted pehg med khuhn gehe lehq, kha phehaq che awg ceng gha lia paw khod nux teq pa haq koz vid che yaog. ¹² Kheh te lehq paw khod nux teq pa awr lehr awg hox chaw mawd teq pa haq phawng daq lehq jehg daq peg lehq, maq yad teq pa haq phu kha peh vad-ag pid lehq koz vid che,

13 “ ‘Muhd khax te khend lo ngag hehd yuhq mir ka chehd-ag huh, yawd ved awg laq ghuhd teq pa lag lehq yawd haq lag khuhd Yug ve vehr che yaog,’ lehz nig hehd su haq koz vid mehr. ¹⁴ Awg lawn che ve haq muhd mig jawd mawd nux gha kad ver, nig hehd teq pa haq yawd teq chaweh maq gha te vid tug, ngag hehd teq pa yawd haq koz vid tug yaog,’ lehd koz vid che yaog.

¹⁵ Kheh te lehq i hehd teq pa phu u ve haq yug lehq, su i hehd haq koz mar vid lar che heh te che yaog. Yud daq chaw teq pa awg khuhn a meha yaq ni thad kha gag awg lawn che ve haq lao daq veh chehd che yaog.

Yer suq awg laq ghuhd teq chi te ghad haq tawd pid che

¹⁶ Awg laq ghuhd u ve teq chi te ghad awr lehr, Gar liq lehd muhd mig khuhn Yer suq koz mar vid lar che keh dig u ve lo kae che yaog.

¹⁷ I hehd yawd haq gha mawg lehq a kor pi che yaog. Kheh ma khuhd ted pehg pehar vawr thuhd duhd nuhg duhd te chehd ser che yaog.

¹⁸ Yer suq i hehd teq pa chehd lo lag lehq koz che, “Muhd nuh maq lo ve he lehq mig gig khod-aq lo ve kand pax awg gha lia ngag haq saw pehar vehr che yaog. ¹⁹ Kheh te cheaq te lehq nig hehd teq pa kae lehq, chaw ceng gha lia ngag ved awg laq ghuhd phehaq vid tug ca teoq. Awr pa, Yad phu he lehq daq kehg che Awg ha phu ve awg meh awg huhx lo i hehd haq baz tiz sar pid-oq.

²⁰ Ngag nig hehd haq pid lar che tawd khuhd awg gha lia haq na yug lehq te tug, i hehd haq mar vid-oq. Mig gig che ve awg yand leh thad kha

Mar thehr liq 28:20

clxvii

Mar thehr liq 28:20

gag, ngag nig hehd geh khar thad liz chehd tug
yaog," lehz i hehd haq koz vid che yaog.

**Lad hur Si Liq Phu Awg Suhx
Lahu Shi: Lad hur Si Liq Phu Awg Suhx New
Testament**

copyright © 2015 Wycliffe Bible Translators, Inc.

Language: Lahu Si

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

e3f23237-3165-58f9-84d8-20fb5acd84fe